

萬載縣志

第十冊



萬載縣志卷十之二

人物

列傳二

清

辛敏芳字文馥幼穎異能文年十二或以田土細故訟其父明韜  
值父游金陵芳代質邑令韋奇之訊以文援筆立就因切責訟者  
置牘不問旋游泮食餼順治丁亥奇荒多方拯濟見露骸輒瘞焉  
知縣高鵬起聞其賢欲見之守道不往因贈匾曰今之子羽生平  
藏書甚多皆手自校正欲建萬卷樓會卒舊志泰府志

譚嘉棟字隆卿邑增生父德光爲縣吏以純樸稱棟性篤厚學務



主敬讀書必盥手然後展卷母病躬侍湯藥廢寢食者浹旬丁亥  
荒施粥賑濟存活者眾舉鄉飲不赴嘗作功過錄五思箴以自警  
易簣時猶屬子孫力行之子經國有傳經泰十四游庠督學張京  
元評爲曠代逸才孫傳任登仕俱邑庠  
宋良璜字無爲穎異有豪氣爲文博觀約取左右逢原衡鑒十不  
失一邑稱文章尺子得子晚義方最嚴每讀書作文一言稍窒蹙  
之流血年七旬猶與試學使趙拔一等稱爲老相知又稱一家相  
知蓋是年長子繼種冠軍得恩貢次子繼棧優等季子繼稭首取  
入泮故云然其律身一以古賢爲歸危坐竟日無跛踣之容方正  
嚴毅具天性也卒年八十五繼種有傳

王事字惟勤丁亥奇荒煮粥濟饑重建石亭木橋助三元殿基嘗  
路拾遺金坐以待還構書舍大和觀篤志教子年八十六卒子言  
字文人磊落淵博垂髫遊庠奉繼母以孝著教育幼童甚摯後學  
多所造就康熙十五年學使邵取准入貢適寇氛正熾未獲領咨  
士林惜之言弟京立邑庠舊志

辛映斗字鼎卿幼孤依母甘氏成立由縣府吏充布政司西通吏  
以勤敏練達給冠帶瑞袁浮糧積困在民適藩憲莊僉憲安入覲  
世祖章皇帝諭陳地方利弊斗隨行卽以是請兩憲隨疏以聞部  
議取勘元明籍而兵燹後徵冊無存乃據志書詳覆院允瑞請而  
袁獨被駁斗憂甚捐金三百爲勾當費始得援鄰郡科則比校申

詳題奉恩旨減銀萬七千有奇三百年民困頓甦斗之力也迄今  
子孫蕃盛立祠祀焉舊志兼汰滅浮糧始末

袁端宇以人號靜齋歲貢生博學好古善詩文與宜春易嗣重染  
佳植何山梁巨植木邑周顯輩讀書郡城以力挽文風爲已任士  
多師之屢試中副車子琳廩生宗璜邑庠舊志

郭萬象號鼎梅性好善嘗修花橋橋遇荒施棺粥濟貧乏有鬻妻  
子名代之贖順治十三年率子士選士達士逢捐金五百有奇重  
修聖廟事報院部春秋永頒胙焉知縣梁大年額獎之卒年八十  
三士選字簡在性誠慤與二弟讀書飲石齊年逾七十手不釋卷  
以明經終士達廩生士逢附生孫庠生邦泰乾隆乙丑歲饑經理

賑荒全活甚眾京邦佐俱游庠舊志

宋繼種字生氤號育川就傅期月輒誦數萬言父良璜見其聰穎  
督責逾倫每攜之應試途間命題行文一里一藝歸錄成帙以恩  
貢肄業成均數爲名公卿所器洎登賢書人或勸之仕曰予性拙  
不能曲腰折項爭上官願成一進士副家君望足矣歷六科僅中  
明通榜遂不出清俸自持義不苟取嘗教諸子曰君子檢身涉世  
須懷匹夫匹婦一能勝予之心予閱人多矣未見驕肆不倫能以  
遠省爾曹戒之康熙戊午大饑倡眾領官銀親涉波濤挽粟以濟  
卒時知縣常親臨其喪謂有古君子風所著四書經史摘証梓行  
子希奭庠生希陳有傳

譚經國字定之精明有幹才由歲貢授樂安訓導甫入境城爲寇陷知府陳洪諫委署崇仁學與知縣陸呈祥共嚴城守寇不敢窺和碩安親王賜以袍加靴錄焉次年署東鄉學寇圍城幾一載兵少糧乏文武皆議出避經國力主守城獲全士民頌功紀石至樂安城復乃澄本任繕城葺學查荒絕建義倉詳編審立儒戶多所建明有媒孽影射者爲力雪保全甚衆督學邵稱其行不愧古學不愧師云予任登仕俱庠生舊志參府志

汪中元字一仙家貧無師偕兄弟十餘人講習善垂書屋有疑質之伯父相度季父叔度遂豁然有得學使侯峒曾以奇古贍博目其文郭都賢稱爲曠世奇才與何山袁繼梓周顯輩交遊及門甚衆所得束脩悉供甘旨毫無私積由歲貢考選學職未任卒舊志辛金貴字玉友父奇策庠生急公濟貧借貸不計利嘗拾劉德九遺金卽還之建且息亭於楊公嶺設茶飲人修半升米坑石橋舉鄉飲金貴其長子也篤學勵行以康熙歲貢任德興訓導時上寇兩次陷城偕知縣凌希聖曲諭招撫寇感其誠皆投戈泣服饒南九道李芳春嘉其功重之知縣張委詣鄉查荒熟不事苛擾民困得甦士有奮者時出俸賑給之嘗寓書教諸子曰忠厚所以持身輸將所以報國長子汝礪邑庠生天性醇樸非公不履公庭卒年八十六子孫二廩生六人在庠次汝梅另有傳以後俱舊志參府志敖連字宗玉少孤刻勵自立喜愠不形事伯叔父愛敬兼至鄉鄰

有急周之稱貸不責償康熙甲寅寇擄民間婦女連爲贖回完娶甚眾由舉人官瑞昌教諭月課諸生捐俸給酒食優者旌之士多感頌子有仁有義有智俱庠生孫化龍武舉

楊勳字克成歲貢少孤事母以孝聞居鄉以德感人咸推長者堪與吳獻吉壤故鄰湯某荒山勳憫湯無子使自用之吳慍甚勳曰此人倘有後吾心快卽受賜矣甲寅寇變擄殺甚眾勳挈家屢蹈危險卒無恙人謂天佑堂姪二寇害其一又擄其季乃設法贖回續弟後總鎮趙督兵剿寇勳先輸穀草懇給招撫文於是逃者漸復勳皆保護安全之選奉新訓導以疾辭卒年八十二與妻歐陽氏生歿年月皆同亦異事云子三名廩生善字慶遠歲貢任饒州

訓導士慶得師言舉人孝友謙恭教家有法

袁秉星字宿也庠生有文行父早歿事寡母孝忍讓少弟撫孤姪如子爲人排解傾囊不惜鄰里空乏賑助惟恐不至康熙甲寅兵變副將陳素綸聞其名咨以方畧給令牌俾安輯地方團集有法寇不入境好獎誘人才開館延師教親族子弟會課優者給紙筆膏火競勸於學卒年八十七子則旦帥亮庠生亮有修行遺草孫建鼎文庠建中寬曾孫廷鼈另有傳

李國幹字汝翼原樸多隱德甲寅之亂寇擄婦女數十宜其家令主守幹乘寇出悉縱之已亦逃寇焚其廬教弟成名不辭勞悴年九十卒子爲文孫世秀世勳文庠舉人承烜其後也

彭璧字秦求穎異多豪舉十三游庠甲寅寇變率族弟贊入練兵捍禦知縣吳深倚之嘗控免族中虛賠上高錢糧許豁本邑尾欠部費及穴傷火耗後以歲貢官南昌訓導勸課有方縉紳多出其門同寅何觀國歿於署為營辦歸葬年七十七卒尚書熊一瀟為之傳子超邑庠孫元仁廩生元灝明煥元信俱在

郭士佩字公瑜父一假庠生見人危急與古蹟頹壞者不惜傾囊振修之士佩性謙謹無機械即盛怒不出惡言父歿友愛幼弟數十年無間以歲貢任清江訓導自奉淡簿訓士以力學敦品子邦升郡庠孫鍾秀有傳曾孫洪武舉舊志參府志清江名宦傳

宋希賢字象之少孤事繼母孝康熙舉人任清江教諭獎勵廉隅

克振士習巡撫白潢捐修清江長堤命董其役昇以刑杖賢至誠開諭不事扑責末期告成巡撫旌以金帛子啟泌廩生啟洙邑庠舊志參府志清江名宦傳

高捷字得先父廷祐嘗路拾盧達遺金坐待還之有捕獲盜牛者欲溺諸水力阻得活舉鄉飲不就年八十五卒三子俱游庠捷孝友力學立品有先民典型為文力振衰靡毋有所得雖半夜必起告其門人以歲貢終年六十八臨終手摩姪頂而屬其子曰爾伯父早逝無後叔止遺此孱弱兒其善撫之子涕泣受命推愛甚至子愈謙另有傳孫岱嶠文庠以後俱舊志參府志

龍文炳字嘉猷歲貢祖兆璜內行克修以利物濟人為念善堪輿

尤精岐黃術鄉里沉疴多應手痊舉鄉飲父星舉人課炳最篤炳博見洽聞嚴正不阿無厲言倨色人自不敢干以私邑中大事依炳爲可否官安遠訓導以正學爲多士倡有持百金求舉孝行者切責之平生著作甚富所作修學記安遠人爲刻石

宋希陳字東尹繼種次子少承家學繼從處士熊頤談經閭皂山盡得具奧肄業豫章書院受知廵撫宋犖知府胡應麟延爲昌黎山長中壬午鄉試計偕留京名藉甚宋至視學兩浙聘同衡文晉撫諾粵東道楊並命子弟師事焉歸里從游日衆因材施教作文務臻里奧嘗戲以寸香角捷香未竟二藝立就彌復超拔可喜終不第識者深惜之易簣時猶口占二聯生平孝友肫摯舉動遵家

禮事繼母色養兼隆撫弟姪甚有恩著有四書講義作文譜應制律體作法通解北調曲等書惟不負軒制藝梓行新昌漆紹文銘其墓子啟穀孫嘉鴈俱郡庠舊志參府志

彭元升字彥伯舉人小字外少穎敏過目成誦童年隨師賀巨室聯句盈庭歸詢之隻字不遺聞者駭服遂有外夫子之稱爲文下筆如飛曲遂雋永中壬午鄉試折節讀書閉戶猴腦山三年學益富著有燕石集太史潘述祖評而序之

巢廷魁字克占舉人勵志學業善誘人才與辛聯昌彭元升等相鼓勵知府葛繼孔觀風取冠多士延爲子師署內陶思淵與通款洽朝夕談經史講禮法并出文稿就正陶深服之後陶聯捷入詞



清江縣志卷之二  
林予起業庠生

辛聯昌字殿開舉人性孝友父病篤刲左股雜他肉進病遂瘳少弟早世與人言嗚咽不能出聲接物和易然遇不平事侃侃無所瞻顧刻苦讀書經指授者率有聲所得館穀置產分給諸弟喜作文雋逸疎爽曲透物情成一家言知縣施昭庭重之日相談論未嘗以私干

張明德字本初號橋亭舉人考取內閣中書性端嚴不隨俗趨讀書必鑰戶爲文苦思冥搜咬髭鬚指甲殆盡掃絕陳言力追古作者康熙辛丑試禮部有賦以關節者怫然曰吾文自當售且進身詎容苟乎卒不第作詩百餘篇寄其友死於逆旅死後精爽炯炯

幾於神明人稱爲奇士著有齊治通書藏於家以後俱參府志

辛金澄字三登邑廩生幼穎異爲文精悍力矯浮華詩古文根據經史雄渾奧博知縣吳自肅得其試卷大喜旋爲督學邵識拔爲人淡泊寡營矜然諾不爭外飾與同志宋希陳龍文炳及弟金沂文行共勵名其社曰兼修辨論學業洞析奧窔希陳稱其待友誠待戚和蓄僮僕義謂古拙自愛如夏鼎商彝令人不敢褻視易簣時遺令勉內外孝友戒用僧道衣被從儉約卒年五十一子汝獻別有傳以曾孫從益貴贈資政大夫

辛汝獻字古才拔貢少失怙恃子身持喪如禮事太母劉與繼母高咸得歡心具養甘旨必豐己茹菜而已爲文溫醇雅潔日可得

二十藝學務實不近名同輩有聯名誇聲氣者淡然不屑也邑公  
事隨力贊襄尤急於宗支再世第某世單丁不能自存爲之婚者  
再從叔某老無子膳養終其身乾隆乙丑任湖口教諭初謁廟見  
崇聖祠在禮門外請於巡道李根雲議更修并修殿廡明倫堂如  
式邑進士某以小故戚屬興訟尺書諭之和好如初生員葉某兄  
弟爭產母溺愛弟以不孝訐其兄聞以至性戚感泣拜而去先是  
卜修文廟旣得日者言不利於司錢者笑而不應竟卒於任年七  
十一以孫從益貴累贈資政大夫

辛金鑑字又章歲貢勤學問敦本實嘗自作家規朔望集子姪聽  
講任石城教諭捐俸倡建義學士子以文謁者批閱不倦士甚服  
之卒於官爲立主祀義學中

郭岡字鳳梧拔貢生以官學教習期滿選江南泰興知縣在任興  
學校立社倉丈沙田蛟出壞民田廬捐金賑卹其聽斷聰察而平  
恕邑紳梅有僕被殺未得主名岡徑驗畢微視捧柩者形色有異  
立命械之至署一鞠而服不累一人治地近監獄私與緝私格鬥  
人頗眾岡聞報會營馳往擒之訊無辜者立釋以十三人上撫軍  
欲以逆論岡爲請命者七不得已躬叩鈴轅請曰愚民何敢爲逆  
狂積習迫饑寒又不知王法故出此首職教養無素陷之死地也  
請先題叅以塞罪狀撫軍改容謝焉竟從輕比委賑寶應水災預  
飭保甲註册令自標饑民字於門親詣查勘按戶散給無冒領亦

無漏澤調華亭革鹽陋規清釐積案華亭濱海二濠東鹽塢西民  
居皆官地商以東有水患請於上憲西徙岡因其病民反覆申詳  
者二十餘次事卒止民咸德焉卒於官適倉穀變士民爲呈郡  
代補并賻以歸子開英另有傳

楊維鑑字希古歲貞幼孤力學喜作詩古文詞尤工八分書授長  
寧訓導教士有法所著有四書理解學使湯聘爲之序又著田寮  
文集八卷知縣江元璐甚稱之

辛顥字景淳號道崖自幼醅謹比長恪守程子四箴聞朋輩戲言  
輒面發赤掩耳疾走率諸弟肄業學舍月三四歸省父炳文有氣  
喘疾顥負行堂廡率爲常父母奇愛之懼其體孱好學常靳其

膏油顥竊私益之夜分達旦不寢富兀坐沉思時懵若無觀或竊  
其几案間物勿覺也舉於鄉越五年卒有銘其墓者曰行之篤而  
自以爲癡也學之酷而自以爲肥也嗚呼斯人

王家塾監生家饒好行其德嘗捐貲立茶山義塚又置渡高城買  
田爲經以計乾隆癸亥荒預儲粟百餘石以賑饑者復出貲倡平  
糶施綿衣千襲助修文廟及文明塔創高城社倉并捐以穀布政  
湯旌其廬府志

辛繼攀字達侯歲貢有孝行爲諸生日常過市汲水養親嗜古力  
學持已端肅尤嚴義利辨人有非行不敢令之知讀書馬腦山房  
三十餘年閑以詩酒自娛著有性理體要蒼崖草學者稱蒼崖先

生子廷芝另有傳

聞成忠庠生父老失明侍養左右從兄奉齡絕嗣爲立後置產又捐貲爲族子娶婦乾隆癸亥庚午間穀價騰踊捐金凡二百餘贍族黨嘗建昌橋石橋及竹渡浮橋踰千金并置贍渡田卒之日聚諸負金者焚其券

辛聯居早孤母王氏中年得瘋疾兩手不仁君無兄弟妻室赤貧賣卜以日多奇中過午不卜或樵或釣歸必爲母盥櫛凡起居飲食及浣濯埽除必身親之服養三十餘年未嘗少懈

辛金炯字首亮八歲伯母劉新寡以爲後稍長受鄰傭早晚問安仍勤事歲時予以肉卽遺母遠僱值雖豐不受母有痼疾得雞少

愈輒以雞進母浣於塘忘攜杵歸取而置衣浣所適孝子自外至或曰爾母溺矣則急投水良久若有人掖之者母急呼救閱時始甦雍正初土寇竊發孝子負母避遇賊於小石橋將繫母孝子稽首出血反得免至今呼爲孝子橋云新編

按辛明經所作傳不及割肱事蓋爾時請旌有所諱避恐傷生也今功令寬矣據實補之

宋啟封字孟侯監生幼繼世父希商爲嗣逾年繼母卒事父先意承志能得歡心年二十餘繼父亦卒哀毀不具所生念不得事繼母延丹青圖之弗肖積思入之一夕夢老嫗摩其頂曰兒吾子也及覺具以告寫肖寫者一若自神助頃刻惟肖親族傳觀嗟嘆嘗

置田已予值後即具人與父有故即還田讓其值遇賑饑及大興作皆樂成之邑推爲長者府志

龍世嶽字維智性篤摯有幹局康熙間兵亂母及弟被擄北去數歲有傳其母死者遙望痛哭曰生不能養死不能歸其骨何以子爲乃盡鬻產間關至都門徧訪無耗禱於許旌陽祠聲淚俱下一人過而怪之語之故則其弟也引至寓所母在焉二弟自外入愕然問故始相持而哭諸弟各受室不能脫籍乃獨負骨歸隱衣裝中飲食必虔祝比全家大會戚友塋祭如禮孫鳳祥另有傳

龍學宏字士魁庠生慷慨好義常爲故家子某完娶鄰郡僑若儲某負債欲出妻代償使全且周卹之佃有逋租鬻媳者宏聞之慰

曰若無然吾豁若租佃媳亦完先是學產多被侵蝕宏與郭邦藩上控清查爲當事所忌欲致之死學使李廉得其狀庇護以免雍正甲辰丙午學租入簿不足贖鄉試賣已田給之家遂落子孔彥字俊仲十歲應試稱神童知縣許拔置第一學使姚稱其文精深博大人隆萬之室在學六十五年屢薦不售以年老恩賜舉人以後俱參前志

郭邦藩字宗臣歲貢生有幹材邑中利害獨任不疑學田火被侵蝕邀同事控准清查藩按冊稽勘隱占無所遁雍正九年部檄補吏報墾復請於知縣汪徧勘荒确以難墾力稟院司得仍舊邑賴以安任崇仁訓導善誘人材以文謁者多所成就至今傳頌焉

高愈謙字益贊號遜齋歲貢生任新喻訓導課士有方家素封好義憐從弟貧與田三十二畝爲贍雍正間與龍言各捐金五百倡修下田石橋又立興江兩渡船捐貲置產歲修取給屢舉鄉飲卒年八十二子嶠附貢生嘗捐金六百移建學宮孫秉鈞捐穀四百石助賑得議叙曾孫湘文有傳

郭鍾秀字挺文號巍山武解元父邦升庠生喜吟咏書法懷素嘗助田爲戚節婦建坊其訓家云受人欺者非辱令人畏者非福秀性溫厚識力超卓邑中大事如乞免升科清理學基攻訐冒籍皆不辭勞勩倡修康樂福壽二橋遺德在人子洪宇九疇號思補中

第五名武舉負性磊落以學基事未竟復與汪朝祖終其事卒成父志孫大賚有傳大猷甲辰歲饑與陳池鳳勸捐平糶全活者眾又倡建合族義塾大鼎大呂俱文庠曾孫鳳魁英鳳舒並以武舉官城守元孫光騰武舉

龍長蕃字嘉言歲貢生幼孤勤學居常嚴格無慢容遇事多卓識喜誘掖後進訓導玉山課士勤懇無異家居解組歸知縣朱崧舉鄉飲子學川字錦瀾家貧好善嘗節學俸廿餘金給澄渡船費晚年選餘干訓導未任卒

袁建中字致和以舉人應乾隆丁巳會試得乙科選廣昌教諭文廟前臨江有沼底滯有力者居其上以居貨而納其羨廟規漸隘

江漲或漂民居以去則謀於守土者撤之學使趙按試撫建試博  
士置第一批其文謂如富人擁厚貲不作一寒儉語知縣黃思亭  
以廉失官倡諸生償所負而歸會歲饑署知縣趙商所以濟則單  
騎走烈日中勸士民得米數千斛趙初於城隍廟以粥食饑者羣  
相聚噪則澀語開道之翼日分賑四門按丁給米終事不擾甲子  
應聘校文夜分未寢典試者歎其勤大吏以上考咨赴禮部以母  
春秋高陳請終養壬午行取以知縣用則速催不起矣子廷鰲有  
傳新編

袁寬字繼安廩生英敏好學磊落不羣喜藏書流覽甚速爲文暢  
所欲言浩氣流轉建桂林書院延名師訓勉與同志議建文塔中

阻因購基以俟邑中公事就商者坐常蒲邑乘崇文堰諸役皆身  
與其間病革時猶以堰工未竣爲念年四十五曾孫開慶有傳參前志

王嗣立號銀山舉人家貧力學有文名知縣嚴在昌聘主龍山講  
席多所造就時院中膏火不給慨然出館俸助之諸生勒碑紀其  
事參前志

汪朝祖別號敬亭愛讀有用書年逾五十登拔萃科於一切世味  
泊如縣中有大利害輒借一言以爲重知縣施昭庭將修學宮得  
大木數十株忽水漲飄沒翼年有鄉總甲以盜木被竊報縣拘其  
家屬則前謁請曰樹久竊必毀今如故果真盜乎訪之則水落自

沙中出是冤乃太白雍正元年縣境有警人洶洶逃知縣獨留之  
與贊畫卒無事嗣大府檄下欲復舊荒糧額則奮然曰此萬載世  
患也乃呈於縣而府而院司皆不許知縣汪元采屬爲清理則率  
同志二三人冒風雨寒暑遍歷荒山窮谷將一切水擁沙淤不可  
墾種者據實呈報乃免其他有墓志銘在不悉書

辛汝勳字翼侯性聰穎肆力詩古文詞兼工行草求詩與字者日  
踵門勤口吟手揮落筆飛騰才思敏捷流輩罕及以拔貢選宜黃  
教諭端己訓課多士傾服數年告歸著有丹崖集藏於家以後俱參

前志

張崇德字柔嘉拔貢生任南城訓導甫蒞任見聖廟兩廡傾圮捐  
貲修葺復築數椽學宮右爲諸生講習所賴陶成者甚多今遺跡  
尚存

辛琿字璵璠善居積勇於義行卹孤賑饑臺臺不倦任杭州稅大  
使清署基建公廨兩解京餉題辦北新鈔關事蠹弊皆絕爲沈春  
源等請減科稅商人爲立惠商碑十載告歸爲善益力四舉鄉飲  
年八十三卒子衢例授州吏目性伉爽義聲四溢邑議修學博士  
齟齬不可衢商首士召匠立撤晉寢役遂舉承父志修龍江石橋  
糜金累萬制軍高嘉之檄縣請議敍固辭不受又修虎塘王家山  
橋家以好義故田產幾盡終不悔孫炳喬有傳  
汪有燦字繼明廩貢生候選訓導有學識嘗出已田爲堂兄立後



邑有興作及賑卹不惜傾囊倡崇文堰築復圯借同志修捐金二百有奇毫牛尤切觀光壬午乙酉純皇帝兩巡兩次獻詩賦恩賜銀牌綵緞黃衣精光奕奕爲一時人瑞

劉大瞳字東上邑增生樂善好施修丁家橋捐金數百爲倡前後獨建石橋四甃大道路不計大埽腦有古墳鄉某利其無主欲毀爲厓基瞳力止之里人有貧出妻者予以貲得復全又助修文廟年七十卒孫馨蘭曾孫英俱武舉玉璫歲貢

聞俄字百千邑庠生莊重寡言笑以利濟爲心竹渡橋圯行厄於渡思獨力修復而財不逮因偕牟村辛金壽於古橋下游合力捐建計金萬餘視舊制加擴焉

周繼德自祖爰試分產讓肥父志垣與叔父志翰合產無間至繼德克承前志長幼百餘口同居共爨延及六世家規整肅子姪各有本業每食內外設廣席尊卑序坐未十歲者設小席亦分序列相揖讓有一未至俱不先食乾隆五十年題旌建坊祀爰試忠義孝悌祠舉人樹贊其後也

辛金壽字天賜慈祥好義乾隆間偕開儀修竹渡石橋偕姪家松兩修牟村大橋獨建店前潯陽橋癸亥歲歉出穀數百石貸貧者不責償壬申乙酉屢減價平糶歲施棺木棉衣無數紫蓋庵洪塘庵皆割產助香火爲族長捐買屋基擴宗祠倡族雜公米生平捐金粟數千舉鄉飲年八十六卒以子家柱急公贈儒林郎孫以真

官典史

辛家松字煥榮捐州同職善事寡母好義與金壽同如葳竹潭橋工歲施絮襖倡本支平糶所費不貲牟村橋兩修後道光二年復決松孫東文等出金二千餘承志繕完子樹橋郡庠樹綸官縣丞孫從雲邑庠前志附金壽傳

李啟華字紹尹郡庠生以方正見重鄉里時周窘乏或借貸不償卽焚券聞鄉人黃某將鬻妻給銀穀贍之遂止又捐腴田百餘畝爲族祠祭資將建青溪橋以通要路會病卒子貢生泰洵卒成之計費千餘金曾孫宗彝舉人

楊維鏞字金奏少負才名勇於義嘗捐田十六畝助龍河膏火焚

近城道路倡修龍河浮橋子之洵有父風歲饑偕同志買穀以濟倡建文昌閣筦理學事備矢公慎偶因公事貸多金鬻私產以償合學頌之次子叔度以孝聞性和而介讀書自娛非其人不交與之洵朝夕怡怡構書室延師課子弟凡公事非關學校不與聞考棚實與勸輸有九年八十五卒

郭邦城字宗國邑庠生性端嚴然諾不欺邑有興作如遷建文廟修文昌閣築崇文壇多倚賴之乙酉歲饑倡捐平糶在宗族倡建義塾助支祖祀產又捐田爲族人立後教諭趙由義稱爲好德不倦孫定基附生曾孫有勳武舉

汪發楫字濟川爲名諸生具才識勇於義建文廟遷書院皆身任

其事究學事多年嚴杜冒籍跨考弊至鬻已產償訟費合學稱之  
居涂泉與辛廷芝詩酒往來嘗偕李榮陞遊廬山附糧艘入都到  
處題咏看有魏峯詩草藏於家

郭治清字季淑邑增生出嗣叔父事所後節母孝養備至請建坊  
敦品積學羣倚爲重時邑諸廢未舉如文廟書院崇文堰建徙修  
築事宜悉邀同志倡督之常公講堂圯復偕貢生辛汝岐捐建學  
宮石家非素封而勇於爲義知府陳廷枚額獎焉子先植廩生光  
笏有傳

鄧鉉字振永優增生博學有才識尤慷慨好義乾隆十八年捐百  
金倡建文廟二十二年助修上諭亭訖崇文堰工遷建吳公講堂

重新城隍廟修花塘橋皆捐金爲倡巡撫吳查丈檄下意在調劑  
瘠壤邑中田則歸一久已相安查丈事旣紛擾科則一更且慮溢  
額鉉集紳耆呈縣府申詳并捐幹辦費得以照舊徵收性好梅嘗  
仿芥子園梅譜寫之筆意工妙自序梅花十景詩傳世子斯淑文  
庠

周繼盛字景中庠生醇謹厚重居家孝友內外整肅承筭學事公  
慎白矢乾隆初遷建學宮鉅細經理不辭勞動工竣捐田三百七  
十把爲贍學費又捐田百把助龍河書院膏火子南歲貢選新建  
訓導未任卒

王都毫字正萬號兩山舉人父三顧增生贅饒田瀕江路叔父三

掄歲貢並修行明經相師友訓子弟嚴毫昆季九人同列鬢序時  
稱九萬齊飛毫尤傑出爲文廉悍得力柳州半山詩歌描寫性靈  
機趣洋溢旁及醫術地理家言勇於義倡建文廟振興宗族孫廷  
輝文庠參前志

王都建字封萬號南星都毫弟歲貢生品端學邃爲知縣嚴在昌  
教諭魯鴻所器重擇董學事建文廟移書院減童試卷價興鄉會  
贖費請收折兵米皆著成勞年登耄耄兩舉鄉飲子昌期廩生昌  
仁有傳昌義歲貢昌信昌命俱文庠

王都會字同萬都毫弟郡增生篤行孝友洞達機宜縣公事恒倚  
成知縣張重之造廬語不涉私嘗倡復龍河浮橋並募貲置產爲  
修葺計見中丞陳榕門序後辛衢建石橋將其產歸吳公講堂資  
膏火于介眉歲貢辨義持正同輩欽重孫廷幹廩生

巢起岐字天作號西堂魁偉健啖有勇力縣府文武並試適學使  
先武遂人泮中鄉榜官淮安衛千總署大河衛守備生平放情詩  
酒閱臨古帖於易義尤邃袁鴻臚芳松嘗延課其子著有西堂詩  
草

辛廷芝字秀圃號畹堂舉人善詩古文詞書法亦工邑子弟多所  
裁成地方大事如移建學宮修郡志皆倚爲主裁任金谿教諭勤  
於黼黻以就試無館倡贊建之迨歸老諸生奉衣緞祖行題曰世  
範人師著有周易四書解作文譜詩花草梓行子士晉歲貢恩賜

舉人孫徽汪洋俱文庠

辛汝岐號敬亭歲貢生性醇謹不妄交游知縣楊長佐雅重之勸之仕答曰教官亦宜勤職姑守吾疎慵家頗裕柴田福壽橋圯獨力修復行者便之遷建文廟常公講堂皆出百金助又割田四畝助吳公講堂

郭吉字敬勝號謹齋監生喜讀通鑑論列得失壘壘不竭以商起家勇於義凡造橋發路捐助不吝尤惓惓於學校歿時囑諸子葺崇聖祠助賓興費及義塾膏火計二千餘金大吏以建坊題請旌表樂善好施子如棠如崧俱武舉如崧官守備署台州衛減徵糧價民德之署濟寧衛值滑匪亂後招撫流亡給賑有法爲上官所稱如泰有傳孫剗用中壬林俱文庠曾孫春熙舉人

劉景暘字定翰監生天性純篤幼孤貧採薪養母以孝聞積勤致富慷慨好施每歲暮察鄉鄰乏食者予以穀不取值凡邑中義舉如置渡施棺諸局莫不與郡守張五緯額獎以樂善不倦易簣時以義行勛諸子三子崑捐金千餘建郡院試棚賓興堂起諸孫捐田四十餘畝克承遺志季子時耕見藝文傳曾孫文毅有傳

龔雲飛字在遠號翥軒聰穎力學從楊維鑑游嘗終夜不寢師見其體弱頻戒之不少止入泮時縣府院三試皆第一乾隆庚午舉於鄉名噪甚下第歸旋卒年甫二十八人咸惜之

巢起崑字有源號滙堂由拔貢中副榜選金谿教諭病未赴學深

宋儒家言而胸次卓犖人樂親之邑宦達多出其門素不輕與外事然如遷建文廟及吳公講堂咸倚重之著有滙堂文稿子飛鵬文序孫象彰舉人

李榮陞字質基號厚岡幼穎異稱神童乾隆進士知湖南永興縣有政聲內艱服闋挑發雲南署雲州攝緬寧通判京銅差竣補呈貢以案罣議仍發原省署恩樂補嶠峩宦滇十餘年所至修義學獎人材民不忍欺屢校鄉闈所得皆知名士引年乞休當道延至大理書院一時文風丕變生平嗜學於書無所不窺攷論折衷出以虛公實有先儒所未發者著有易攷尚書攷四書細論地理攷三皇彙攷古今體詩文集江督費淳序梓行世禹貢山川攷學庸攷年歷攷論孟類孔孟攷孟子攷濟水辨國風解地脈地圖說遊歷稿運銅記滇南花卉記沅江三錄諸稿藏於家三子光亡監生古道自持精形家言尤通六法年逾七旬襄輯志乘釐定境內山川脈絡并廟著書院試字俱手繪圖瞭若掌文

龍鳳祥字文彩號順齋資穎異讀書麤腦山房經史子集畧皆流覽而不屑爲章句學詩古文詞悉行逸氣與同邑李榮陞齊名一以學力一以天資書法見重於時旁工篆刻由舉人官雲南知縣叙緬甸解餉功擢知賓川州尋因運銅舟覆望吏議卒於伊犁戍所著述散佚僅郵夢禪詩話一册梓行

張焜圭字輯瑞明德子拔貢方樸山稱其文似李石臺晚年詣益

遂邑人爭就正其學以盡心養性爲要嘗曰言行循天良勿務穿鑿使是良知良能許大事業俱可行所無事和友云歲月消磨仍故我性情怡養見真吾可想其梗概邑有公事每贊成之而不身與其間餘詳墓志子作翰歲貢

周曰櫟字啟之有過目不忘之稱士多從游以歲貢任鉛山訓導與諸生講明經義月課必親批閱文風爲振兩廡頽敗捐貲倡建鉛人頌之解組歸出館穀捐修祠宇不干外事比卒惟以力學囑子孫

宋嘉麟字鴻作庠生孝友出天性家無擔石事父母菽水盡歡親歿兄弟五人分謀衣食有無共之每臘歸必歡聚祠內購薪作食

促坐合尊風侵敗絮擁爐爲樂新正乃散幾忘各有室也撫軍吳紹詩以世誼故欲賙之辭友人爲構松莊以居日事著述翛然物外善誘後進及門多所成就

喻士標字名魁號南亭監生乾隆間任安徽歙縣丞委解甘餉大吏稔其能檄攝邑篆有聲告病歸捐金三百二十助建學宮四百餘金倡建蓮溪南園石橋乙酉饑復出金百餘減價平糶年八十一卒

郭如岡字鎮南郡庠生事繼母以孝聞喜交文士遇人緩急無少吝乾隆乙酉甲辰大饑捐金三百倡平糶邑公事如葺崇聖祠建郡縣試棚修廻瀾萬歲等橋前後捐輸千金族構義塾復捐五百

爲倡又出貲奉其祖配享祖廟支祠祀產有典賣者捐貲贖回族  
姪開英滯京師贍其家十餘載迨挑發陝西猶時郵金爲旅費家  
庭中讓肥分硯嘗以義行訓子孫次子樹藻庠生四子樹芝附貢  
捐建文昌宮千金有奇居九家之二又捐助寶興俱克承其志云  
孫爾元文庠

辛樹人字民安幼英確嘗受知知縣嚴在昌試藝傳播李進士榮  
陞見慕之適入城壽其舅張客且闌屏營門外曰吾待晤辛君也  
欽遲不至悵然久之隨父汝獻湖口任所師友如名進士黃椿榮  
曹天瑾周仁棟爭愛重之邑教諭曾鴻得其文詫爲縣所僅見年  
近艾始補諸生已而引例貢成均非其意也始其父督望勤至自  
維兩弟列宮牆父皆及見而已獨後卒時遺命斂以藍衫將服以  
見先人至性過人於所生造次不忘生辰茹蔬果未嘗受觴酌風  
尚節儉家稍豐被服仍布素或以華美進曰吾非不辦此然先人  
所未嘗服也吾何安乎先是汝獻以再從某支將絕嘗一再爲  
之婚以有遺孤至是徵甚乃復爲授室有五子焉生平不以絲粟  
累人每開歲市人所登售物主者於册必首其名以爲吉利家世  
衿佩自以困小試課子尤切孩抱時卽令徧識壁間字諸平仄  
對偶暨破承未入塾已習之稍長晝死事於外暇卽口授經注古  
文每隨行侍立伴卧輒令背誦稍偷渡輒覺故諸子並以幼敏聞  
教使然也子又曾以縣首入泮炳晟從益並有傳以從益貴累贈



資政大夫

盧謙字益侯邑增生敦行孝友親喪守家禮不作佛事兄艱嗣爲置兩篷室因得子嗜學能文著有益侯稿屢薦未售至老弗懈壹志以詩書貽子孫彌望日囑以所遺莊田二十餘畝爲賓興公資子爾彬爾彬克戾其志孫毓奇有傳

辛家棟字德輝貢生性仁厚仲弟無嗣以子後之季弟歿撫其子女均以已產堂兄弟貧者分與田宅百餘畝又爲堂姪擇配給以產外舅李無子畀田宅爲立繼戚某親老負逋謀出妻代償且周之使完娶乾隆庚子饑以錢穀賑其鄉復出粟千餘石平糶族建支祠捐金六百戴其役凡公事靡不捐輸翕然稱善人分宜舉人趙祓故無素聞其淹滯都門家有老母爲郵金龍鳳祥使歸養趙謝句有云君爲義士原高士我敢今人比古人卒年七十孫鼎亨謙亨煥亨文庠

李珽字德如附貢生自奉甚約遇義舉傾囊不吝歲歉出穀平糶貸難償者輒折券營借同志倡復蓮亭石橋未竟疾作屬其子成之既助修南園萬歲諸石橋認修邱學大成墩門名宦鄉賢祠本族宗祠助田八百把爲賓興產又續修蓮亭橋捐龍洲膏火田先後費數千金皆承其志云孫應忠應恕文庠

陳鼎龍字建侯邑庠生性孝友庭無間言修家廟置祭產建家塾撥義田筦學事九載備矢公慎屢葺學宮增貧士膏火及鄉試費

甲辰壬戌大饑邀同志出粟平糶全活者眾遇邑公事如稟免丈  
田建考棚修城隍廟水府祠及橋梁道路勞費不惜卒年八十八  
以子貴封武畧騎尉後子若孫捐千餘金建文昌宮又襄建武廟  
助賓興產皆其素志

辛樹錚字勝音貢生少有至性友愛弟兄樂交文士家不甚豐好  
施予乾隆乙卯大饑邀同志平糶遠近賴以濟族修祖廟建義塾  
及鄉村橋路諸舉悉力贊成有族某虧社倉穀迫於公議而力不  
足爲代償之僧某爲勢家所蹙出橐金以解年近八旬市貨吳鎮  
過樵舍覆舟同人俱斃獨錚若有物憑之得無恙人咸謂厚德所  
致卒年八十七子聘三有傳

郭世華號禧堂職監生孝友出至性幼失恃祖母逾九旬癱瘓在  
牀服侍左右溲穢手親滌洗無嗣以子後之弟析箸產蕩盡復攜  
同爨割已田以助弟歿撫諸姪悉完娶養贍生平恥涉訟有侵佔  
者輒予之喜接文士構屏山書屋課子姪并倡建石溪書院教族  
子弟積穀濟鄉鄰歲晏減價糶遇荒貸不計償邑義舉如修龍河  
橋惜牛施寒衣助棺鬻路靡不倡捐任其事嘗偕同志置產供文  
昌帝君香火以無專祠囑子出金千餘與九家捐建並倡起賓興  
親見子貴封文林郎年八十四卒太史謝階樹銘其墓于三大經  
有傳大綸大綬俱文庠孫光暹職員曾割田三百四十把助入府  
學資廩生膏火

青華原 卷之二  
宋寶字瑤崑監生父拔武舉能爲制藝嘗捐穀三百石倡立義倉  
寶席父貲而自奉啻每念龍河書院文昌廟皆人文所係將爲修  
舉計會因事羈外歸則齒已暮矣病革屬子海嶠方以甃治橋路  
未暇兼營而卒媳聞氏承其志次第畢工李學使宗昉辛少宰從  
益並有書院記程中丞獎以聯額並題請旌表樂善好施建坊閭  
門肄業生不忘所自白當事立主祀焉生平好吟咏書法宗懷素  
孫壽萱文庠

陳邦梅字春魁監生孝友敦厚慷慨好施嘗出金二千餘爲本支  
建家廟邑葺城隍廟建崇聖祠考棚育嬰堂朱溪柴田石橋本鄉  
真君廟俱捐助不吝遇歲歉出穀平糶晚年撥出遺業囑子孫遇

城鄉公舉務出資助孫彬采字素書監生亦好義疏財適邑公事  
絀費獨出已貲終其局家以之落不悔鄉建龍岡書院猶賴其樂  
輸提倡底於有成士林重之參前志及龍岡捐冊

辛金銳號北墅由歲貢任義寧州訓導品潔學裕啟迪有方鄉賢  
黃山谷祠代蔭一生適嫡裔貧有力者欲奪之金銳持不可州人  
士雅服焉年七十一卒官前志

辛邦佐號紱堂歲貢生八歲日誦千言稍長閱書輒解悟通作文  
法家苦奮日出採薪供爨夜就祖龕燈展讀房兄某嘉其志攜入  
塾叔父某資以膏火益感奮力學知縣嚴在昌拔冠縣試旌以第  
一人食餼自是屢魁其曹詩古文並道勁書法瘦硬有率更風格

擘窠字尤蒼健求者無虛日晚年主講龍河書院多所造就

王昌仁字應元力學能文童試時戲與李榮陞抗手賭第一既而各冠縣府軍以恩貢官峽江教諭訓課勤篤居常孝友偕昆季七人朝夕切劘仁尤端厚多義舉嘗邀同志建因心堂施棺歲饑勸捐平難邑修崇文堰禁屠牛捐渡產皆與有力年九十一卒子定禔至性過人母病截指瀝血和藥以進遂愈孫敬敍歲首生本培賜麟並以案首入泮

辛炳昭字能濟號熹亭歲貢生性純孝事祖父母本生父母及後母先意承志俱得其歡邑中公事如賑饑建試棚修聖廟贖春秋闈皆身任其事筦學產十餘載稍贏卽增鄉試贖費生平廉靜寡言笑中年喪耦義不續娶作文純正類具爲人嘉慶改元舉孝廉方正縣府儒學爭以炳昭應已上大府固辭不赴年七十六卒子紹業孫僕价各有傳

辛錦斐字南瞻號淇園精心計厥業逾十萬由庠生授衛職不仕歷遊吳楚間旣家柝助建蓮溪柴田石橋時掩骼埋胔散給棉衣三值歲饑皆倡捐平難辛氏建義塾出產助城廂內外路不可行者悉贅使平董育嬰堂事院司首額獎之壽八十四累贈朝議大夫臨終以義行囑諸子後出金千餘襄構文昌廟助資興產媼媳郭氏復挈私產助資興及龍河書院膏火文昌香火田得邀旌典建樂善好施坊于朝後有傳朝鼇武舉輝南廩貢復初文庠參前志

及家傳

宋謨策字身修監生性孝友素謹原嘗出金二百修祠宇錢三百緡置祀產邑公事如修龍河橋建試棚施棉衣發路修隄罔不倡捐以子挺職封武德佐騎尉身歿後家日富邑興舉亦日多諸子襄建文昌廟助資興產疏河渠構武廟辛卯壬辰賑饑倡建義豐倉修南浦橋助修郡城及學宮獨構文昌閣統計萬餘金平糶二次米至四萬石子四維新標維顯俱職員挺武舉孫鏞鳴謙樹風文斐俱文庠以後俱參前志

盧爾洛字營周邑廩生有孝行親喪廬墓三年幼承庭訓詩文有真氣與教諭魯鳴邑進士李榮陞陳池鳳講學推畏友年六旬述

學使佑歲試拔第一稱爲老宿梓其文老猶勤學著春秋類釋經史旁通醫卜星莖諸書建上達齋課子姪嘗倡修蓮溪石橋子及暉副貢生及暄優廩生筦考棚事勞績甚著督學王鼎稱其端方及皞孫光榮士珍俱文庠參前志

彭英拔字豈常曾祖明錫嘗拾徽客遺金八十立俟還之以忠厚世其家英拔幼習儒仁慈好善歲製布袴百數十遇露體者衣之見丐行風雪中必給以敝蓋或箬笠所居水口有西江橋修復坵擬易石梁未果囑諸子成之費金千有奇又發廻嶺黃田岡路八里許孫士模舉人士楷士林光斗懋德俱文庠

陳池鳳字鳴瑞號丹山進士少赤貧事祖母及母甘旨必豐授徒

數里外至夜必歸省展衾褥驅蚊蚋俟熟寢乃復至館兄弟衣食  
婚娶一身肩之並取給館穀爲文規撫明大家獨探真際江寧秦  
承恩侯學詩新建熊爲霖序而刻之世所傳丹山稿也又著四書  
廣義多所發明尤善訓誨館南昌黃氏久太史中傑中模儀曹維  
烈夙皆奉爲專師餘詳墓志孫中實舉人鈞韶嗣音廩生宗岱附  
生

郭大賚字喜和號善普魁梧有幹才幼讀書長習韜鈴猿臂善射  
由武舉任浙江澉浦千總升廣西前營守備旋擢義寧都司駐劄  
龍勝鎮地錯苗獯稱難理撫順防逆終任晏然歷署鎮標左營叅  
將桂林營游擊賓川營叅將所莅嚴紀律整行伍值安南不靖領

兵隨征叙功升護義寧協鎮篆引疾歸不預外事課讀督耕以詩  
酒自娛卒年六十八子鳳魁武舉任把總新編

辛文彬字程材號質字舉人歷任四川墊江鹽亭知縣補丹稜邑  
有劇盜史英役不敢捕彬下車設法捕治并窮其黨廓爾喀之役  
大兵過境民若無事眉州苦派累民騷控大府飭州牧倣丹稜法  
乃帖服調理巴塘糧務兩土司以爭坐相攻擊開誠曉諭並感泣  
去比瓜代攀送不絕旋署邛州兼大邑所至寬猛相濟不姑息近  
名宦蜀十八載未嘗駁提一案陞賓川知州擢戶部主事以目疾  
告歸卒年七十三著有質孚詩集大庾戴均元序梓行世

郭開英字實函號霽園岡之子績學能文由舉人挑發陝西歷著

鄠縣扶風事均得士民心郇扶風象父老詣制府乞留格於例田  
逆亂派隨幕府贊軍務事平燧授洋縣治豪猾扶良莠卓有政聲  
未期年以勞卒士民哀之參前志

袁廷鼈字駕山號六堂建中次子舉人任樂安教諭修文廟倡置  
樂庠庄分給諸生鄉會資斧陞撫州教授尋擢福建知縣初署福  
清會歲祲發倉粟賑之復勸邑人平糶全活者眾旋補順昌分校  
鄉闈解首出其門以同安搶鬪檄調署浹旬案皆治辦特調晉江  
同安民詣制軍借寇不許抵晉任益銳意吏治詢求民瘼四載解  
職歸卒年八十四所著有閩王紀畧二卷嚮往篇十卷味鯖集四  
卷藏書紀畧四卷白良山房文鈔四卷詩鈔二卷自良述古錄二

### 卷待梓

聞星杰字羽儀號松園舉人家貧甚事父母色養備至父歿諸弟  
俱幼教讀婚嫁引爲身任性和而介嘗中途拾十餘金待還之座  
師錢延入幕隨試粵西有以關節干者正色以拒官寧都學正以  
讀書端品爲諸生勗卒於署著有敦本堂時文二卷

鄧斯沂字浴儒號與齋以冠軍遊庠試累優等器宇軒昂富經史  
雅不自矜粹然有古儒者氣象指授及門一歸理法性樸實尤重  
氣節有某負百餘金故不償旁聳控追沂不欲以珠彈雀卒焚其  
券有爨夫某負債將鬻妻力禁之偕及門助以金使完聚乾隆甲  
寅舉於鄉留京數載患病歸卒著有與齋詩文稿待梓

辛炳晟字融初號淑郵進士數歲有神童稱或詢以聲韻指示部分無少差長益邃於學六經子史旁及百家靡不淹貫而不株株於考據爲文頃刻千言涉筆便古如周鼎商彝令人撫玩不忍釋卽游戲亦雋雅可誦詩格力迥少陵書法蒼秀得唐人用筆三昧一時名宿如李榮陞新城魯鴻分宜林有席皆目爲國士弱冠應拔萃科學使蔣元益衡鑒甚嚴獨擊賞晟卷五旬餘始登第揭曉後主司知爲西江老宿咸慶得人爲人英明磊落洞悉時務而恒自矜重遇非義侃侃持正犯眾怒不辭著作甚富不自收拾存者惟春秋釋要及詩古文稿時文稿待梓藤石齋墨刻行世餘詳墓志子登瀛彥瑜彥和孫錫榮俱文庠以後俱參前志

辛紹業字服先號敬堂進士博研羣書少時與浮梁鄧傳安齊名學使翁方綱有萬載浮梁辛與鄧說經奪席驚羣英之句旣通籍宦京師十四年日與翁討究經傳訛異及說文金石學翁每立一說必往復商榷以決其信古文胎息韓柳詩追步少陵肄業者經其指授悉有法度以疾卒南學署翁輓詩有云老屋青燈淚誰能贖敬之其慟之如此著有冬官旁求易圖存是周禮釋文問答律呂考九歌解古文詩稿俱梓行古文尙書冤辭辨詩經毛鄭權衡周官官聯表儀禮經注證誤春秋禮存樂存經傳車考古文同聲譜同形譜古字逸義俱待鐫餘詳墓表子价僕有傳僕廩生孫斌有功附价傳點廩生更名鱣揚大受附生



辛炳喬字朝嶽號月臺自幼耆學以冠軍游庠制軍孫士毅觀風  
取第一初居南浦坊不妄交游惟邑人李榮陞臨海黃河清分宜  
林有席金谿王謨數郵筒往來尚權古今繼厭城市於城南五里  
關最秀園著書自娛晚年以優貢入成均大司寇熊枚宗室瑤華  
道人並延主西席道人好吟咏與唱和尤多旋卒於京著有周易  
玉海鄭注補春秋申議注疏刪緯讀胡繩崖通議讀書割正編  
不可不知錄益智糴離騷解袁州舊聞府志叅考讀田間詩學最  
秀園集藏家未梓長子承貽字立圃倜儻有幹材以學業未售游  
京師三十餘年公卿推重事闕郡邑輒以身任凡滯京困乏者量  
爲貲助邑人倚之若北道王選直隸山房尉未就亦卒於京瀕危  
出金千數百命子持歸爲祀先經費及伯叔兄弟媼黨貧乏之贈  
襯歸日多感激泣下者季子承毅孫次林俱文庠  
盧毓奇號鶴亭自幼有至性始家貧就傅母食以好飯而自餐釜  
底焦者奇覺之涕泣不食母與同飯乃已稍長念父苦讀書困生  
計因改業服賈致貲累萬卒成親名娛晚景有五子思承先緒延  
習進士家駮昆季爲專師凡十餘年忠敬不衰諸子用是顯治家  
嚴整而豪俠多義行遇邑大事艱險無所避嘗因某案赴貲金陵  
家幾破卒得直今後嗣熾昌人謂有天道云子文寶試輒前茅銳  
意成父志未遂而歿當祖母李改葬術者謂宜科第不利長房寶  
曰長房卽我也諸弟獲福親志慰吾願足矣力贊成之次廩生文

宜兄歿後任家督體親意課弟姪綦嚴持家規維謹性孝友事父及後母極順愛異母弟無幾微間方毓奇傾家爲友縱之逸官拘其眷口去適文宜鄉試回卽挺身請代母官問若生母耶宜曰均之母也何分前後乃義而釋之次武庠文宏出繼以友難冒險從卒死於外友歸詢其所涕泣而已因招魂以葬此其友雖不足道而宏與人之壹不亦諒哉次煌舉人有傳季文字豪邁而篤摯以兄宏出無的耗身走江淮楚豫蹤跡殆遍迨子昆鑿貴廉俸所餘悉命公之羣從臨安石門並建書院又買地瘞故宦之無歸者居鄉遇義舉必竭力襄成或貸金謀鬻婦還券全之性癖山水自龍州返棹詣獨秀峯覽勝竟日歸舟歎曰造化之奇於粵西觀止矣怡然就枕而逝頰得大解脫者論者謂諸子咸有父風實得其孝宜得其義宏得其俠宇得其豪煌能成其志真難兄難弟云昆鑿有傳新

辛守身字斯申監生三歲失怙事孀母以孝聞待人和夷至事關利害得失則毅然無少徇家故不豐親故以緩急告爲之居間借貸或至鬻產代償改建延順支祠悉心圖度費省工倍修龍河橋立惜字惜牛各會皆職其勞並邀同志置產以贍其後排解紛難執義侃侃愛者心折感人固有自來哉參前志及新譜

母樹穀字廷碩爲名諸生孝友出天性事父母及祖父母俱得其歡心生平端莊自持力行方便訓課及門必以良知良能爲本謂

高書傳卷之二十一  
五經四子書皆闡發仁義禮智而莫先於仁嘗刊感應篇陰騭文  
功過格集驗良方等書皆仁者之用心人咸稱爲善士云以後俱參  
前志

湯舉字伯英庠生父安猷以倡修仙姑橋家中落至舉益窘仍矇  
貲修葺素刊陰騭感應等書善排解自豪某健訟以是非投爲揆  
情度理反復開導事立釋學館爨夫貧將鬻妻偕及門助之金得  
完聚宜春陳某來從學其家忽遭火厄拮据甚爲飲食教誨視若  
已出鄉善舉如修橋施茶掩骼拯溺女無不樂從率皆貧士所難  
子薦馨有傳

辛啟泰字仲和號敬甫原名梅臣少負奇氣折節讀書爲諸生以  
詩文游方伯廉使間未嘗干以私足跡所至喜搜羅金石志乘文  
字事關合邑利害圖之甚力如呈復客額中雖抵牾卒如所請至  
講濂溪書院議拓周程諸賢祠添肄業房舍增膏火虔士頌之由  
副貢充官學教習期滿發江蘇以知縣用大吏知其才檄往徐州  
理積案聽斷明允百餘牘亥第決遣無不悅服歷署睢寧豐縣江  
浦彖所至以風化爲先在豐捐廉修丁蘭祠爲民勸卒於江浦縣  
著著述多散佚惟所輯辛忠愍公集及少作新畬集行世孫師軾  
廩生

汪元英字雋斂號春圃性豪邁作文有奇氣以優貢入都間走齊  
魯山陝所至輒紀其名勝登賢書因北上釀金增置三縣試館罷

歸分編縣志山川脉絡瞭如指掌邑建文呂廟及賓興堂苦無基  
商之族眾首以祖遺地出售賤其值爲眾倡得將餘基次第購就  
素精形家言不輕與人卜宅兆縣城三面環山惟北面平曠無闕  
軸倡建文塔以培風氣大挑自注就教署奉新訓導造就有方母  
訃奔歸急謀窀穸搶踣風雪中葬母踰月哀毀卒所著詩古文秦  
游草藏於家子良徵煥然孫敷德俱文庠

陳鴻翥字夢龍號拙甫原名池鳳幼機警喜讀書從伯兄池鳳習  
帖括盡得其規矩而能出以變化構藝敏捷名噪甚省會宦達家  
爭延爲師中鄉榜第六晚就東鄉教諭勤於訓課於艾千子後尤  
加意焉東鄉士多寒畯新生上謁從不計脩金齋厨蕭然自若也  
洎卒官無力治殯具賴同寅及門致賻得歸喪著作散佚惟課徒  
草行世

鄧錚字金和號古愚附貢生績學有聲受侵侮不校好施予先後  
歲饑贍族鄰穀二百石有同學負逋甚蹙出囊金三十償之族無  
力聘娶者爲之完配佃鄉某貧欲出妻贈金止焉遇縣公事隨力  
贊成年老猶切觀光兩邀恩賜得國子監學正卒年八十  
袁振藻字素先號繪甫幼穎異日誦千言爲文性靈灑灑以幼童  
應試兼覆經學使曹器之入邑庠藻外和內介涇渭分明遇非義  
之義毅然不惑邑公事咸倚爲重始於建考棚與同志悉心籌畫  
督工購產畧無虛糜餘如修邑乘創白良來秀塔及一切鄉族公

項罔不待其經理終於構賓興堂倡率勞瘁未竣而卒生平服膺  
學吃虧之語家難屢遘處之泰然而方便時見於鄉黨于豫慶晉  
慶孫元雋俱文庠

辛萃字永之號德生幼聰俊讀書目數行下作文自出機杼時有  
豪氣耽吟咏擅古今體屢見賞宗匠肄業豫章所交盡知名士兼  
通繪事染指作梅竹尤冠絕一時丐者無虛日登賢書兩赴春闈  
遘疾卒著有環碧山房詩集東鄉進士艾賜爲之序于晏文庠  
鮑啟倫字肇庭職監生性好義倡施棉衣局獨力經理者十餘載  
善舉如惜字惜牛建廟宇修橋路靡不樂從瀕危以力行善事屬  
于鍾瑞後偕九家建文昌廟助寶興辛卯壬辰倡捐平糶助田聖  
誕會創學宮土地祠蓋克承素志云

辛從益字謙受號筠谷以二甲一名進士授翰林院庶吉士散館  
轉編修充國史館纂修嘉慶戊午典試福建充文淵閣校理教習  
庶吉士辦理清秘堂事兼翰林院撰文遷江南道御史巡視四倉  
疏改順天鄉試章程駁刑部秋審悞入辛酉陳情歸養承歡之暇  
造就後進服闋補河南道御史轉掌四川道升吏科給事中轉掌  
兵科居諫垣三載封章屢上如條陳聞見則發州縣之貪縱長蘆  
法碼案則評大學士勒保之不迴避請申明國體禁言步軍統領  
之不平允綸延擱賊報言東撫同興之昧事幾請詳慎甄別則斥  
督撫之徇私任性請飭查收養幼孩則摘兵丁之橫擄平民與夫正

文體一疏酒商盤剝運丁一疏戶部書吏婪索一疏又於當日主  
司督糧及部中堂司俱有關礙以故忌且嫉者眾而廉潔端謹無  
瑕可摘睿皇帝實深知之朝上夕報可雖明旨已行者亦屈已從  
之大臣那覆奏幼孩事至有朕先引咎之諭孤忠上契何其盛也  
乙亥升光祿寺少卿台見詢及邪教從益奏正教昌明邪說自息  
教匪以利相誘今得官者不問風俗淳澆惟計缺分肥瘠官自營  
利何以訓民欲正人心宜先責成司牧者帝聽之即有旨通行訓  
誡升通政司叅議內閣侍讀學士簡放山東學政校士謹關防嚴  
塲規弊絕風清所取不一格而必衷於理有不率教繩以法州縣  
擅辱生員嚴批交辦甚則叅革如在平章邱諸案嶽嶽見風鼓尤

加意先賢遺址及後裔清理宗聖書院匡扶有氏博士封禁蒲留  
仙墓道士論翕然任任擢通政副使光祿寺卿差旋稽查東四旗  
覺羅官學道光元年辛巳擢太常寺卿壬午升內閣學士兼禮部  
侍郎閱廢吉士散館卷新進士覆試卷時江西巡撫毓岱有官理  
穀當奏因疏言其弊爲富民害者二爲貧民害者二後竟停止命  
赴陝西查辦案件渭南民挾財勢殺人審官受賂皆論如法奉旨  
細心研鞫秉公持正可嘉之至陝西買馬成爲民害復命時向陳  
其詳得清查矣未充文淵閣直閣事武殿試讀卷官升禮部右侍  
郎脩通禮多所更正甲申兼署吏部奉送實錄聖訓尊藏盛京祇  
謁三陵勘工收租事畢轉左侍郎旋轉工部視學江蘇使署在江

陰薪米供應向取給於縣獨峻却不受壹用民價自買又革拔貢部費裁節孝請區實厥懷挾親校閱止文體一如在東省時以奏駁收潛章社與督撫意左公事頗多齟齬然文移往返寓書辨駁伸士氣抑吏權動灑灑千百言以謂指陳時事太過待士子太偏不顧也丁亥轉吏部因病疏請開缺遂卒年六十九華亭江陰等縣多立主祀之生平孝友性成父晚年患癱便溲常親滌風日清朗則背負以出告歸養母每事先意承志事仲兄以節禮宦情素淡貴要門罕通刺惟與同志唱酬評閱就正詩文爲樂天懷坦白官政和衷然遇非理事止色力爭不爲權要屈承成皇帝溫諭爾人甚樸實無揣摩亦無希冀可謂特達之知矣爲文自達所見筆

力蒼秀動與古會賦與四六俱大氣磅礴格律謹嚴詩學王右丞閔取法溫李晚更喜杜韓書法宗顏清臣動必以正所著詩集文集駢體集奏稿館課偶存公孫龍子注刻行子桂雲侯選訓導師雲辰雲鵬雲各有傳孫履閑文庠

辛朝俊字思蒼號敬亭少聰俊喜讀書銳志仕途遵例報捐鹽大使補山東富國場場素疲設法調劑產鹽溢常額私販殆絕尋捐升知縣分發廣東委審積案多平反上官才之使署陽江劇邑也到任革陋規訪訟師猾吏裁以法訟風頓息將及代制軍百齡過境士民請留三載乃卸篆委丈順德香山隙田劃界定賦兩縣帖然隨制軍出洋擒獲海寇烏十二適張保仔投誠並委審辦被裹

肱者悉開釋署澳門同知卻供帳鎮以清靜民夷相安無事去之  
日洋賈攀轅羅拜歷署嘉應通判開建陽春電白長寧各縣事所  
至清介自持以振興學校爲務尋補普寧城內河道火淤爲捐廉  
疏濬民甚便之審斷逾勤間搜積案賴申雪無算循聲較陽江尤  
著調新會未久告養歸侍奉喪葬如禮遂不復出修縣志知縣衛  
鶴鳴屬董捐輸倡捐百金身走各鄉勞怨不避構文昌專祠建武  
廟及先代殿疏河建閘皆首其事計費不下二千餘金邑起賓興  
率其弟姪輸金亦二千餘生平孝友睦婣出於至性母病衣不解  
帶月餘友愛諸弟撫諸姪成立外侮以一身肩遇親朋告乏極力  
周給或稱貸以助卒年六十七子輝南候選訓導輝祖山西候補  
典史

唐錫鑠字廉持號松士幼失怙恃偕弟讀書家塾而性豪邁不屑  
屑經生業喜談宦績亟思建白值川楚教匪滋事援例報捐縣丞  
分發陝西時關右賊烽方熾人多裹足獨喜躍就道大府奇其材  
命馳赴漢中襄理軍務兼府照磨事改署南鄭青石關巡檢擒獲  
首逆苟朝九以其功上於朝升褒城知縣政尚坦易惟遇豪右則  
懲儆之愛民如于民亦戴之如父母在任四載因欽差需索站規  
案鑄級離任仍以擒首逆有功於同議十數員中特旨開復誠異  
數也接著洋縣澄城俱有聲尋補興平到任革陋規清介自持時  
瘟疫流行巡視民間疾苦捐給藥餌口糧不假胥吏手賴全活無



算若常與民休息第循循拊勉不施鞭扑教化自成調任咸寧首  
縣有兩大姓爭訟連年爲平其獄事後各餽千金爲壽拒弗納有  
富室某化以千金丐丐其喪堅弗往爲擢留壩同知地介萬山中  
民少習詩書且不諳蠶桑利下車捐建留河書院并分設義學七  
區延名師督課教民植桑多者給予優獎又以其時勸民力學習  
禮讓禁嬉遊如家人父子偶西陲不靖大兵過境供帳籌備民若  
無事爲人坦白和夷內行馳篤友愛幼弟撫諸姪皆成立遇親友  
緩急無或吝故沾溉者不少仕三十餘年歷官七政廉而不苛明  
而不擾惟農桑學校爲務留壩士民於歿後請王入清官祠不忘  
其惠也卒年七十五以親歸葬于藻次若馨俱候選縣丞

唐錫純字軒年增貢生幼失怙恃能得祖母歡讀書穎悟以案首  
入泮志益勵務根柢學尤潛心義理爲文揮灑如意多所闡發生  
平精明渾厚有熱腸族維畿一支獨微爲經理調護得復振享堂  
祭產經其會計祀益腆有餘羨資均惠耽吟咏工繪事山水有石  
谷子筆意然矜貴不輕爲人作作必自題韻語子溢舉人孫朝棟  
廣東太平巡檢以後俱參前志

盧煜字位南號小山性敏爽讀書如有宿悟詩古文脩然遠塵氛  
肄業豫章名流推服居家孝友無私蓄倡建祠宇受貸累不計遇  
鄉族紛爭力爲排解或出橐金彌縫之登賢書適丁母憂未計偕  
襄輯志乘釀賓興費甚著勞績服闋北上經臨安留姪昆鑿著董

建錦城書院兼課其士卓有師範疾卒以櫬歸士林惋惜之子昆  
鈐文庠

李以正字守中附貢生性醇恪敦善行砥礪廉隅宗祠支祠就傾  
頽挈金千餘倡新之四邑移建郡學邀族兄珽子合建大成門名  
宦鄉賢祠其門樓圍墻則獨任之知府鄭鵬程議擴試院又認修  
亥棚并大堂邑考棚武廟之建悉樂輸集事及五區起寶興捐田  
千餘把他如慈溪神山白沙萬綏朱溪富山諸橋或獨力創構或  
捐貲助修其餘贍渡濟渴平糶糈路統計萬金有奇以樂善好施  
邀旌典生平孝友家居風節自持不輕入城市道光元年公舉孝  
廉方正恩賜六品頂服優養林泉臨歿猶囑子楨貯粟備荒云

湯薦馨字顯宗號馥堂嘉慶戊寅恩科舉人幼聰慧力學尤工制  
藝髫齡列諸生試輒高等山陽汪文端公廷珍邑先達辛少宰從  
益器重之居常恂謹身若不勝衣而引義慷慨時見仁者之勇其  
授徒擇人而教先器識後文藝故經指示者文皆有規矩無跡馳  
行以鄉距龍河遠倡議建龍岡書院教三區子弟并籌大小試贖  
各區立義學自是始四上公車挑教諭壬辰文已入彀因別房爭  
所私卷見院旋歿京邸合郡惜之子光裕文庠孫祖培文庠祖蔭  
舉人

李明善號復初縣學附生父歿廬墓哀毀骨立母迫之返母歿遺  
命戒之其後遇忌日嗚咽不飲食與人交回折其過改則稱道不

置家不豐而好周急爲貧宗完娶爲困罄全節不一其事又以常  
平倉宦害多而利少乃捐穀置義倉眾爭效之尤遠見也新編

郭大經字緯之號星嶠始出副貢取教習官奉新教諭有惠績載  
名宦旣成進士任安徽太和知縣時邑新改繁缺稱難治下車先  
除民害嚴捕緝法河南盜首蔣魁與其黨潛入境卽捕得自是好  
宄屏跡尤重文教書院月課必親臨公暇則進諸生講學論文媿  
媿不倦士因知白變無涉訟者捐廉濬白洋湖一帶溝渠窪地悉  
成沃壤聽訟明敏到案卽決無羈留有神明父母頌嘉慶庚午聘  
入闈所得八人皆江南名士母憂去任士民傾城出送有隨至賴  
上霍邱者接丁外艱深懷止足改就教然才高意廣必在必有以

白見補南康教授抵任卽出百金倡紳士葺學宮凡聖殿各祠署  
齋煥然一新費不足復倍捐以葺功又倡濬蓼花池水口歲登穀  
數十萬石民立主祀焉創編星子邑志修宋儒劉凝之墓壯節亭  
冰玉堂甘烈女墳皆躬任其勞爲鹿洞監院修院舍清洞田請於  
漕使歲增膏火五月肄業者賴之歸里主講郭氏義塾十餘年多  
所成就至修邑志徵引博贍一切義舉具詳墓志邑大興作幾無  
遺焉性孝友父患危症寅夜走數十里延醫診視又遠步武當祈  
禱病遂瘳攜兩弟共讀儼若師友倡構曾祖享堂撥產爲伯父立  
後從叔父遺一孫爲翼而長者兩世卒年七十九著有詩文集制  
藝偶存四書細錄待梓子光昕光昫孫傳曾自超俱文庠拔貢友

梅其後也以後俱參前志

高湘文字位慶號鑑浦舉人家貧力學以能文稱學使仁和趙公佑尤器之兩主講龍河書院孜孜啟迪性孝友篤宗盟始族人散處各鄉無所統一始祖蒸嘗亦闕與同志多方糾合創建大祠於城內又以木支郡城試館公諸合族自是羣情大和任弋陽訓導教士勤懇主講龍河時又捐俸倡修學宮考舍及謝文節公祠士翕然向風卒官崇祀德馨祠生平耿介自持公事罕預然當大利害執義侃侃不爲眾勢屈著有文集待梓子樹桂樹梧文庠

袁開慶字平階少孤稍長肆志於學尤長於駢體旣以拔萃舉於鄉辛少宰督學山左江蘇兩與校閱大挑選安遠訓導造士有方謙抑善下文風丕變學宮考棚書院一時創建卒官喪返傾城走送有泣下者生平於事有不可者折以義理湯馥堂巢繩齋兩孝廉客死於外經紀其喪旅櫬得歸嘉慶丁卯戊辰間眾相闕獨守師訓折眾論有吾道干城風焉

辛聘三字華國山館班發江蘇歷任新陽江陰溧陽金壇典史署武進縣丞升東山司巡檢勤於其職在金壇最久績亦最著事到卽決民以委捕廳爲幸巡邏尤密盜賊賭博一舉輒獲奸宄屏跡市肆晏然歲祲勸紳士出粟煮賑爲分廠部署日夜監巡民沾實惠道光三年水災倡義請蠲卹縣令以無成例難之聘三面稟大守情詞愷惻守爲感動得請壇民謂邑灾有賑自是始升任時

士民上屏幃行祖餞者一月不絕近來雜職中所僅見也尤篤友誼始供事內閣族少宰公方應舉子試爲莫逆交泊少宰泐吳尊卑闊絕情分無渝凡吏習士風內外積弊言無不盡卒年八十塋蘇州以後俱參前志

郭如泰字慶宗由附貢考取校錄官長蘆興國場大使塲籍遼散丁疲徵收數緡前任勸課悉叅賠補性慈祥不忍施敲扑虧愈甚屢墊解解任時積串四千餘紙或請爲交盤可取償後任泰惻然曰此貧民也付後任將操切從事其何以堪且吾旣憐而紓之又以取償故使後任迫之謂初心何立取串付火灶戶聞知皆感泣嘗書座右云養心莫善寡欲爲政不在多言可想其廉靜考蒲保

舉知縣引疾歸生平敦孝友謹言行葺崇聖祠修考棚皆身任其事讓產焚券周負振乏隱德甚多而尤得力於養靜處事安詳雖遭橫逆無忤容築室數楹題曰安雅朝夕課諸孫其中所往來皆文士開樽瀹茗清談而已容退手四書孝經或先儒語錄涵泳其義倦則閉目靜坐有攤書消永晝兀坐養餘年之句卒年七十九孫功俊廩生功溥文庠功敘優貢直隸試用知縣

辛師雲字京孫號芝生從益子進士官戶部貴州司主事幼穎慧八歲能文十六入泮父授以古文詩賦駢體諸法出筆便成規矩書於經史外天文律算兵法刑名家言皆能明具大指久隗官生年近強始以民卷魁鄉榜聯捷兩宮父歿未久朝多故舊爭欲致

之詞館領僻居蕭寺不通一間致朝考見抑是科分農部二十二  
人名次居首又將考軍機座師穆相國期必致之乃松旣懇切亟  
歸省父執交誼不顧坐是序資獨後未補缺終在官鉤稽精核而  
務存大體堂官倚重既主本司稿兼派山東司井田科捐納房事  
皆劇任也積勞致疾卒前一年南書房求工大字書者相國獨  
喜師雲書欲援黃尚書供奉例使具所業進以跡涉捷徑婉辭焉  
生平瘠已肥人遇急難不惜典質從知好在京病故者皆率先厚  
賻邀同輩贖金以歸其喪若眷口急不得歸則別資以月費故知  
好有急必首叩其門至誠待物視人事如已同鄉一切倚辦即外  
任有半回識者當疑難造請莫不壽畫周詳故知交日廣心力亦

日瘁至其撫姪如子待同生無畛域培祖墳助寡穀為疏族延宗  
二為窮戚舉殯三自未達時已然著有勸補拙齋集

辛元辰字伯坪文彬子弱冠游泮屢薦鄉闈乾隆甲寅卷已發刻  
卒不售乃援例貢太學隨宦入蜀謂餞者曰此行無它願勉成親  
名以無負知己歷五任以耳目發摘奸伏父以循著稱任巴塘時  
留宸護眷口嘗獨策蹇省親好事者為繪塞省圖歌美之歸里後  
卜築白良鄉以時迎養父愛其山水樂而忘老名流復為圖咏所  
謂青陽草堂也為人剛介而俠意所不然面斥無少徇士有文行  
譽不絕口尤篤於師友嘗問關數千里揭重貲急難冒疑謗不辭  
論者以為諒素喜吟咏好賓客家雖落招朋觴咏自如族少宰視

學日有所贈悉以父名贈賓興晚年族推耆宿事必咨詢達房建  
止公祠自展發之止公族之凡無後者冬祭後輒展祀焉合於陽  
厭之義有詩集待梓子培慶孫承枯俱文庠

李宗彝字迎祥號黻堂舉人性穎異鄙爲章句學詩古文詞皆敏  
贍處家孝友爲族長以嚴正稱雖貧樂引人爲善鄉中義舉若建  
慶豐倉修運溪橋並勸力捐先是兄宗漢善居積歿嫂氏楊出貲  
創義塾教族俊捐龍洲膏火建六百橋彝實贊成之俾邀旌典計  
偕兩次以足疾絕意進取旋卒

楊眉字蘇門郡庠生幼聰敏八比外兼詩詞三試不售絕意進取  
一意養母訓弟家有小樓除爲讀書所母龍素勤紡恒至宵分與  
眉約夜讀以車息爲度兩弟相繼爲高才生繪有岑樓聽紡圖士  
爭題咏焉治家有法內外百餘人服物相通母老承歡惟恐不及  
諸弟姪執業於外晨出暮歸必各攜甘旨以奉張燈宴笑管絃鼓  
板各獻所長其小者令覆經相角熟則得果餌冬擁地鑪掃雪烹  
茶聯句爲娛家有煩苦事不許道一字恐損老人歡母歸房而後  
散孝友之風邑中無兩常偕同志辛元袞袁開慶輩文酒燕游野  
店山家隨地開尊風趣不淺和正孚人鄉曲是非經剖判無不解  
著有岑樓詩集

郭光笏字屏藩歲貢生穎敏者學詩宗白傅書有右軍法餽庠三  
十餘年屢試高等從游多成材性端方有幹濟邑公事恒倚爲重

如建考棚創賓興疏河建閘及郡修考舍城垣皆始終其事晚年  
念先人修學宮績歷久漸就頽乃率先呈請募貲重構經營三載  
卒觀厥成爲族長二十年多善舉族論翕然於維持城市公益尤  
人所欽慕道光丁酉恩賜舉人卒年九十二著有慎餘堂詩集  
郭祖培字家先歲貢生專力四子書有所得卽筆記之積久成帙  
皆根據確實不爲苟同作文確守先正兩薦不售遂一心考據冥  
搜博采學日進家計屢空泊如也著有四書日知記天文圖說律  
呂考日知記已梓行

朱映晨字文明中第五名武舉歷任大河海寧金衢杭嚴溫州台  
州領運千總積功晉五品以台幫舵工逃案被劾久之捐復補金  
山衛領運卒官爲人豪爽而寬厚相知甚廣負者亦甚多反曲諒  
焉在官優卹疲丁丁徯其寬抵通交運或逃去使費悉墊應前後  
頑欠至七百餘金盡舍之州縣以其豪也應交幫費輒怵以好語  
從無取盈者顧獨恹於院道吏勒索多不應故金山任中扣運者  
三所領皆減運得不償失居家孝友在浙迎養甚得親歡爲兄置  
簞使有子晚年宦囊澀仍攜養姪甥餽遺諸弟無間卒年七十六  
李承烜字良慶號遂夫舉人聰慧善記作文有法度大挑二等署  
長寧選崇義訓導實心造士以疾卒官性鯁直孝友遇非理卽面  
斥不避佳士則譽不絕口恥涉訟庭非公事不見邑宰次弟出繼  
仍挈同爨委以家政季弟以武舉効力撫標先卒待其妻子尤厚



署任迎母甚得歡心比實授復迎而疾作遺書與弟有子職未終死不瞑目之語年五十九子興霖文庠

辛鵬雲字發孫由蔭生補順天府經歷京察一等會丁憂服闋補奉天故美缺也守清白訓多所裁革上官察廉委署寧海知縣時水寇猖獗數侵掠沿海地武弁望風退卅縣官且致賂鵬雲捐廉募鄉勇設方畧寇來與戰戕其眾十餘自是境無犯者瀋陽旗民雜處左袒成習巧宦承意指輒速化鵬雲曰冤平民博高遷祇爲先人辱用是遇事齟齬有旗員某負民錢反嗾羣僕斃焉以實讞上法當抵王者怒撤委欲坐以失入賴讞語詳明部議置原審不問愈內恨蔽其功并京察斬之已而上憲易舉卓異更署興京通判抑強扶弱一如寧海時覺羅某者故將軍嫺戚常指官詐民財拘訊得實方具詳而擅拘檄下將會劾首縣向府尹力爭謂此輩素橫今整頓者獲咎民更不聊生且某並非職官法得拘乃止京察又奪凡在瀋十餘年屢以彊直見忤沈下僚而貴侶者動以聲色相陵遂抑鬱致疾歸行至安慶卒鵬雲雖得官志以科第承先經歷向不鄉試自鵬雲援京察例南任皆奉特旨俞允遂爲定例在官暇卽讀書雖赴轅監印手帶一編眾共迂之不顧爲文繼幽鑿險力厚思沉而不甚修飾故屢困棘闈時見賞於宗匠

孫馨祖字明薦號此堂能文章兼工詩古擅詞曲乾隆辛卯以第三人舉於鄉挑發粵西署蒼梧知縣有政聲以祖母艱歸服闋在

福建歐甯知縣鄉試分校所得皆知名士報最列上考大吏廉其材堪治劇調任同安以母憂去職嘉慶九十年間受縣人之激刺至於投荒而不惜意必有生而望返死而思歸情不自己者乎著有此堂詩集梯田山人餅話昆都俞歌紅牛記諸院本藏家改編論曰孫馨祖一在籍知縣耳考案之爭數十年赴訴重疊馨祖無與也事之既亟署知縣周吉士與知府鄭鵬程見左撤任待參小官之不能與大官抗夫人知之況在籍知縣耶地方官各有所見遂致大臣亦各有所屬總督陳大文學政李鈞簡單銜獨奏上諭復准學政之詳考案如泰山不可移矣時則人皆岌岌事情皇皇譬諸荆棘之叢誤入其中者體無完膚馨祖不知

耶然則謂馨祖爲主謀者蓋其勢之無可如何亦其情之必不可獲已者一王之治政歸獨斷而俯順輿情則天下古今大公至當不易之理也馨祖投荒老死塞外未爲不幸而或以爲可媿抑或以爲可惜淺矣

辛辰雲字北孫號黼文辛卯第五名舉人少宰從益三子自幼隨父任學有家法文有經術少宰嚴正奏記文衡不輕假人辰雲未嘗不與非獨才之且信之里居清貧至掌教龍河龍江書院以館穀自給故交世好多當世貴人未嘗一干之咸豐五年賊竄江西及萬載所至郡邑風靡獨省城未陷因重繭走湖南乞師撫軍駱秉章遣同知蕭啟江都司田興恕等進援委令籌辦勸捐團勇以

助官兵首倡大義豪俊響應袁瑞臨三郡相繼克復萬載接濟之力為多駱撫謂是役為吳楚第一勲蕭田後至藩司提督辰雲保湖南候補知縣殊無意出山自以名臣清宦後風期氣節蘊結益厲願忠於國不顧身家故冒險觸忌憂勞感疾賫恨以沒識者痛之生平著作甚富唯縣土著志板行餘未梓于履閑郡廩生

陳素舒三區黃茅田寮裏人席先世之遺富於貲見義敢為能急人之急然不輕與可與則必如其所期而止孫馨祖會館其家數年不厭也事定家落而人死矣其後嗣亦能知大義三區倡建龍岡書院捐錢千貫為眾倡事得集成同之間知縣李吉言逃死無所挈眷任其祠堂累年湘軍入境勦賊自是基之是謂能見其大

者矣同時喬廈有張鶴鳴者讀書負奇氣善草書與素舒頗相得亦足稱焉士之特立獨行為鄉里先湮沒而不傳者可勝道哉新

編

何良號小石副貢生篤學嗜古不屑章句於經史大義討其源而旁涉諸子百家天文地理算法醫書落筆輒羣動與古會梓行小石詩草皆其少作壯歲學益遂心益虛脫稿詩文輒被人攘去其教人不徒事舉業成就甚眾舉人辛有猷郭春熙宋炎劉文毅尤說服晚年日將五經四書尋繹玩味擺脫傳註獨契真詮家貧不治生產於古今成敗民生利病恒若身親乃以一貢終名業未顯士論惜之者有春秋畧例古蹟七絕三百數十首名寰中集國朝

畫家詩數十首待梓子鯨邑附生

宋階明字熙瑞號輯軒出監生以分缺先用知府分發浙江咸豐十一年賊圍杭州連營數十里紳民間風先遁階明候補官毅然不去中丞王壯愨公扎委七門總查力守孤城三月餘糧盡援絕陷階明在鳳山門被執罵不絕口遇害同治九年奉旨賜卹予雲騎尉世職入祀昭忠祠子世培由試用布政司理問兼襲雲騎尉次子世材湖南候補縣丞隨父在浙殉難同治五年竝賜卹予雲騎尉世職入祀昭忠祠孫煥奎有傳

湯譽光原名調元號子變幼聰穎看列國演義帥令長跪適客至問以此書大旨曰赫赫宗周褒姒滅之髫齡入泮嘉慶戊辰江

西巡撫秦承恩聞其聰俊招人署內讀書與梅曾亮帥方蔚輩相切磨識解日高術業日邃由優貢舉於鄉道光六年丙戌大挑知縣分發河南丁亥辦興化賑奏改歸地方補用開河工竣優敘歷任婁縣無錫吳縣知縣浚木渡鎮河道修三堰五閘民免水患辦理賑恤署柘林通判兼大湖同知丁父憂回籍服闋分發湖北署監利知縣補襄陽縣陞襄樊同知署荊門州知州攝荊州府篆年老致仕歷充江南湖北同考官李修撰振鈞朱太史右曾皆所得士性耿直遇不可事雖忤上官勿顧清廉自矢歷任多繁富地而宦橐蕭然祇遺經史數簾工吟咏胸次清曠薄書鞅掌暇輒以詩自娛著有窺一軒制藝試帖仿蘇和陶詩梓行其餘著作甚富俱

青華原三十一  
未梓年七十四卒子敦臨著山東濟南府經歷敦叙江蘇華亭縣  
典史敦誠號我齋候選縣丞軍功以知縣用部選廣西義甯縣知  
縣未抵任委署平樂粵匪蹂躪人民凋殘敦誠招撫流亡始就甦  
息繼賊復至募民堅守援兵擊散萬民歡呼明年歸本任有訟經  
十餘年未結者立爲判決人稱神君詩有父風雖處疲邑吟咏自  
如丁父憂回籍年四十卒本新輯今參湯譜

高思訓原名龍號滄亭十歲時舅張鶴鳴以外孫墻背箕爲問幾  
時得成棲鳳竹命對卽應聲曰尊舅池中魚必然他日化爲上天  
龍舅大嘆賞因以龍命名弱冠遊庠旋登賢書歷任貴溪永豐教  
諭循循善誘士心悅服年六十一卒官生平氣度冲和遇鄉族事

委曲開導務極平允髮逆據縣籌餉辦團多所贊成而口不言功  
子蓉曦歲貢蓉昞文庠蓉暉廩生孫玉森有傳玉槐廩生玉松玉  
樓玉楷玉樹玉梅均文庠

辛价字介人父紹業官國子監助教少隨父讀書試北闈不售歸  
入縣學屢試一等補廩晚舉拔萃科學使許乃普嘆爲宿學聘衡  
文臨行謙宜春臺上與助教拔貢時翁學使方綱置酒春臺與之  
流連歌詠情事脗合郟邑榮之生平文宗韓詩法蘇駢體律賦雅  
近六朝學富命蹇終身友教門下士分宜貴陶族學乾最著也著  
有協韻集成詩文稿子斌解元十四藝俱進呈挑發四川署南溪  
縣知縣有功舉人文有根抵性孝父晚患痔調藥滌污不假手人

榜後旋歿士論惜之改編

辛儼字仕勉號升甫紹業子少讀書能立見解弱冠補諸生卽舉於鄉北上侍父某親王聘教讀以涉黃緣婉辭之酷嗜古墨刻有佳搨質借不惜四上公車四薦不第大挑選清江教諭悉心造士截取引見仍以教職用選浮梁教諭之官例謁巡撫中丞費鶴亭見其人立階前意欲其拜階下也疾趨上曰臣與君行禮乃拜於堂下大人悞矣及試親監之並刻香以爲難援筆立就評其卷云高簡堅栗逼肖稚川賊陷饒浮令驚竄爲率黃以柎等與戰鱖魚山斃賊數十人積勞致疾卒於書尤邃小學所著有春秋異文考證十二卷春秋內外傳古文存張文毅帶爲之序易其名曰春秋

內外傳類文疏義試律滄螺集二卷土汾源題曰辛稼軒詞辛升甫詩古人可作吾誰與歸鄧鹿畊題曰詞中蘇辛非秦七黃九之比包世臣稱其家學淵源晚精律學謂海寓不靖由於失閏擬疏欲上曰臣聞月令季春行秋令兵革並紀仲夏行冬令暴兵來至季秋行春令師興不居仲冬行秋令國有大兵咎證之應皆由時令所感嘗取萬年書以法求之九年二月半便是正月一而順治壬辰之癸酉朔辛丑之辛亥朔康熙壬寅之乙亥朔辛亥之癸丑朔乙丑之辛酉朔甲午之癸卯朔雍正癸卯之辛巳朔以除夕爲元旦康熙庚戌之己丑朔己巳之己巳朔戊子之己酉朔雍正丁未之戊子朔乾隆丙寅之戊辰朔乙酉之丁未朔甲辰之丁亥朔

以臘月爲正月又案僖公五年疏曰閏前之月中氣在晦閏後之  
月中氣在朔而康熙己酉道光壬辰咸豐辛亥雨水俱在十二月  
晦查尊鄉贅筆己酉年南懷仁曾經推算改閏然則壬辰辛亥亦  
應改閏而欽大監不知檢舉是再失閏也春秋再失閏流爲戰國  
列辟兵爭生民塗炭綿歷秦漢而後昇平置閏之失兵連禍結其  
烈如此子祖范早世著有小同詩鈔二卷盧諶爲之序梓行解揚  
貢宗周邑附生大受郡附生子尚貢改編  
辛公弼字文豹紹業子考取國史館供事供職十載睿皇帝大蒐  
古北口當事命掌戮禽籍凡三次議敘以巡檢用因母老歸族推  
理總祠及房祠事增置祀產立義田建試館修譜牒生息經畫悉

出其手倡立六房會購田數百畝爲建祠之資襄辦邑中疏河建  
閘及理賓興輯邑乘諸義舉嘗教人以立心爲本謂心術旣正則  
百爲皆善子孚德刑部主事孫景舒有傳

辛拱照字顯榮號凌雲嘉慶辛酉拔貢教習報滿以知縣用因母  
老改教選授靖安教諭母憂服闋歷署南城安仁教諭旣選上高  
教諭縣人仰其文名請兼主講義塾悉心訓迪先是四科無一中  
者後乃三四五名不等在官學時宏王曾廼爲教讀賓主浹洽以  
內賜物相餽遺子樹仁孫際午俱有傳樹義庠生泰辛譜

辛樹仁字道傳號靜山道光戊子舉人房師湯慶增爲本邑令有  
富民被逮出巨鎡求關說力拒之曰不可以對我師選授龍南教

論其俗獷悍有兩姓聚眾將械鬪縣令無策爲召兩姓生監面諭之日寇氛方熾復聚鬪於此乎設有殺傷列膠庠者罪魁也聽吾言宜卽罷器械留以禦賊將爲汝功遂各解散去縣無城請縣令勸捐修築完固又增外城數處後粵匪環攻堅不能下觀察周玉衡勦匪至縣欲以知縣薦辭不受或問之曰此吾先君意也記改教有句云不失儒生真面目無妨冷淡作窮官今猶昔耳勗諸生講學以躬行論文一宗理法以軍功陞贛州府教授一年卒官子錫洪舉人有傳觀濤歲貢孫銘恭有傳

盧尚文字宗周邑庠生性孝友有學租原載武庠不與後弟入武庠仍均分之或以橫逆加者置不校喜訓迪後進一時秀士多出其門祠乏祭掃資捐產不吝鄉邑義舉亦常樂從子瑤林舉人占魁邑庠

彭才尹字任夫號莘圃幼失怙事寡母孝性聰穎以幼童入泮歲科試屢列一等善教誨督課最嚴多所造就新昌袁太史玉麟其高弟也性豪爽家貧不治生產好客嗜酒酒酣談論古今人皆斂服邑義舉如賓興樂泮龍洲書院賴其力勦成之家世謹厚誠子孫永守勿替子召棠濟川俱增生孫燦垣舉人官安徽婺源縣知縣

辛介福字鳳喙號柳垣副貢生家貧聚徒講學從遊者眾館穀甚豐供甘旨不爲私蓄辛從益督學山東江蘇聘襄衡文試揚州得



謝增卷亟薦之後以第二人及第餘所拔率多知名有友官京師  
勸其應北闈兼可考教習膳錄爲出身地以親老辭家居兄弟怡  
怡訓子姪一遵禮法長幼六十餘口同居無閒性嚴正人不敢犯  
修譜牒增祀產學宮義倉諸善舉悉秉至公不辭勞怨倡建龍雲  
書院於小江濱四五區生童俾得就近肄業者作多散佚惟詩文  
稿存待梓孫榮文庠

陳綿韻字發祥號雅齋性慷慨四五區合建龍雲書院首捐千金  
眾情踴躍遂以集事繼復捐錢二千緡以資膏火龍河書院經費  
不足捐數百金修理學宮亦捐數百金鄉建義倉捐穀七百餘石  
并命子弟經理生息歲饑平糶多所存活他如家廟以祀先城垣  
以固圍資興樂泮以資大小試費均有樂助家故貧以力耕致費  
巨萬得之難而捐之不吝其弟立齋聽命惟謹孫錫庚文庠

郭樹榮字信夫大學生四歲父母相繼歿兄樹倫亦僅八歲幼執  
喪哀毀如禮依伯叔父母不煩教督自能成立稍長樹倫經理家  
政聚聽命維謹兄弟友愛數十年無纖毫隙性誠樸以古道自處  
亦以古道待人負之者至再三坦然不介意延師訓子督課甚  
嚴晨起偕子入塾背誦慮師過勞已分其一功無曠而師亦多暇  
允館其家者得以自理舊業時復相勗收師之學亦進建別業延  
何良玉講問館請於師曰學問必務根柢不徒獵取功名所以敬  
請先生者求實學願勿以俗情相待良躋之指授皆經史大義詩

文悉避古法良嘗語人曰吾教學多年各家父兄惟以科名冀其子弟如榮之能見其大者鮮矣豐修脯腆者僕稍知敬師者能之然皆文具體念纖悉視帥如一家如一身榮之外吾未見也年六十四卒疾革時幼孫侍側忽詰之曰爾書不溫生矣蓋性之酷嗜雖危甚不忘于頭卿附生春熙舉人

彭壽頤號子文少負奇氣有不可一世之概然知音絕少以副貢舉順天鄉試留京七載學益邃遭時多故縱談天下事吃際唾罵歸值粵黨竄萬辦團練捐與某富室齟齬舉人某陰持之而知縣李皓左袒之以致互相揭稟又不得旨適曾文正國藩駐帥江西劉蓉廉得其情謂是才氣可用召至營檄令管帶一營巡撫陳啟

邁不允郭嵩燾爲之解說意亦釋然且曰訟案無關緊要南昌府知府史致諤竟釋之啟邁怒其遽也拘之急國藩咨商不允且以爲朦混投効不特不爲伸理冤屈而以其辦團爲咎且欲弭知縣棄城之罪而坐以誣告因數巡撫十二過具詞有云惟舉義烈之氣不死於賊鋒而死於吏虐大人震怒之威不用以殺賊而用以戮賢爲可惜然大人屈於理舉屈於勢屈於勢者在一時屈於理者在萬世大人不自惜舉亦何惜之有巡撫益怒命按察司執而扑之且與國藩爲難營餉軍火斬而不予不得已而奏參巡撫臬司奪職此咸豐五年事也國藩見江西人士輒曰識彭子文否江右人傑也六年二月國藩以憂去五月賊踞萬載壽頤聞道歸倡

立忠義軍芒鞋草履甘苦同士卒再戰克捷而以餉絀罷憚老宸  
撫江西復修前怨赴省候質沒於旅舍王闈運哀辭謂是省獄蓋  
傳聞之異辭也歿後著述散佚惟團練新編及絕命詩並各呈詞  
流布遠近讀之令人於悒有其才與識而其氣又足以包舉之竟  
不獲一展厄於湘人伸於湘人後且非湘人而不改湘人之意指  
不啻再厄於湘人然而曾文正之奏議大事記湘軍戰紀湘綺樓  
集長在人間厄於一時伸於千古理勢之言如左券矣吁可勝慨  
哉改編

柳承培號凌雲和鄉睦族憐貧恤寡祭產墓田解囊不吝族建大  
祠捐千金支祠數百金并助基地如寶興堂京會館及寒衣因心  
義山等善舉資助之自念累世衣衾曾祖發位祖瑚均庠生父廷  
藩歲貢己乃爲貧廢學故隆師課子於先達靡不敬禮袁州昌黎  
書院唯萬載未有分齋病亟遺命其子成之并能推廣父志既建  
分齋復捐本鄉和豐義倉穀數百石助龍雲書院膏火田子德輝  
舉人孫召棠邑庠生

潘縣花號海門邑附生爲文不輕落筆構思良久一揮而就從學  
者眾各隨其材質高下而成就之蓮江石橋被水衝圯捐館穀以  
爲之倡眾遂樂輸修整如舊邀同志建慶豐義倉積穀數百石歲  
飢平糶眾皆德之子梓材孫紹岳紹華均舉人紹顏廩生  
李宗周字安瀨大學生幼負奇氣長志於學爲文不屑時趨又困

塲屋絕意進取專以督課于孫邑中公事如淑賓興堂修文廟考  
棚歲飢于難諸我舉無不捐助性和易然不可干以私紛難立決  
鄉里推重孫春蓐以拔貢中式舉人

辛字林字泰增邑增生父卒於京扶柩歸盜躍入舟砍一落水羣  
散思報復翼日早字林攜僕踪跡至野店中有數人坐飲心知爲  
盜夥卽入店治具力拽盜臂邀之共飲盜知謀泄且憚其勇不敢  
復犯父在京火積金不多易簣時遺囑餽親族共千數百金悉遵  
父命析產時以厚貲讓弟擇腴田數十畝以膳繼母仗義疏財家  
落傾產課子孫人迂笑之不恤也子榮暉夢周森皆文庠孫渤以  
選拔中順天副榜

彭英晉字三瑞大學生鄉里有爭立爲解或代錢除寢其事不使  
人知後亦不問也賓興堂初起時眾議不一竭力襄成之凡橋路  
勸募無不與且量力捐課長子以鈞學至典質以供脩脯鈞邑增  
生孫幾附生斐彰舉人書頤有傳汝昌邑附生曾孫金增生  
宋文斐字錫庭號竹泉髮逆信亂助官軍餉數萬得獎敘授福建  
雲霄廳木到任而城陷捐貲募勇隨左宗棠克復漳州雲霄等城  
兵燹凋殘斐下車撫綏次第舉行善政積勞成疾數月卒於署喪  
還素服哭送者填溢街衢援例入奏奉旨賜卹予蔭孫容照承蔭  
州判

唐溢號蠡門舉人能詩文及書與奕兼岐黃堪輿術時與國手戴

秋士對局藝日益精著有怡怡草堂奕譜梓行春秋大勢五古陶  
情集待梓大挑二等晉吉安府學教授及龍泉零都德興教諭鄱  
陽萬安萬年訓導選義甯州學正未任卒

謝興榮字騰芳大學生性剛直鄉曲紛難一言立決育嬰賓興學  
校試院捐輸或數白金數十金不吝鄉里橋路廟亭量費多少而  
資助焉採尙斌紹暉曾孫樹勳俱文庠

龍應飛字起鳳積學敦行言笑不苟家故貧訓課後進不計脩脯  
尤深史傳學故及門士多以古獲雋經理公事以廉介始終同治  
甲子舉於鄉旋卒子友松有傳

劉補朝字簡倫監生習舉業數奇嚴於課子終歲不令出塾性孝

友母嬰未疾背負出入庶母患瞽扶持一如所生兄負累爲邀親  
友欣助復命二子足成之邑公事如改建崇文闡出粟平糶皆身  
任其勞爲族督十數年纂修家乘興廢繼絕晚年家益困手卷不  
釋所著養拙山莊近體詩未成帙而卒子式穀以舉人官知縣徵  
猷席繻孫楨俱文庠

喻炳字景階號星臺道光辛巳與於鄉出知縣名進士衛鶴鳴之  
門驚爲老宿數上公車屢薦不售常以讀書得榮封父母爲念選  
都昌教諭敕贈如其官家貧課徒不事時趨登賢書者羅運齊盧  
瑤林郭備最著嘗主講龍河上高景高及郭氏義塾教諭都昌桑  
束修數百金而歸優游林下不與外事卒年八十二文稿多散佚

汪茂楠號石森性聰敏弱冠補弟子員治家一循柳氏家法經理  
祠事尤善督房族數十年能以身教子姪無敢爲非如修葺學宮  
捐助龍河書院膏火創立義倉悉傾囊爲倡晚年屢舉鄉飲正賓  
雖常經理公事而手不釋卷孫瓊林邑庠生

盧後慰字望顯大學生副貢及暉子繼葊伯廷曦後性忠厚孝友  
無間初隨生父爨有佃戶周負債將鬻妻以償慰請以本年應得  
田租近百石悉蠲免周由是保妻孥析產一適生父命不較多寡  
肥瘠兼推讓己分內產幼讀書能文晚以岐黃術多所全活不受  
謝併有餽以藥貲者制行公正不以運蹇易操延師課子孫家漸  
落自若也子夢蘇文庠孫汝寬舉人汝源文庠

郭呈輝號蘊石邑附生少孤性孝友恒爲母溫被病則臥立不食  
私行禱祝人咸異之家貧授徒出告反面母老犯腸瀉侍湯藥  
累月不解帶常置方正學座銘於案言行悉遵之與人爲善後進  
多所造就

鍾宜章字大楨號斐亭兒時讀書識大意不屑屑於章句以父命  
抵京援例捐從九職分甘肅試用下父憂歸哀毀幾殆以母老不  
復出子姪七人延師訓課歲暮解館命背誦所讀詩文治家嚴肅  
自奉儉約而宗族鄉黨周濟無所吝修橋路施棺木瘞骸骨諸善  
舉難更僕數卒年五十七女子斯敬有傳三斯卓副貢生  
江潛字能哲號慧齋由歲貢選授南豐縣訓導時已七十六歲接

見諸生與論文藝竟日不倦年八十方製錦稱觴忽得痰疾卒  
吳鵬字向科號南軒歲貢生屢薦不售立祠規修支譜日與族人  
講明孝友睦姻之道爲族督數十年選大庾訓導時年已八十定  
例須詣大府考驗援筆凝思尙能伏案作小措手眼無老態之官  
扶植風教導勵羣材陞調樂平教諭告歸年八十九優游林下至  
九十四歲卒

鍾斯敬字挺莊號仲興一號慎齋由舉人大挑一等分發廣東發  
審積案剖決如流委署開建故僻邑南靖書院久傾倒亟捐廉倡  
修資助膏火時且講授文法下邇召父老課耕織教孝弟有爭訟  
卽處斷三年風習頓改士民愛敬詣大府請留格於例改署吳川

縣濱海劫報無虛日又值粵亂擾及鄰省先有選得是缺者憚不  
赴敬至倡修城濠督辦團練更番勸勉實力奉行或留宿練局竟  
月詞訟及一切事皆就所在裁決朞年成勁旅賊至屢挫輒斬馘  
數百高州四屬其三皆被害吳川獨全咸豐元年制府徐廣縉至  
高上謁求解任不允次日詢知因公負累鉅萬積勞成疾乃准卹  
事令在高調養未幾致府奉命進勦粵西欲挈往辦軍務辭曰他  
人求之不得顧獨不願豈此間缺反美耶笑而從之既糧台需才  
檄召至一年又墊二千餘金引疾歸東省上官廉知其情欲以大  
縣調劑固請開建自効至又值林謝二匪糾黨千餘侵擾縣境亟  
練勇堵禦竄入輒殲之是年以軍功陞同知直隸州適新興鄰匪

竊發肇慶九屬多被擾顧無可委署者召至慰遣之蒞任團練保甲并行募勇嚴守藩籬戒毋越境貪功時穀價昂貴復出俸開倉賑濟民賴以活未受蹂躪擢綏猺同知調署陽江未匝月病卒年六十七生平以經濟自許曾倡建東洲書院加意培植勉爲有用之學在粵十餘年携眷屬不過七八人儉約如儒素身後不名一錢賴寅好賻贈得歸葬子玉明捐發廣東知縣

鍾玉明字敏生號朗卿斯敬四子幼聰穎長具幹才隨父任丁內憂回籍適髮賊據縣城楚師進勦襄辦餉團不辭勞瘁續丁外艱念父宦粵十餘年因公虧帑破家不能償服闋心怏怏父舊好爲捐指省知縣到粵委城內總查未匝月暴卒

宋成祥小字潤發曾祖雲起厚重有威儀鄉里敬服足跡不履公庭家素貧非義不取死無以爲殮聞者趨賻之喪祭如禮且爲經紀其家祖馨兆邑庠生父觀麟生二子卽故家蓋落母吳氏改嫁王姓次子成發隨養成祥其長子賴和母楊撫養咸豐六年髮賊據縣城投都司劉培元部下遇賊與鬪由是知名後投虎營充馬隊哨官轉戰江西浙江福建廣東積功累保花翎游擊同治四年追賊至嘉應州連戰皆捷進攻城幾拔賊懼宵遁成祥帶馬隊追及之鏖戰至日中忽中礮卒先是大帥以其連旬力戰擬保副將未及上而亡痛惜之奏聞照副將例賜卹賞塋祭銀一千零廿兩並給雲騎尉世職襲次完時給予恩騎尉世襲罔替卒年二十



青華縣志  
七歲未婚無嗣撫靈札飭以胞弟成發承襲侯生子卽以爲嗣襲職

藍光苑號藝圃二十四都西坑人邑增生爲文不苟隨時俗屢薦不售教人以敦本務實恂恂雅飭道路相遇不問知爲其弟子也義甯進士陳文鳳從遊七載受益尤多性嚴正咸豐五年髮賊竄踞鄉里無賴輩爭先從之苑時爲族督西坑監氏丁壯二千餘人無一敢投賊者年九十餘卒

潘之鳴字瑞生高村人雍正初溫上貴犯境府憲李英札起團練倡捐錢穀與鄉耆藍涓濱義勇陳輝玉嚴林森羅老蒲等協力捍禦不惜身命賊竄新昌奮勇驅逐獲上貴逆黨平知縣施昭庭獎

以忠義可風鳴性純篤事親以孝勤儉致富好施與年荒給粥活人無算凡府縣省考舍書院橋路寺廟育嬰漏澤及有關人心風俗各義舉約捐五千金有奇門前大江爲通湖湘往郡縣大道舊架木梁十數遇洪水行人不便時已衰老命其子易石乾隆間子貴麟榮麟華麟富麟佩麟承命建三墩四管兩旁圍以石欄兩岸有階級程工五載費萬四千餘金同里進士李榮陞甚嘉之贈以聯知縣孫鉞給樂善好施匾孫文彪武舉曾孫維新邑廩生饒學謙字發祥例貢生性敦孝友兄弟七人析爨時得租僅二百餘石見食指繁以已田租六十六石讓之值八九百金無難色亦無德色每歲暮陰察族鄰窶乏者召至給以穀不索償

高齋集卷之二  
饒廷楷字燬輝學謙于利濟有父風道光辛卯壬辰連歲薦飢減價平糶貧民賴之居恒扶危拯困難更僕數高魁書院木饒姓別墅族人欲別售獨倡爲義塾且捐銀三百兩助之

鍾天亨字開元事母年踰耄耄未嘗分任兄弟居家嚴肅數十人無詬誶聲捐建東洲書院爲眾領袖

范立臣字興邦例貢生初起塾課會出錢穀爲族中子弟束修費旋倡修起秀書院捨丸藥救溺女鄉里中艱於掩埋者施棺瘞之卒年七十四子世杰文庠

黃金印字連文監生遺腹產事母得歡心四兄俱早歿撫姪輩如己出喜接文士構家塾課子姪勸捐高魁東洲兩書院通人緩急不少恡歲歉出穀平糶凡造橋築路修廟建蔭宇謁亭立惜字堂諸義舉皆與有功柏樹街石橋倡首任勞年七十三卒子敬圖增生龍圖丹成俱文庠

曾起鱗字元濱大學生少業儒後以岐黃術活人無算不索謝遇乏藥貲並濟之打鼓墻橫埭子捐置義山三處建五百興年豐倉東洲高魁兩書院及修郡城施棺木橋梁道路輒不吝治家儉約延師殷勤卒年八十一子士俊庠生孫玉樹歲貢玉山文庠

唐逢辰號蘋州人贊補湖南湘潭縣丞卓異升知縣歷官衡州知府其初任耒陽縣值柳州劉大偉之亂分股擾及縣屬油榨墟自率民兵遮擊其年洪秀全陷道川遂由桂陽趨柳州至永興距耒

陽城數十里所至官吏望風遁獨閉城治守其賊亦遂指縣境而  
北不一犯縣城時徵存民稅萬數千金或勸留充勇糧曰此數十  
人食城穀有餘未陽一孤城賊所不爭留此何爲是時州縣被賊  
所徵民稅皆免乃獨完解蓋能不欺以獲信於上而致功名實由  
於此其後調湘鄉爲政最久有聞於時曾文正常稱之  
謝公漢字昌元四區龍田人力田致富自奉儉約遇歲歉輒平糶  
貧無錢者貸之不責償嘗設粥廠活人甚多郡守程額以尙義可  
風

王如綸字珩珍讀書明大義由附貢生援例授候選訓導加中書  
科中書銜咸豐六年舉人彭壽頤優貢廖連城起忠義軍在港口

殺賊千餘如綸與有功十一年賊踞新昌逼萬載募勇八百自備  
口糧偕新昌舉人王保仁奉檄立保泰營祖孫父子親冒矢石屢  
獲勝仗四月克復新昌府縣爲製忠義義勇額旌其門五月以餉  
乏軍譁憂憤卒年七十三  
黃華原名呈瑞字奎銘少習舉業初應童試知縣陳文衡加稱獎  
學使按臨以不善書黜捐監鄉試薦不售性豪爽爲人排解罔弗  
帖服族眾事繁積未清理幾構訟舉族督不旬日悉妥愜生平好  
義凡所當爲解囊不吝於兄弟尤友愛咸豐元年詔舉孝廉方正  
縣人欲以膺選曰廉方正猶可勉至於孝自反能無愧乎辭不就  
年五十四卒弟呈祥字奎銘優附生以能文爲知縣衛鶴鳴所器

重輿兄華最相得出必隨行

楊羅峯原名錦字岫和號皆山角卍聰穎弱冠補弟子員以增生登道光壬辰賢書性豪爽倡建六區龍洲書院及倡捐龍河書院膏火束修縣城傾圮督修西北隅咸豐二年就館萍鄉適瀏匪竄擾督壯丁分路堵勦因保舉教職銓選泰和縣教諭十一年粵匪踞新昌督率練勇克復鄰城加國子監學正銜泰和學校廢以清俸修復之時進士人做經義治事課法不數年科甲蔚興八十餘歲卒櫬發有淚下者

郭如衡字位南號此山名噪塲屋數奇不偶援例入貢常助田數百畝於至聖誕辰行釋奠禮學使孫記之又闕貧無以墓者倡立義山捐助育嬰卒年八十三子殿魁副貢用中附貢生

劉廷棟字正柏號培谷例貢生持重有識父時耕鍾愛之甫受室委以家政食指浩繁而內外帖然父沒喪葬如禮理家數十年毫無私積最加禮師儒寒士投贈稱貸無吝色邑公事恒樂輸書法宗顏清臣經史子集及願體集諸書每於父與賓客講論時潛心體會先是時耕與辛少宰從益立有啟元書院獨擇棟經理其事俎豆莘莘卒成先志少宰序時耕家傳墓誌以燕山五桂目之年七十舉人辛辰雲廩生張焄敬進士盧昆鑿作壽文旋卒儒學訓導盧焄作墓誌子文瀾恩貢生

盧及芝字魁蘭一字和生號商山道光丁酉舉於鄉爲文矩夔光

民性廉介非公不入公門人笑爲迂不顧也家貧授徒多所造就  
常主講龍河龍雲書院及郭氏義塾倡修六區龍洲書院纂修盧  
氏族譜俱以廉能稱大挑教諭未任卒

劉文毅字麒孫號瑞生時耕孫廷杰子道光戊子舉於鄉豪邁有  
才幹義豐倉倡首勸捐分修縣城邀同志力任東北門數百丈修  
府學邑中專請任其事樂類堂邑乘奎文閣義山袁郡先代祠無  
不經理總歸有成爲人修偉長髯遇事鏡燭犀剖雖性近揮霍毫  
無侵漁大挑二等署永甯縣教諭授崇仁縣訓導因艱解組旋卒  
年七十

胥賓賢字秀發號楚翹幼喪父理家政井井有條弟三人教讀婚

配俱底成立弱冠補弟子員試輒高等登膺房薦晚得恩貢家稍  
裕歲荒減價平糶難民過境常倡募賑之三四十金不吝力課其  
子常曰老大門第惟賴詩書卒年七十二子澄由府案入郡庠醅  
茗邑廩生

楊運昌字鳳宗二十三都岐陽人大學生性孝友幼失怙母目疾  
禱於神不茹葷者三秋日復明人以爲孝感建節孝坊悉身任之  
不責兄弟性喜施與課子孫必延名宿重道尊師長子承俊困小  
試業岐黃多所全活貧者至贈以藥貧孫澍亡未武舉輝郡庠生  
孫獻邑庠生

辛恭泰字新科大學生性渾厚和平樂施與鄉里稱貸不能償不

索也貧無以葬者輒施棺同治四年叛勇竄萬所居距城數里賊搜劫民家有數賊入其舍索金帛泰拒之賊劫以及大罵之賊怒縛之罵益厲至死不絕口時年八十有二子春慶見父被殺抱父哀痛賊並殺之孫綉麟武舉

盧昆鑿號翰坡弱冠成進士歷知浙江臨安石門鹽城平湖等縣以賢能保送入覲升授廣西明江同知浙撫奏留修海塘功竣赴粵憂歸服闋洊升泗城府知府調桂林府所到之處凡有關於民者知無不爲爲無不力不避難不趨利不事逢迎殆不爲其巧而爲其拙者歟

周樹贊字田孫號育人世居萬載鄉之黃茅承義門家風生而樸

茂內慧稍長父命服田及同胞兄樹楷補弟子員乃輟耕而讀旋入郡庠舉優行補增生道光癸卯領鄉薦六上春官乙巳會試呈薦不第癸丑大挑一等以知縣分湖北便道回家病卒子澤春孫廷玉均文庠

陳盛森自幼喜聞忠孝事長習醫母疽發背時以口吮潰處傳之藥乃漸愈父咯血瀕危衣不解帶者兩寒燠聞楚有神甚靈往祈路遇人授二丸父疾頓瘳嗣侍父奔母族喪返值大雨父驚眩墜溪則躍入挽之起終以濡溼成蠱有言雉和菖餌之當已越日雉飛來獲之父病以瘳壽八十卒既葬廬墓以毀爰祀忠義孝弟祠

盧爾恭國子生幼讀即知問孝父母疾終夜不寢同懷五人恭居  
長相友愛有私金任用不吝堂弟必顯好學苦無資屢遣從師脩  
金及館費悉任之子鰲連飛均郡庠

盧周南號麥舟能文及書與詞曲見堂兄武舉道南訓徒遂兼應  
武試人邑庠既而遊其門者四人試輒取進三人七人試輒取進  
六人縣府道冠軍者屢鄉會中式者十餘人樂平殿元汪年姪也  
京邸同寓以射每天鵠求教爲指示遂無虛發得殿元沒後大小  
試咸祀奉之子光魁武舉技勇與注伯仲卒於京昆伏丙俱遊庠  
辛有猷字旺年號克齋父家政貧以醫名多隱德猷兄弟三人其  
伯家源課之學閉戶潛修苦心孤詣弱冠應郡試二覆經題爲發

馨祝敵猷博引經義灑灑洋洋郡守奇之拔冠軍遊庠肄業豫章  
書院名噪一時其爲學宏覽約收杯酒談文舉諸經疑義橫及于  
史上下數千年嘗示人以讀書之要熟復後掩卷默誦涵泳數四  
則所得多而不忘辛卯舉於鄉詩文俱粹人爭傳誦會試屢薦留  
京數載無不知有辛克齋者邑舉人某某先後卒京師病親湯藥  
毀親殮襲或乏貲滯都門輒解囊倡贖枯家孝友所得館穀分潤  
仲弟充咸安宮官學漢教習需次教諭未任卒於同年樂明府著  
著有經解古文待梓子天培舉人再午副貢生

郭沛霖字潤桂號雨蒼例貢生爲人渾厚和平歲饑減價平糶貧  
不能娶者出金助之喜讀書人專以經史課孫子晚年家漸落延

師典質以供脩脯年七十三歲親見五世同堂孫柄楠弱冠補弟子員爲知縣崔登鼇所器鄉試屢薦

周其修字成獻號勉齋父學吉積學未售年少喪偶遺二子白撫育誓不續絃人咸義之其修其長子也年將冠幾以貧廢學旋遊庠文名大噪學使李芝齡歲試奇之舉拔萃科旋中順天鄉試詩文俱粹會試薦未售以大挑一等分發福建晉德化縣事齋厨索然清苦如食貧時教士愛民靜以治之時修父就養猶布衣也欲爲援例入國子學苦無賞潛尚幕友貸白金使人抵省將發父知之力辭恐其累也卒亦不能強修負才而不獲大展士論惜之詩古文詞不自收拾拔貢時書福賦典贍可謂

廖斯雲六區人父奕昌以勤儉起家性好施與乞者至率給以升米比卒猶積有白金三千餘兩斯雲厚重木訥父沒子立寡兄弟無賴子窺其富且弱也佯稱假寶給去否則竟橫脅稍不厭百計構陷斯雲不計較率多與之以故積金盡更舉債焉山居士產惟藉竹碓紙爲生竹之重與禾麥同鄉禁禁嚴有竊者罰或鳴官斯雲性寬邏察素弛一日其子往山見刊竹徧地竊者遠颺歸告父命僮往取斯雲曰渠旣費力任昇去可也何取爲其量如此生平未受書顧特重士同里馮豫福初不相識歲暮窘甚偕其鄰藍某來丐貸問需若干曰五六串足矣如數與之馮要期還笑曰君讀書人寥寥者何足道竟不責償後其孫連城十歲從馮受書馮曰



勉之乃祖德厚食報將在汝也連城以同治元年舉於鄉  
宋仕豪字倫廷號文苑父維新正直多幹畧遇公事不辭勞瘁仕  
豪賦質敦龐宅心仁恕居家孝友推誠交友畀以重金不過問卒  
無負者邑有義舉如考棚義倉賑濟城工奎星閣諸要務或獨力  
或倡首皆慷慨無少吝白粵匪竄亂前後捐餉十數萬其他義行  
不勝枚舉常自言曰賊能平便是福痿痺者何必較晚年手格言  
一編訓誡後嗣他人是非長短緘口勿言芒鞋竹杖徜徉花徑晏  
如也年八十二旌表五世同堂子鏞階明炎曾孫煥奎體乾有傳  
宋麟書字吉慶號玉庭恩貢生家貧嗜學爲文根柢經史工書法  
屢試高等從游者多所成就守正不阿邑公事恒倚爲重爲族長  
以嚴正稱年七十九著有文集待梓

顏鳳儀字禎祥號韶九能詩文及書法未冠遊庠登丙午賢書家  
貧母老諸弟不能營生仰事俯畜修脯是賴有餘卽爲諸弟完娶  
教讀二十餘年不私一錢比卒無以爲葬鄉黨宗族高其行誼  
黃星堂字夢詒號坦三幼繼胞叔事寡母得其歡心於本生盡孝  
友道光己酉舉於鄉兩赴春闈絕意進取流覽經史子集考究古  
今利弊恂恂謹飭未嘗以才智先人所著有垣三文稿子屏周末  
冠遊庠

劉如松六區上坪監生辦團練屢敗賊屹然爲一方保障咸豐十  
一年奉札隨優貢廖連城進勦新昌克復城池餉缺鬻其產以償

以勞卒於軍在事皆邀獎叙松獨殺賊殞身卹典不及邑人哀之  
賴炳熹字復廉號曉山性剛遇不平輒怒直而後已不屑爲時文  
而沈沒經史鄉薦者冉鬱鬱不得志年四十得羸疾艱於步咸豐  
六年官軍勦賊於其里扶杖往迎欲條陳時事路遇賊爲所戕士  
論借之祀省昭忠祠

郭文煥字貴珍監生常曰人生不忠良至死爲下鬼經理公項及  
家祠皆謹持管鑰年五十餘尚以課孫子爲務手植蘭數種倦則  
灌溉以適情有姪中寤分金與之子徽典廩生敷典濟南俱文庠  
辛景榮字萬慶號葆真邑附生爲人循循雅飭接管邑安泰倉遺  
穀無幾增千餘石且置產管理龍河書院謹管鑰慎出入眾論翕

然家不豐而喜急人急居家孝友兄弟異母而處以大義俾各毋  
忘先德恒欲聯族誼修家乘而艱於取資卒年四十餘

郭師彌字欣逢附貢生性軒爽邑重建學宮其父已捐貲外復墊  
用數百金不責償友有緩急雖多不吝管理學宮事百孔千瘡振  
興塾補常與其族曉堂森林子俊玉書蔚然炳奎並弟師恭携酒  
談文上下千年動中肯綮忽以勞疾卒人惜之

謝燬傳字廷樹號雲峯一都四邑人中咸豐元年武舉六年辦大  
峯口團十一年與武舉張弼臣帶保安營禦賊羅城獲勝五月偕  
舉人廖連城克復新昌麻田之戰連城先進遇賊兵無後繼燬傳  
獨率勇趨進助勦斂功保升守備

曹啟瑞五區十七都一畝裏源人賦質英勇矢志從戎隨左宗棠轉戰數省累功保遊擊同治六年陝甘勦賊首先陷陣鏖戰至日中中礮卒奏請從優議卹贈叅將銜給卹銀五百兩並給雲騎尉世職襲次完時給恩騎尉世襲罔替

辛學乾號健齋西都一畝人咸豐壬子舉於鄉髮逆踞萬潛謀引官軍入援復郡邑城勦籌餉精殫心瘁力性謙和而抗直有胆氣臨大節而見危致命志業未竟士論惜之子懷之文庠孫際唐舉人考取內閣中書轉主事際周舉人大學畢業獎中書科中書

韓觀字久誠號介候弱冠補弟子員房薦十次堂備者四登道光癸卯賢書主試爲張文毅公帶下郡守牒有韓觀余門下士也品

學兼優素所傾慕之語平生沉靜寡言耄而好學爲文力追先正從遊者多騰達新建夏太史嘗贊文門下年幾七十省垣貴某猶以重聘主講以母老力辭母年近百齡奉養最得歡心孝友無間手訂百餘篇制藝將付梓疾革猶囑其姪卒年七十餘

彭光燦字榮蓀號絢莊以道光己酉武舉隨撫標得靖安把總燦固貧需次垂一紀親族赴省闈必豐腆延寓盡歡乃已重然諾喜與文人遊談經史畧曉大意靖安小邑日練所部卒隱然重鎮同治辛未年十二月齋匪嘯聚夜半突入城縣令潛逃燦輿麾下廿餘人及亥子三子鏖戰至五更以眾寡不敵身被十餘鎗猶握刀作拒賊狀火乃仆時年四十餘與其子三子俱死平明賊潰散

而一家殉難中丞上其事待恤

彭士模字球孫號儀齋中道光辛卯舉人詩梓闈墨族修譜牒六區創龍洲書院邑中增置龍河膏火及修城垣皆力爲倡助掌教龍河及龍洲造士有法卒年六十有奇子星煥邑附生

謝天南字聖恩號箕垣三歲而孤事母以孝聞由議敘分發浙江先用府經歷加州同銜杭嘉湖道劉笏堂以讀書有得諳練老成器重之懋奉差委署桐廬縣丞事悉就埋尋丁艱去哀毀成疾卒年六十子學貞邑庠生

胡芳梅字石峯三區後槎人幼卽亢爽有膽氣咸豐六年赴湖南巡撫賚秉章營由什長授六品軍功同治元年拔補外委四年以游擊補用並賞換花翎五年加叅將銜七年被民團戕害奏請照陣亡例議恤給銀五百兩給雲騎尉世職襲次完時給恩騎尉世襲罔替嗣子克勤襲

郭治秩號攸叙監生家貧勤儉漸臻饒裕邑中義舉量力捐輸倡修四都回龍橋契管木箕江象形山與支祖維衡墳山連捐助入祠爲同支窀穸事親以孝是非無假借鄉鄰有鬥勸處立解延師訓課諸孫不惜俯脯孫備咸豐己未舉人

王光新字士高六區例貢生富而好施穀貴平難待佃尤厚歲歉輒免租嘗率其弟光命脩富山石橋糜白金萬有奇復修潭前灣石橋及橋前後路三十里悉焚以石糜白金二千有奇

湯佐臣三區李家坊監生家賞頗裕負氣不以威屈嘉慶中年赴縣稅契完糧吏胥勒索規不與口角激而具控苦無實據徐以計獲得印白簿疊控於司於撫督始羈省寓既被看管復以計得脫奔即於部察院奏明訛辦丁胥分別定擬知縣革職夫以一人之才力不惜身家抉破內外蟠結之積弊即上官亦無能左袒其屬員使無時而無不有此人則凡藉官爲奸利敢於違章巧取剝奪民財者罔不具有戒心嗚呼此實二三百不經見之事其亦幸而遇朝政清明時矣後有名爲恭者佐臣仲兄子能繼先志生有俠氣而不肯力於學其所經營規模展擴務爲子孫長久計故里輪奐爲近村冠復於宜萍交界之分界地獨闢村莊綿亘十餘

里常以匹馬往來數小時能馳二百里以爲常田畝所在開闢溝澮挑濬池塘以厚蓄洩之利山地植茶油樹芟除雜草木整齊熨貼望而知爲湯某之莊僱工百人年紀相若裝束相若茶油上市則以百人運油至袁出售匹馬督其後肩空而返人各肉半斤復督之回趨走徐疾雖部伍不是過也偶有土田溝界之爭出寸不撓遇謙而能讓者則又未嘗不果於退步也宜春縣曾聞其名密訪之幾致衝突旅知爲曾公加敬焉願助袁城試館修一雨亭應試者均利賴之若得一善駕馭者教以折衝禦侮之資非常人也太平事起而爲恭已老矣惜哉又其後輩有附生名其森者於鄉族公益侃侃持止不爲苟同維持龍岡義倉及地方公益前後將

五十年年八十四例當重遊泮水未幾卒新編合傳

湯肇熙字慶巨號紹卿總角能文龍岡書院開館課士知縣崔登  
鼇親臨甄別甚器重之旋補弟子員年十六登賢書屢上春官以  
大挑一等分發直隸定例舉人以知縣分省用者未曾署事准予  
會試於同治癸亥成進士分吏部四川司兼山東司主事改選浙  
江開化縣知縣丁艱服闋署錢唐縣知縣補平陽縣知縣親老告  
歸優游林下者十數年在官爲盛世良吏居家存先正典刑所著  
詩文亂後散失駢體有絲衣言序聯語尤膾炙人口惟出山草譜  
懷瞻堂試帖早經刊行流布鄉邑讀是書者可以知其爲學從政  
之大畧矣厥弟五人廁身庠序惟元熙咸熙爲時推重迄今鄉人

尤稱道弗置也以下新編

辛孚德字良士號懋齋年二十補弟子員歲科再試第一同治甲  
子優貢本科舉人戊辰成進士刑部廣東司主事熱河理刑司缺  
例由刑部揀選欽派到任縷析條分相國額勒和布嘉其勤能值  
圍場所有囚誣服待決審悉其冤平反之承德灤陽二書院悉心  
主講羣荷陶成政學之暇熟諳醫理都統公崇綺頭痛欲裂應手  
而愈清俸所入兼助弟兄病亟於枕上賦幻景離奇之句所著詩  
文散失子景舒舉人由光祿寺署正改外任陝西隴州知州景熙  
優廩生

賴煥辰原名炳垣號子奎聰敏好學癸酉舉人聯捷成進士以卽

用知縣分廣東丙子充鄉試同考官戊寅補遂溪縣知縣政績粲然教士為先振興義塾增膏火額先是縣人入學者具束修為立小賓興垂永例推所得廉俸分潤羣季御僕從加體卹無刻求愛民從可推矣壬午而後迭應南軒韓山兩義塾聘並總纂潮州府志後乃就養於長子玉森陽山縣淇潭分司署年六十九卒

廖連城號荆山幼穎悟少長孝謹初以優貢入京師歸而課士於高魁書院士林矜式咸豐初年金陵建太平天國分軍四出江西郡縣多不守適彭壽頤亦自京回相與倡辦團練某富倚某紳以分團為阻撓計知縣左袒之壽頤初與縣許既忤於大吏滯留南昌六年回縣復與起忠義軍三戰復上高進駐界埠值大股來援

幾濱於危餉缺而軍亦罷八年大吏重理舊獄壽頤己以積勞故承審員迎合上官意將以重誣死者先是與連共事曾就質供明至是示意使易前語堅執如初可云死生不肯負矣既又辦團復新昌論功以知縣用同治元年鄉試中式五策知名洎五六年以消弭教匪及殲除瀏匪功賞藍翎加同知銜選授湖南新化縣知縣潔己愛民案無留牘蒞官一載頑梗革向盜息民安卒於任無餘蓄賴寅好調劑得歸其喪綜厥生平留心經世學同治十二年曾以海防策上兩江制府後呈遞條件均奉旨咨行議奏素與同縣彭壽頤義甯陳寶箴相友善可以想見其人矣  
辛斌字子兼幼穎悟日誦數千言下筆驚人以其縣案首入泮豫章

決科第一旋領解首十四藝進呈御覽大挑一等任四川南溪縣知縣革淘金病民及傳呈積弊歲裁陋規千數白金民咸頌之而宦橐蕭然晚以目疾改授新喻縣教諭卒於任冠榜才名歸冷署論者惜之而不以介意也著有爨餘詩草曾倡捐安泰倉子天培有傳再午副貢

辛有功字敏士幼讀日不二百字弱冠入泮旋補廩生兄斌中副車薦不售兄以弟一人舉乃中副車再中例不錄凡九薦中第六名舉人榜未發先卒性孝友父得脫肛疾曾入許學使乃普幕歷廣南饒九地卑溼疾作歸至於矢遺牀幕親滌之

辛有守字丁年號任農有猷弟幼穎異年十四臨場學賦及試以

采菽賦命題率不解菽爲何物起卽原題云菽王芻草也拔取冠軍以第一人入泮由廩生中道光戊子舉人馮譽驥督學楚北延入幕總校大挑二等署星子縣訓導選瀘溪縣訓導未任卒

龍炳字興道號庚森道光辛卯主同批其首藝其布局則嶺斷雲連其用意則山重水複尤妙在挾左氏之旨而擷其腴詞因二三場草率抑置副車闈墨旣出風行一時鄉會試倣其格調而獲雋者不一其人時稱爲龍炳調

龍寶號觀堂十三都三番人才氣不羈而以歲貢老工書法得米襄陽之遺至今有一橫直幅與一聯者爭寶藏之

新編

宋炎號子明世富於貲不染紛華壹意嚮學舉於鄉爭頌其文他



富家子所不及屢上春官贊見受知師人五十金然淡於榮名不肯以貲進僅加一員外郎銜而已生平無濫交尤能加意貧寒冬喜御絮袍絁裏而布表一年一新曰此爲輕煖適體非祭祀賓客不慣衣裘冬時每購寒衣數十百事夜靜以與坊廂之凍卧者不令知其所從來敎家有法其女率適士族雖處寒儉均能以婦職自守上下五六十年間縣人之稱富家者所罕觀無驕而好禮庶幾近之嘗獨力修學宮費六七千金他善行率類此蓋能繼先世之志焉

郭賡平號子鈞年未三十舉於鄉旋入貲分刑部額外主事意欲多識知名士冀開風氣之光六上春官始以二甲進士得庶吉士散館改戶部主事既補禮部精膳司主事俸滿以直隸州知州分湖南屢辦釐差歷署桂陽澧靖三直隸州知州既過府班旌過道班留省補用宣統紀元充江西諮議局副議長生平愛名而淡利雅不欲厚自封殖雖值膏腴之地悉審所宜而分用之民國縣城迭陷劫掠及馬步中多湘人輒曰此清官家不得擅入其室故別處騷擾一門獨免孰謂廉吏不可爲哉

丁先庚號中甫由附生中同治壬戌恩科並補咸豐辛酉正科舉人安貧守分悉心教育晚年歷充龍岡書院監院維持株潭義倉自後司出納潔己奉公者垂三十餘年田產日增儲蓄日裕蓋不勝今昔之感矣

潘紹華號祝三梓材子能世其家學教讀而外公私是非一無所  
關涉老而益貧窮且益堅洵不愧於孝廉矣

湯祖蔭號槐秋薦馨孫家世清貧未冠卽以拔徒爲業生平篤信  
陰鷲若常惴謹有祖風中光緒辛卯舉人大挑二等選鄱陽縣學  
教諭未任卒

論曰上下四五十年間縣中舉人之貧而實能安貧者其家不  
足以自給而又肯苟取得三人焉下年踰八十鄉人具有尊  
賢尙齒之心一身尙不困乏潘年逾七十境况日艱而安之若  
素湯以大挑二等得教官既選實缺部文到而人已作古年六  
十矣夫士之所貴曰品曰學品不足矜式而論文藝未矣吾聞

鄉先輩類能安貧舉人率多貧士就所灼見者表而出之讀聖  
賢書家法如此閱者其以是言爲過焉否耶

胥寅亮號硯農少穎異長益肆力於文學有特識沈潛而入於理  
講藝衡文裁成後進不少假借始或疑其未盡積之久而知其說  
之無以易不勝既往之思索性靜定如其爲文以進士選得直隸  
順義縣知縣其地距京一日程滿漢雜居夙稱難治顧其於治官  
事一如治學類非俗吏之所爲而民咸安之旋以下內艱去扶老  
攜幼道送者不絕於途宦橐蕭然卒於京師之宜分萬會館子道  
亨通舟均郡案首道亨畢業於日本高等警務科孫光祿南昌市  
警務科科員

龍發機字錦標號石溪由恩貢中光緒乙亥舉人年已六十自少  
潛心經術屢試不售益肆力於詩古文辭教授鄉里成就後學兼  
研深醫理全活者眾知縣朱升吉疾幾殆投數劑霍然贈以名儒  
名醫額

劉樹謀字貽曾號翼堂由優廩生中光緒丙子舉人考取官學教  
習己丑大挑一等分河南試用知縣著鄧州知州泌陽縣知縣和  
平渾厚書生本色主講龍岡書院決某之必入學羣以爲衡鑒不  
爽云

葉舟號沅秋歲貢生素行敦樸喜爲詩有所得寓之吟詠門臨溪  
水綠柳青蒨之岸斜照一竿翛然意遠遺命題墓曰青山綠水之  
墓可以想見其人子南英以附生考職出身得分省巡檢

高蓉暉號日初思訓子年逾四十以一等一名補廩生乃援例貢  
成均晚年無事危坐終日手不釋卷從未見其疾言遽色經理地  
方公益一介不輕取與株潭義倉育嬰諸舉提倡經營整頓之力  
君多故能日有起色議與不識無不仰慕之至於今未已子玉森  
有傳玉槐廩生玉松優附生江西諮議局議員係鄉里所公推經  
管公益能繼父志醫理有特識每察脉決人生死玉楷優附生文  
筆清雋曾考一等一名以發落不到例降三等某科鄉試值丙艱  
代人捉刀一擊而中自後廢科舉矣

辛際午原名錫洪號會垣一號子範樹仁子弱冠入郡庠以古文

名由廩生中同治庚午舉人光緒庚辰大挑二等署贛州府學教授兼理訓導旋有程某選授到任遽卒將兼理應得之資概予之復集同僚致賻程子始得扶柩歸所學該經史及諸子百家星卜尤精岐黃術活人多城廂各義舉率賴其力調護保全其爲人嚴毅威肅守正不阿足爲後輩矜式子銘恭有傳

辛天培號至堂有猷子幼日讀千餘言四年周五經母得氣疾左右湯藥甘旨必供由附生中光緒乙亥舉人浙江巡撫萬篋軒善其文延之課子姪庚辰選授樂安縣訓導在任候選知縣兼主講尚義醵溪兩書院成材者眾

湯戊三原名杏林字煥南號春甫潛心問學不染俗氛由廩生中

光緒壬午第六名舉人日習大卷銳意進取著有周禮駢言屢主瀏陽洞溪書院講席再上春官薦而不售於三區教養諸善舉加意維持人情景附子兆英兆文兆岸孫克剛克明均在庠克剛北大畢業法學士南城司法官南昌律師

龍友松字益三應飛子沈靜寡言笑於鄉黨恂恂如也文品清高深穩能詞章不徒以制藝見出增生中光緒乙酉第五名舉人甲辰大挑一等籤分貴州署理畢節縣知縣地屬衝繁率以樸厚應之歸時清風雨袖積久乃得成行是真能淡泊自甘不失書生本色者生平所爲文辭散見於各姓族譜者亦屬無多駢體詩賦音節和藹自然成章其需次時寄輓語贈朝議大夫總服兄池翰聯

平生常白適文時讀史武時談兵更飲酒學書天與消閒年七十  
盟耗忍遙聞歛不憑棺窆不臨穴奈黔山印水客中睽隔路三千  
情真語實文氣渾然進士賡言嘗師事之裁成不少

鄒秉鈞號琴堂三區楊塘人性廉介宅心忠厚悃悞無華學務根  
柢爲文不屑屑於帖括庸套學使單地山吳棐瑜並器重之邑中  
髦士多受裁成閱閱家授館動經三五年洵足推濁世師表外翰  
宋君煥奎由英斗拔萃得躋曹司其最著者也食餽廩數十年屢  
列高等而躡於棘闈以歲貢終士論爲之惋惜子懌賢有聲膠庠  
以牖廸後進爲務可謂能席父業者

宋煥奎字璧臣一字佩齋以拔貢生中第六名舉人科舉停罷考

保送舉貢會考得主事分度支部其爲人恂恂儒雅守家世純厚  
之風旣入民國不能苟同又不敢獨異屢長龍河中校於造就人  
材三致意焉變亂環生抑鬱無聊其韜晦有爲人所不可知者著  
有忍冬詩草一册因亂散失

宋體乾號健生以拔貢入貲爲內閣中書改同知分雲南補授永  
北直隸廳同知事不願外克守其職國變還鄉淡然於名利之外  
修同善之業足不入城市人罕得見其面蓋晚年進德爲多矣  
高玉森號昆巖幼警敏十歲學爲文卽清新拔俗應龍岡書院堂  
課山長辛際午亟賞之有歐陽某生呈文講坐誨之曰若不解文  
盍問此子羣輩注目聲名太噪未冠入學旋一等補廩生自後輒

教學以資俯仰而所學益遠光緒乙酉中副車時年二十五愈究心於有用之學經史而外旁及百家與天文輿地並西洋理化諸書尤精於算術曾無師授深思而得之名聞遠近而試輒不售瀏陽文化書院延主講席董事劉某以新學自喜問知算學否曰稍習嗾生徒取代數之最者故亂一二僞爲請益以難之既正其誤別以簡捷法易其式之繁複者乃大驚服主講龍岡書院向例山長聘外縣進士舉人時以其積學能文破除習見及院試闔縣童生取古九人及門者八宜春盧元弼易孫詠孫謀羅城楊子光輩率皆先後來學清季曾以州判分湖南民初充龍河中學校長省視學吳樹楠聽其講物理還報教廳曰高校長講物理說理清析指示詳明在校五年成就者多以疾辭歸談新舊學者不免難乎爲繼之歎

辛銘恭原名帥甲號鼎三際午子讀書行已守家法弱冠入郡學旋補廩生鄉試四次呈薦宣統己酉併科優貢赴朝考未及試卒於京師生平不理公歛不入公門義之所在如某縣任內庇胥吏浮收愬於上得請而後已九江萬載會館太平亂後幾同私業卒使還爲公有城河煤渣壅遏籌款以疏附郭義山暴露撥款以培並以其餘設庇寒所皆其提倡之力也子象恒廩貢生壽恒畢業高等農科充省會農會長全國善後會代表

龍行言字遇樵情深摯古峭不值相知終日默然文氣沉著厚重

不肯作一淺語縣府試十數次未一招覆龍學使湛霖科試以古  
文取第一卽以第一人入泮咨送經訓書院肄業是科呈薦吳學  
使士鑑以考據取第一復以一等一名補廩生光緒癸卯科舉人  
會試呈薦由中書科中書銜改內閣中書供職不一年假歸喜讀  
漢書其散文直入作者之室復以先塋未妥究心堪輿登山臨水  
幾無虛日於地理辨正逐加推勘能發人所未發常以爲只此可  
刊行問世餘不足惜奇門遁甲諸書人所莫解獨能開其奧祕迭  
有批評遭亂散失亦憾事也子蟄原名沐光北大畢業文學士行  
言弟箴言字靖臣聰穎過人初授句讀喜索解總角能文善書龍  
岡課士輒第一人初以爲學內捉刀及詢悉其人謂童生中已有

命中者年十八以府案首入泮旋試一等補廩生其文列入試牘  
未幾卒鄉先達郭廣平於戚家見所書金漆誥命稱其舉重若輕  
得未曾有自不勝愧惜書時以夜左手執燭右手握管一氣呵成行  
言弟鶴言號雲松喜讀史書不耐制藝取古第一不入學其文爲  
人傳誦監生鄉試呈薦再取古入學凡鄉試無不呈薦旋廢科舉  
充龍河中學校舍監規則嚴肅不少假借而與學生甚融洽校長  
高玉森甚倚之其造就爲歷年所未有列前茅者一一到京考取  
升學充休潭商會長建房屋規模宏敞爲鄉邑所罕見籌款達萬  
元兼買田租絲毫不苟充旅袁同鄉會長籌款購置同鄉會房屋  
充袁州商會長值多事之秋措置裕如蓋其奉公潔已才力又足

以濟之也子沐仁北大畢業文學士沐民幼慧髫齡能文與詩書  
畫年十七卒

戴濟邦號經軒歲貢生行文有逸氣讀書所見不隨流俗考取普  
通文官不免窮愁以終所著大山書說可以見其一斑矣

盧超羣字逸園郎附生城北觀溪人貧稟誠厚讀書重宋儒性理  
之學家酷貧而臨財不苟一日拾遺於途候其人而還之曰若不  
謹遺此多金假以他人見之將如何其人感激涕淚謝以半不受  
時論賢之

龍旂光號詡安從賂下湯咸熙遊文氣磅礴議論警動如其為人  
伸於歲科試而講於鄉闈及改策論不啻無意而獲之一上春官  
科舉遂罷既以國大使分浙國變遣歸維持鄉邑之心蓋老而不  
懈也

龍沐棠字蔭桐賡言子幼有夙慧五歲授詩經讀一字識一字讀  
畢任舉何字悉數以對疾手書空一一認識投論語未讀之書啟  
口成誦年十二入北京豫章中學既考入北大豫科取第一屆高  
等文官分教育部社會司候補僉事北大畢業法學士充北京晚  
報總編輯握一時言論機關外埠通訊尤膾炙人口其敘贖造選  
民冊急遽之狀曰江一江二江七江又王一王二王七王八曰卜  
一卜二卜七卜八丁一丁二丁七丁八見者無不捧腹當日知名  
士如鎮江汪鳳瀛江甯鄧邦述桐城光雲錦輩亟稱之年未三十



而卒子旭光上海暨南大學外文系文學士

龍樹霖字湛深石塘人家世純樸至澍霖始淬勵於學畢業於北京大學第二屆理學士考取第二屆普通文官性沉潛篤實而研深數理間病神經己巳庚午之亂其父逸出澍霖以病陷匪區石塘左近均以其父子爲好人故處之久而亦無事己而癒愈其父隨團隊人促使行行至獲富左近之仙人掌有數匪持槍出妹被多傷而澍霖以傷重畢命冤哉夫仙人掌距石塘不十里尙屬近隣然則此持槍者乘間而出耶仙人掌人耶抑非仙人掌人耶當時打倒土豪劣紳之語遍滿村落凡爲正紳及稍有資產者罔不盡室以行其不行者或戀繫家貲妄冀出錢以免禍或別有所恃而不恐平之恃財者人財兩空而別有所恃者晏然無恙或謂其時別有遠近溝通之人然歟否歟

辛際唐字述祖其祖則學乾也蒙不白之諱居莫復之仇心迹可明於鬼神而無以昭於案牘枉屈可諒於賢哲而無所徵於說辭蓋至是則惟有子之重也此南昌魏元曠之論也際唐之父亦可謂能幹其蠱矣而際唐兄弟聰秀能人其業光緒壬寅補行庚子際唐舉於鄉甲辰放取內閣中書竣業法律學校由內閣改郵傳部主事國變南還民元選爲第一屆國會眾議院議員乙卯被迫解散歸而修辛氏幼房族譜遇事明幹果斷縣中諸要公競欲得一言以定從違歷長龍河中學分校縣商會地方財政公所以取

高書集卷之二  
噴噴稱羨道光庚子舉於鄉春官屢薦不售主講義寧奎光劉邑  
文華兩書院多知名士咸豐中葉東南喪亂萬載亦幾非清有知  
縣李吉言率數十人歲暮到黃茅大舒招入改江族人家與辛辰  
雲曹瑞祥等籌畫圖恢復辰雲以世家子走湖南乞師於巡撫駱  
秉章駱遣道憲劉長佑同知蕭啟江帥師赴援蕭統數營由黃茅  
進大舒入參戎幕羽檄紛馳揮毫立就一日偶出某代倉卒不能  
成促速返會臨江垂克以親老歸省辭蕭固留之不能得時蕭威  
望日隆奉令督師入川特駐寶慶復遣使聘大舒來排隊歡迎數  
里既蕭公以疾卒于軍轉入川督幕督軍崇樸由待以賓帥之禮  
一日警報入近郊督軍與籌議但云備器械詰內奸偽合之眾必

不敢來若閉城是示之弱也崇督甚憐之復以親老辭歸崇督贈  
詩云洗盡書生氣堪爲柱石臣鎬鈐隨處有肝膽向人真恨我方  
求友偏枯欲省親江干多戰壘珍重濟時身其相知愛如此適左  
宗棠督閩浙奏令前往仍以親老辭堅不允至則委署台州海防  
同知復調浦城已下外艱服闋左公再奏入西征幕以知州權守  
慶陽時敗瓦頽垣蓬蒿滿目亟爲招集流亡開墾通商且以其暇  
修公廨建書院築城堡旋調寧夏濬渠立學栽華圃規時督軍禁  
種鴉片急寧夏有老人泣留半畝許者因而中傷之復乞歸養倡  
建正誼書院左觀光閣右藏書樓移家藏書經史子集具備貯之  
於樓藉資後輩瀏覽後人因名其樓曰懷謝樓易觀光閣爲臨風

閣以志不忘曾譚鍾麟督陝甘重赴隴命總樞甘南釐局且附片  
奏謂其前守慶陽甯夏實心拊循至今士民愛戴擬調守蘭州無  
何疾卒享年六十九長子邑廩生家修早卒次邑庠生培堃

論曰道咸之間縣中舉人之有名者曰彭壽頤曰辛辰雲曰謝  
大舒壽頤才氣過人有不可一世之概卒以保衛桑梓籌餉濟  
軍與鄉紳爭織芥之嫌見屈於地方見屈於大吏雖以曾國藩  
廻旋之力尙不免於玉碎然國藩固以爲江右人傑也壽頤雖  
不獲廁名於國史亦既見之於曾文正奏議已成不刊之典其  
他紀載猶歷歷可數也辰雲敦品勵學生逢亂世拮据艱難餉  
而出於勸勸而或出於勒不免積怨於富室而亦多見忌於士

人於其卒也莫之恤也豈不冤哉大舒以清俊之才屢參戎幕  
以蕭壯果左文襄譚制軍之大力交章馳上陳臬開藩至於建  
節不難也卒以州牧而丞而守不獲大抒其蘊蓄然則功名之  
會可易言歟

盧熙典初名汝寬號敬五少孤母背撫之成立既就外傳訓之曰  
汝豕世以積學未顯其無忝爲明德之伎乎則聞而自奮辛亥舉  
賢書母愈策以進取已亦銳志入都館胡小篋總憲豕總憲文章  
有名書法尤推祭酒頤謂以爲書善也曾賊氛告警舉人彭壽頤  
辦團練以書速回察鄉團籌餉甚難且粵匪終不足自爲賊退仍  
益理舊業初壽頤以分團合團與知縣李爭持構訟中丞陳啟邁

高書見元  
怒彭下臬司惲光宸管責而彭力見賞督帥曾文正國藩適文正  
以軍事與陳黜黜并案入奏褫職惲先行解任未幾復來撫江彭  
嘔血死乃亟速辦團諸紳將悉委咎於彭則投袂而起優貢廖連  
城請借遂同至省跪室皇獻員手一紙勸警日端答以義不可負  
故人堅不具結卒以獄詞消案而過大挑不赴以克復新昌功保  
知縣戚友自勸之仕首曰今世士非出館閣不貴吾將以副胥孺  
人之望也十上春官不第眾論惜之

盧炳黎世貧顧恢奇自喜不以屢空櫻心里有巫祝假神道歛錢  
惑眾遠近騷擾立驅出境受業於某孝廉折節自勵駸駸以文學  
稱矣光緒乙亥秋闈抱病同舍有故人善視疾爲審方調理備至

首藝竟度不克終場以文授之而出榜後有追咎之者笑曰天倘  
不負豈再無脫穎日乎丙子闈文爲一時傳誦榜前有窺闈中刻  
墨者遽走相告抵掌稱快頗鳴得意及謁房師語以次藝失法度  
非首墨已鐫幾復黜乃爽然自失生平習於世故既更事久顧時  
裁以大義不曲徇私云云

楊守洛號直坡幼慧爲文便能驚人同儕以神童目之弱冠肄業  
東洲山長羅寅生許爲發品以府試第五名勝泮領壬寅鄉薦明  
年赴河南會試不第清廷變法同好勸其晉京考職取列二等得  
以州同選用顧念母年八秩且世變仕雜不願溷迹其中與爭權  
奪利者伍祇求潔身以事親一無所玷而已宣統初舉行新政當

選爲諮議局議員每建一議批郤導窾切中事情不愧爲人民代表既返里復教授東洲中學學者仰之幾如泰山北斗云

謝日郊號謙福生彌月而孤母鍾年二十一居貧守節以養以教甫成年卽有太志塾師袁某器重之以兄之子妻之弱冠負笈東洲書院山長邵鶚秋孝廉劉邑名士也策問漢書及三國志擬義衆多莫對乃條答纒纒如貫珠卷入衆讀其文皆歎服縣府試送列前茅未售當清咸同間東南弗靖摘錄唐宋明史畧各三卷及鄭志馬考馬步舟車陣法共二卷以備參考應用時堂兄大舒幕贊左節相西征函請往竟以母老辭袁夫人亦願公暫勿遠離上以慰大夫人心下以玉濟沂兄弟於咸云膺贈文林郎奉政大夫

馬熙然號連炬資性純孝研究典籍年三十六補弟子員聯捷舉於鄉宣統季年以府參軍需次贛省承辦廣信鉛山廣豐諸縣倉儲親查勾稽不遺餘力閱兩年彌補缺額穀達四十餘萬石使車所歷不名一錢旋補建昌缺副監南城等五屬大守張公其鑑深倚重之自出山至解組前後十餘年直情徑行誠歸然一魯靈光也

溫佩謙號益齋光緒戊子科舉人早歲教品立志績學能文爲鄉里所推重在家隆孝友崇儉樸族衆舉爲族長與湯成三孝廉友善修家乘湯君序弁其首辦理地方一切公益事稱莫逆焉晚年任東洲監學日以蓄道德能文章爲生童勸時山長劉厚卿孝廉

新昌高尚也煮酒談心引爲知己云

謝鍾璧號奎堂其等茂才也讀書穎悟過人有友堅約肄業東洲書院試輒上等院中生童百有餘人均以高才生目之赴府試名落孫山地璧不介意遂入化城巖寺中個人簡練夜以繼日數越月學使者至識拔於稠人之中實至名歸論者以爲非偶然倖致也未幾病暗不能言學者以其暗於口不暗於心也爭往師之筆談指畫莫不怡然渙然由是益知名與胞弟寶銓稱爲難兄難弟而嚴氣正性目不視惡色耳不聽惡聲遇事主持公道有古人遺直風焉

王廷揆號理齋光緒甲午舉於鄉高村有高魁書院先東洲成立

民國以遺改爲高級小學廷揆首倡加捐創立新會修校開學畢業數次卓著成效東洲捐入袁州中學亦與有勞先是續修家乘嚴定規約監學東洲書院參訂學章均令人稱道不置

馮濤號月樾恩貢士多智計善說辭清季考取安徽縣丞未赴在家襄辦蜀江初小學校又偕同志謝晉臣李小白等創辦成德高等小學更立崇德堂以扶助之復修祠粟主煞費心力士林紀念不忘晚年壽踰八旬與邑進士龍膺言同時重遊泮水亦與數云謝夢丹字有濟號雲九遊幕甘省以回案保巡檢甘省底定保縣承賞戴藍翎假歸監修正誼書院工竣復回甘省時魏光燾移平慶涇道總辦糧臺及全省報銷夢丹與有勞保知縣加同知銜既

委環縣知縣因勞致疾未期年回省卒宦囊蕭然歿無以殮

鍾照離號謙甫弱冠遊泮水年四十舉於鄉再上春官不售以知

縣註册請簡歷任縣城統計處會長東洲中學校校長勸學所所

長並倡捐登瀛堂增加教育款產光緒己亥重修家乘任纂輯丰

采宛然洵足模範後進云

袁在鎔號庚甫歲貢生結廬長垣山麓因號長垣山人蒔花淪茗

詩學袁簡齋暇輒吟詠一篇出爭傳之長明體高小學校年已入

十趨健若飛能作蠅頭小字誕辰詠詩見志和者盈尺都爲磚玉

集排印

劉仙瀛字鳳池幼慧弱冠游泮補廩生多以遠到期之則彌自負

與同社友以學行相砥礪家雖貧泊如也於古文詞時有心得澹

倒半生晚課後進多所成就子俊民尤傑出武昌高師畢業

謝青雲字有金十一都人曾以戰功給五品銜復吉安保千總克

黥縣建德等城堡以守備賞藍翎同治元年解徽州圍陞遊擊賞

花翎解青陽圍保參將加副將銜陞協鎮加總兵銜卒於金陵營

次派兵護喪歸葬

謝堃堃原名寶銓號選卿邑增生敦品力學有大志真歐陽公所

謂蓄道德能文章者而政家以孝美里以仁人無間言尤樂得英

才而教育之祖居宜春章家塘門下士合宜萍湖萬四邑游泮食

餼近二百人登賢書歌鹿鳴者亦以十數乃文憎命達鄉試堂備

呈薦十次不第學使咨送經訓濠章未往士論惜之真羅江東流  
匹也中于啟宗號翰臣博學彊記專承庭訓習經史帖括及古文  
辭與堂兄日郊齊名既取古入泮補廩食餼光緒間龍宗帥取高  
材生送經訓書院肄業嗣以歲貢候補訓導清季入京考職分發  
廣西縣丞時廣西候補道劉君良生東洲業師也相知甚深力薦  
任容縣長安司分司調著古砦司分司及桂林清查局委員適民  
軍起義歸隱章家塘里第獅山兩等學校聘爲國文教員既又任  
萬載正誼高級小學校校長經師人帥人謂家學淵源有自焉  
曹瑞祥號慶餘少從明經徐樸菴游聰慧內隱年二十四補博士  
弟子員道光甲辰舉於鄉咸豐初粵黨石達開進陷江西數十州

縣邑令李吉言失守時近除夕避入黃茅鴻臚第密請謝火舒謀  
適邑紳辛辰雲至曹家乃借謝與令潛商促辛往湖南請援謝介  
函先容楚中丞駱遂命道憲劉長佑同知蕭啟江分道援江至鐵  
山請謝入幕已與辛籌餉濟師嗣虎威軍恒字營踵至卽辦團資  
助防堵不數月克萬載進會劉軍克袁州時太平軍漸退官軍勦  
除脅從拿刑拘監先後賴救全者百數十人繼將離局同事以保  
衛桑梓固留遂不計危險力任之在局垂三十年設義倉修縣城  
罔不舉行嘗集經費數十萬金從不以一錢入己人有被誣罹重  
罪不能解者必隱爲申雪或酬以金陵拒之曰我若要錢資不至  
是也尋修邑乘謝病歸不再預聞公家事構草廬後園藥爐茶鼎



爲終老計先是粵事平敘功奏准以知縣用部文催促公蹙然曰  
向者不作是想況今年已七十餘乎適門人任玉琛令浮梁迎至  
任所旬日見宦場習氣大深旋以病辭歸光緒甲申十一月以壽  
終生性剛毅峭直見人有過面責無隱而疾惡尤嚴常恨不爲瘟  
神收盡世間歹人晚年一腔熱血每借杯酒洩其不平德配謝宜  
人舉丈夫子七其季邑附生懷清志行有父風

李眞實號樸軒方頤廣穎魁梧奇偉發強剛毅不可以非禮犯然  
仁慈豈弟無疾言遽色秉性聰強邁羣刻苦攻讀常數晝夜不  
輟經史子集百家學說罔弗瀏覽旁及醫理堪輿以博學聞年三  
十舉於鄉大挑教職任義寧州學正與王知事闡明性理諸書存

識去僞實事求是當時士大夫囿於歷史觀念矜尙詞章乃特注  
意經濟事業以誠正爲主以格致爲務任南昌縣教諭兼本省孝  
廉堂及豫章友教各大書院監院咸資表率砥礪廉隅一時士風  
因而丕變蓋作事務其遠者大者不瑣瑣於末節不隨流俗不媚  
權貴雖遭時不偶遯世無悶以教職終其身云

葉南英號芾棠歲貢生空來山人沅秋季子清末停科舉丁未考  
職南英以秀才得二等分發本省典史未就歷任東洲勸學所長  
教育會長袁州中學堂董事東洲中學校國文教員家貧親老奉  
養盡禮而親仁樂善性情活潑有瀟灑出塵之致善詩文綽有父  
風著有聽濤軒文稿待梓

馮岑號島三潭華人性豪爽有俠氣辦理鄉邑公事保甲團練胆識過人有推倒一世之概與萍邑歐陽璠本邑謝大舒爲莫逆交聞戰不利卒以一衿老士論惜之然自岑以上四世由岑而下二世秀聚一門有九代書香七代秀才無間斷之盛其三世孫藩爲國犧牲歲得政府卹金四百元詎非鄉邑中得未曾有者歟謝協寅號恭忱一號空塵父志崇績學未售課篤協寅既入泮協寅歎曰泮水思樂樂安在哉余家貧親老幸博一衿使親身見之親樂余乃樂其樂也已任正誼高小學校校長考取法官任龍南縣承審員國變歸里偕辛心禪研求佛學皈依淨土宗歷有年所無疾而逝

萬載縣志卷十之二

人物

彙傳 寓賢 方技 仙釋 雜記

王永誠性倜儻琴書自娛不樂仕進構綠筠清室與易節郭瑾諸人觴詠其中觀察胡欒記之有綠筠詩卷藏家

袁秉清進城鄉人正統十二年助賑粟一千六百石給冠帶天順五年又助六百石立石

楊火瓊東都人正統十三年助賑粟一千六百石給冠帶

彭希節東都人景泰四年助賑粟一千二百石旌表義門

周仲信西都人景泰四年助粟一千二百石旌表義民

龍志霖景泰七年助粟二千石題旌

辛秉儀西都人成化三年助粟二百五十石給冠帶

龍時清龍時振東都人成化三年各助粟二百五十石俱給冠帶

陳福柔白良人成化間助粟官倉數百石賑饑題旌有碑

龍大志成化丙午助粟賑荒給冠帶

龍大寧奉例納粟備賑有司獎賞給冠帶

郭孜仁號洞山性逸宕不羈與邑士以詩倡和後薦召抵京襪經

歷不仕歸卒年九十二

李廷顯徵古後裔宏治間修龍河浮橋橋圯復改立渡又設渡林

家磨建亭憇待渡者修竹潭橋及上峯矮阪石橋更鑿井山麓

濟渴發淨安寺前路三百丈舉鄉飲卒年九十六

龍尚茂字觀美幼失怙能自立邑有義舉必與正德間積粟數百

石平糶濟荒知縣陸璫獎之

龍昇震奉例納粟備賑知縣顧獎給冠帶

彭本鑿號兩江家不豐而好施於所居小水水口創建石橋上列

屋數楹工方舉曾疾卒子襄陽教諭遵教畢其工人稱兩江橋

諸太史大綬爲記

龍郎嘉慶十九年出粟賑荒給冠帶表曰義士

宋一鳳因雙虹橋圯捐貲改建石橋具載橋碑

鄧南春庠生屢試高等晚年捐粟備賑知縣劉舉鄉飲給冠帶年

八十餘卒子繼守年亦入秩受冠帶

鄧南居年九十六舉善民鄉飲十二次給冠帶

龍濟亨性深沈有俠氣邑令周曾遭官誘挺身代雪一時稱奇

胥橋東都人性長厚嘗捐修高村石橋萬曆元年以近郭徐家塘

田七十餘畝并四圍山場概助學宮院道獎給冠帶孫大順大

化游庠按舊志載半價入官後橋子孫照補半價百二十緡充公因參改

張桐號後峯宅心公平喜爲人解紛萬曆改元給冠帶知縣徐一

唯常延訪以得失年七十四卒

彭池萬曆三年正月父蹕病危遇游方僧指點割左手肉和藥進

之愈知縣徐申獎

辛曉鳳生平好義萬曆十六年灾荒人茹草根樹皮惻然曰何取

有餘爲出粟三百五十石助賑院道獎異後舉鄉飲

孫如琳萬曆戊子己丑輸粟備賑鄉黨賴之子益美游庠

譚熈字德明幼習舉業論時務得失洞悉窾會里中人有緩急竭

蹶相赴萬曆丙子龍河橋圯於水獨力重建己丑大祲券而求

肯差寺投之粟貧不能償輒焚其券一夕鄰燬於火燼居且危

迫忽風反而免咸謂善報臺使者旌其門給冠帶年九十六卒

龍匡仁庠生饒於財平時修橋葺路荒年濟族賑鄰知縣鍾甲皆

重之子運開亦游庠

丁顏八字爲甫萬曆中父守忠久病不痊因叩天流血割左手肉

青蓮縣志卷之二  
熬湯進之愈地方呈縣申獎

鄧繼寵事繼母以孝聞爲人謹厚公平年九十七舉善民屢赴鄉  
飲六經按院獎賞

龍匡信性醇厚事繼母以孝聞知縣畢申獎隱德

王珪蘭樸雅篤實年八十七舉鄉飲給冠帶子覲恤族賑饑知縣  
畢委督修城有功亦舉鄉飲不受

袁鉞字伯威樂義好施里中有善舉必捐貲襄其成建牟村橋偕  
其姊節婦出金爲首臨終凡借券皆焚之子汝楫庠生捐修東  
樵書屋更名東井軒延帥開義館歲助館穀貧家子弟多賴成  
立

宋福謙號柳潭事親孝多善行知縣畢舉鄉飲子良翰篤學善詩  
萬厯歲貢未仕卒

辛御典好善樂施人稱長者知縣畢獎以額年九十卒

歐陽學孝友謙和知縣畢以樂善申獎

王萬行以掾吏任貴州鎮遠稅課大使恪恭厥職院道獎異張壁  
贈有詩卷

郭宏量字懷悟好行其德曾捐金爲友置妾延嗣修葺廣報觀崇  
信寺揚公嶺路康樂兩河宜春秀江安福鳳林諸橋皆出金以  
助又創建峰頂山大尖峯庵置香火田倡修宗祠三舉鄉飲不  
就署縣侯舉爲鄉約卒年九十三

李耀芳萬歷年間買田二百餘把助學署縣吳額獎之孫時植時  
樞游庠

譚德宗庠生安貧苦守襟懷灑落彭之龍宋九德輩雅重之

汪自東字二憲屢試高等以數奇老諸生生平尚義蠲貲周急時  
饒田鄉痘疹盛行嬰孩暴亡自東或施湯藥或給食用獲全活  
甚眾咸稱廣濟先生至老抱病子會通封股以進雖未獲痊猶  
延喘數日亦不忍父死之一念云

周名恭父母早亡撫幼弟如子事晷叔如父賑貧恤乏有古人風  
兩舉鄉飲子經邦游庠

陳仲植好施予族鄰喪塋不辦卽捐囊助知縣陶給冠帶舉鄉飲  
後修丁田橋助木石不計寸懷信亦樂輸公

鮑奕明乳名坎仔賣腐膳母萬歷中母病危封左股和藥愈院道  
獎之母受督學胡給銀助葬

楊仕紳庠生割股救親知縣倫郡理伍交獎之

龍洪泰卹貧賑荒邑令倫獎之行善愈篤月給多江渡募費葺水

府廟晚年得子構砥玉軒專師課之年七十卒子延璧游庠

張汝術爲人忠厚有犯不校貸不責償知縣倫獎之年八十三

鮑燮急公好施知縣倫給冠帶舉鄉飲後助修丁田橋

辛明都字建和處族黨一以仁讓有不能婚者力爲完娶知縣姚  
舉鄉飲不就子守忠庠生

翟章昌甫之後積德好善捐修潭埠橋過饑輸穀助賑三舉鄉飲  
壽近百歲

周民蒸少通經籍耽詩詞山林寺觀多所題詠鄉里推爲亭老一  
切利弊興革勘踏修理悉秉公正舉鄉飲固辭年八十九卒人  
稱古雅先生

丁承坤年九十二知縣闕舉鄉飲給冠帶後督修丁田橋有功

郭宏翔醴謹慕義與物無忤萬懋中有侵其祖瑾墓者廬其側三  
年得以無事卒年七十三子一偉廩生一俊一傑一伋俱府庠  
孫士佩士進歲貢生士進士玉俱邑庠  
伍夢熊急公尚義修丁田橋與有力焉署縣張舉鄉飲

彭世懋字德開庠生澄之後嘗捐修翠巖書院集俊髦砥礪其中  
風雅而尚俠士樂交之施棺修路傾貲不惜世懋席累世宦業  
積而息之致富易易耳顧置不問獨於先世著作及有關宦蹟  
文字蒐輯珍藏以示子孫亦有足多者

喻應瑞號合川生平詩酒自娛賑饑砌橋築庵皆不吝曾拾道旁  
遺金追而還之不受報知縣姚給冠帶年八十九卒

喻應楨號慕衢喜讀書好吟咏凡置義田修路平糶皆助焉知縣  
姚舉鄉飲

周以銘稟性忠厚值歲饑出穀以賑萬懋中督修康樂橋獨任一  
省二墩澄渡興江津梁皆爲修葺知縣姚旌以額

張顯庠生萬感中修康樂橋獨任一管知縣姚舉鄉飲子大維孫  
奇珍庠生

張文儀泰昌元年母宋氏雙目掩瞳數醫不效文儀方童稚慟泣  
顛大願以身代割左股和藥母目復明知縣姚題旌建坊

孫耀宗字文字年十二卽持齋見庵觀佛像頽壞橋路缺陷輒捐  
助修理貧不能娶者助之娶家以是落不悔年八十卒子希聖  
游庠希賢貢生任寧州學正

彭紹美字世濟幼孤撫弟倍篤性敏而文屢試弗售遂棄去以課  
子爲事子復古式古皆以貢任教諭

彭天資庠生壯志弗爵遂耽隱家無擔石儲嘯歌自得萬感丙辰  
舉鄉飲給冠帶年八十四卒

陳曰俞父生員天表病危割左股和藥進之旬日而愈時年方幼  
親鄰欲舉報曰俞固不可遂寢彭自新爲作傳

周汝謨增生苦志潛修持身耿介鄉黨族戚無間言年六十八卒  
彭天贊以掾考任福建建寧主簿若官有聲在家修橋葺路凡饑  
疫死者施棺瘞之并豎石亭於龍河渡林家磨爲行道憩息所

彭應成由典吏授照磨自甘隱逸致政不仕若家奉法循禮

彭夢瑞萬曆中母冷氏雙目內障夢瑞齋戒七日割左股和藥母  
眼復明題旌入明史孝友傳按明史作天啟年間事

汪自霖字躍龍三歲失怙事母孝有田六千餘把以多讓兄自取



三分一資膳養而已子德度游庠

龍宗海大啟二年母鄧氏病危遇醫執方書示以股肉可愈夜自  
割炊而進之幸延六年母歿事繼母辛如所生知縣陳申獎孝  
行

龍九錫號榮所歲貢不仕貞介純謹苦志力學常自作水龍吟年  
八十卒

郭萬嘉助棺賑饑拾金還原主邑稱善人子士玠等游庠者五孫  
九人爲諸生

譚嘉憲家貧奉母以孝聞拮据教子子經黼游庠  
張正亮賑饑修路葺橋梁知縣李舉鄉飲

歐陽啟桐崇禎四年同男侃四送杉木百株修學知縣韋明傑額  
獎之

辛應象崇禎六年母彭氏病篤割左股救痊次年復病亦如之知  
縣韋優獎

周樞生平樂善子某游庠早世依姪貢生顯終其餘年崇禎八年  
知縣韋擬申獎適卒年九十六

彭以筐號紹塘性瀟灑結精舍桃花巖口延師課子生平疎財好  
義知縣曾宜高舉鄉飲孫鴻鷗邑庠

聶興煥字文吾謹厚與物無忤濟乏施棺里中稱仁慈長者卒年  
八十八孫璧成庠生

周卿邑庠生樂施廣濟而舉鄉飲

譚飛龍有聲黌序亦兩舉鄉飲子燧孫嘉儒俱游庠

張周勉錢糧早輸而舉鄉飲

龍霄年九十五歲三舉鄉飲

清朝

辛明韜字鳴泉父光英篤行孝友隱居自適縣舉鄉飲不赴韜少

讀書家貧服賈養母母喪年已七十猶呱呱作孺子泣家既漸

裕以周急解紛爲樂尤好行陰德如遺遺焚券諸事願妻子不

知也爲七房族長五十年宗規整肅邑侯韋請爲介賓四飲於

鄉范侯至其廬賜盛時人瑞額御史筮重光廉其良善特加優

獎卒年九十二子敏芳有傳

楊一龍字猶龍少孤祖遇用課之讀詩文皆精贍教授生徒專事

醕正貧者悉爲曲成邑令陳公瑛邑紳喻子賢皆延入治所爲

子師所得修奉悉公之昆弟爲營舍資性介不容人過友朋敬

憚如嚴師家雖貧恬如也子發庠生

辛炤字元弼順治初歲貢知縣高鵬起甚重之嘗助土二丈創建

文昌閣

劉應選字柱石濟困解紛爲鄉里推重世隸軍籍領運三十餘年

不惜破產以全族眾順治丁亥奇荒輸粟賑饑知縣高鵬起額

獎之凡兩修環溪古剎助出資香火卒年八十一子世傑有傳

譚經祺字謙夫性慈好善嘗遇商人衣被罄空遂解所有與之渡江拾遺金坐待原主歸還徵稅祺其人幾投水焉丁亥奇荒備席糜餓孝子偃拔貢生

王試琦幼失怙事母以孝聞丁亥奇荒散粟給族全活多命鄉有爭訟多爲勸解人稱彥方再世年登八十有六

郭一鳳字文徵性嚴正直聲著於時訓子姪以敦睦邑令梁嘗造廬致敬焉卒年八十三孫邦藩歲貢任崇仁訓導

郭大章字孟弢邑庠生幼出繼事所後所生以孝聞志行高潔知縣韋明傑目爲奇士年八十四爲族長諄諄勸誠咸受薰陶後舉鄉飲子闕遠孫達士綸俱游泮

龍璜字匪石邑庠生好讀書制行端方不入公庭教子孫以行恕年八十猶應試弗倦

聞斯達字則兼邑廩生家貧好讀少廬父墓朝夕焚香祈母壽日記功過著有周易講說及門龍文炳等廿餘人誦法不衰

唐之臯字克允邑庠生性醅厚堂兄家貧同衣食二十餘年兄歿撫姪如子田產婚娶皆仰給焉予聞晉邑廩生聞仕庠生並以文名孫裕猷武舉光華光表裕才俱游庠  
龍堯典字君則事寡母至孝待人長厚有古人風子學勤孫韜俱庠生

宋文芳字毓和家故貧事父母能如禮仲弟季弟欲異爨芳涕泣

勸止後析產取瘠推肥人皆賢之年七十四卒子元輔孫映蛟  
應發俱庠生

周煥字炳如庠生好讀書曠達自喜家貧無戚戚容姊子敖璉甫  
二歲而孤煥攜與同居教誨如子洎登賢書猶撫摩若嬰兒璉  
亦依戀若父煥沒乃歸敖母事煥妻不衰

辛汝楫字以濟邑庠生事繼母得其歡心嘗貸銀爲人完娶後生  
四子慙不能償轉撫慰之方康熙戊午饑家中落日惟食粥見  
鄉鄰乏食者仍分給焉卒年近九十

郭邦重字伯仲爲人醇樸貧能自守年踰八旬卒

劉世傑字漢臣邑庠生豪爽樂善歲饑買米賑濟全活甚衆居家

嚴肅喜接賓朋撫姪惠愛族屬稱之年踰八十卒子宗向宗理

孫洪範俱邑庠

郭士聲字公選西都人性剛介是非不少假借無隻字入公庭壽

九十六子磐邑庠

鮑椿齡字俊升庠生以孝義聞母病痢椿齡妻服侍甚至姑愈而

氏染疾卒齡時甫三十終身不續娶或勸之曰妻爲吾母死何

忍更有妻年九十六歿參府志

汪世豐字維新東都人以勤儉起家鄰里是非力爲排解待師尤

敬知縣何錫命龐驥額嘉之壽八十六子廷麟庠生廷獻歲貢

生任訓孫之圖歲貢之文之永庠生

易象乾字子清西都人秉公仗義爲邑長所重壽八十九

汪映昌字選元東都人性好學九旬猶試童軍夫婦齊眉俱九十  
七而終

郭士奇字公亮西都人少孤善事寡母刻苦自勵爲諸姪完娶年  
九十三

辛汝梅字以調邑庠生重然諾尙氣節康熙甲寅戌午間兵荒相  
繼人多死徙竭家貲招集賑貸保全無算年逾九十知縣許松  
佶舉鄉飲并贈以詩聯子符鄧禹俱諸生

易聯也東都人雍正元年溫上貴之亂知縣施昭庭率鄉勇捕勦  
聯也捐餉三百石事平知府李春芳額獎之

鄧興生拾生員郭邦績銀拾兩零還之不受謝題旌建坊

龍芳字九仁二都人質醜厚修橋賑乏課子期於有成年九十二  
子應雯應鰲應雱應霆俱庠生

易宗聖東都人業縫衣幼失怙母有所嗜一一遂之遠召縫者不  
就母嘗曰汝不能娶以我累也跪曰母一而已年老難再妻可  
求亦可緩已而母病危割左股和藥進尋愈

胥振勳字首標庠生八歲通書史父喪哀毀如成人絕意科舉知  
縣劉體元遺書勗之答曰有郭外田足供餽粥以養親不願仕  
也母歿廬墓三年

鄧際可字禮仕邑廩生雍正年間捐百金倡修康樂橋邑義舉多

所樂助子鉉鏞俱有傳錡文庠孫斯沂有傳斯淑斯鴻文英星  
輝皆文庠弟郡庠際明字東啟有二僕均爲娶妻生子一日出  
身契焚之曰無貽爾後嗣累并各給田贍焉際明子錕嘗倡助  
本支成室廼其祀撫佃人孤孀完其節亦可謂能繼志者孫汝  
瑛增生

辛金世字儀文孝友喜施父早歿長兄另爨遠居金世提攜二弟  
不有私財乾隆癸亥饑邀同志傾囊以賑活人甚夥知縣嚴在  
昌以誼切維桑獎之

辛汝灝字定遠歲貢生父金聲在庠序有名灝敦行力學喜周人  
困捐修道路若石岐及牛角冲上下高田費三百餘金卒年八

十七

龍喜齡東都人乾隆乙亥饑減半價出糶乙酉又饑流民載道長  
子培次子琦又半價糶儲粟不足乞糶以繼貧不能糶者設粥  
於家賑之凡二月捐金七百有餘

辛金鱗字池飛年十五補弟子員事繼母以孝聞癸亥歲饑出穀  
數百石半糶知縣朱崧額獎之

胥袁字補之郡增生仗義疎財修康樂橋遷建文廟皆量力捐貲  
倡乾隆二十四年捐田十九畝助龍河膏火知縣張立中守備  
沈瑄並獎之舉鄉飲年七十九卒

易瓊字廷選監生讀書好義邑改建學宮形家以文峯爲言瓊慨

捐七百金建塔南城外科名由是增盛今後裔置產爲修塔費  
辛廷臯字欽堂歲貢生學問深邃文章恬雅從遊經其指授悉有  
規矩遷建文廟勸捐經理以及勤稱知府陳額獎之

聞廷佐字宏毅例貢生性慷慨乾隆癸未乙酉間連歲荒廷佐謀  
於族減半價難以濟本宗復謀於邑有力者捐貲買常平倉及  
鄰邑穀佐以雜糧各坊一局學爲總局平難以濟城鄉全活無  
算子附貢生之詠有父風嘗捐田三百餘把爲族人授室資

陳賢書字秀升監生乾隆乙酉大饑捐金四百平糶多所全活

彭賢賡字韻洋邑廩生博學能文工詩精於考掘性至孝出爲世  
父後事生母與所後母俱得歡心生母亦寡並爲請旌建坊爲

人公平嚴正鄉里推重屢薦棘闈四十七歲卒著有碧蒿藏山

稿分宜林進士邑人辛少宰爲之序子才囊文庠

辛金騏字鶴廷佃儻好施乙酉平糶人賴以濟袁家墩有貧鬻妻  
者輿在門矣召其夫予金全之遇行不協義者據理直繩無所

阿曲

辛錦瑤號崑圃邑庠生爲學宮首事修文廟建考棚立育嬰堂悉  
有力焉善解紛身未嘗涉訟卒時老母尙在遺命以孝服殮

辛標字中文庠生孝友出至性念兄食指繁讓父產而多子之歲  
饑倡族平糶戚族告乏解橐不吝有無力婚娶者出金爲完配  
而自奉儉約脫粟緼袍晏如也創祠宇置祀產建城隍廟皆身

任其勞次子炳席增貢生灑落有幹才工左手書於坊市族祠  
諸事能持正無瞻徇有疑難數言而決邑公事時賴匡襄孫家  
辛源歲貢曾孫有猷有守舉人

鮑啟仁字子良監生慷慨好義倡立潭埠社倉獅子橋圯捐募增  
修平糶發路從不少恡嘗捐金置祠產後族拓祠建塾咸取資  
焉子震岡武舉忼爽有父風與歐陽韶仁倡立樂育義塾獨築  
上潭堰開石圳農田賴以濟以五世同堂請旌年九十卒

歐陽韶仁字德安急公慕義尤篤本原既倡首新大祠構支祠並  
置祭田以維永久又倡建義塾以教族子弟若潭埠樂育之建  
合鄉人士咸賴之歲遇荒歉設法平糶晚年值邑公事力肩其

任至顛踣風雪中負逋鬻產不爲悔卒年八十

易大有字德成武庠貌俊偉喜讀書交游皆文士購書延名師課  
子伯仲皆以文入泮三子金鳳武進士四子金麟武舉以金鳳  
游擊銜例封武翼都尉

龍賓字羽卿歲貢生擅書名足跡所經求書者屢滿戶外賓至疾  
書各厭其意意所不可無能強也年六十餘卒

郭功曦字恒庭例貢生少孤事母孝以貿易致貲財伯兄中窘助  
之數百金邑值多故墊用至千金竟持空券不責償辛卯饑平  
難儲粟數百石又如數貴買以濟之捐助寒衣局經理多載悉  
得宜又捐田百把助賓興家累日深不顧仍延明師課子孫子



陶文庠

高樹藩字芸圃監生有幹才敦族誼倡構長溪支祠共十房合祠  
既與孝廉湘文捐貲倡首身走各鄉村聯絡勸輸司其出納積  
而息之凡數十年卒底於成又以其羨置祀產立郡縣試館族  
人翕然咸服推爲族督邑有大事慷慨直前受千金累不恤尤  
尊禮文士子作揖部附生孫在梁武舉在志文庠

張學鵬字搏萬監生有至性兒時遇歲祲見父母憂迫私詣鄰  
嫗借粟聞者咸異焉初習舉業因貧就商父歿兄且析髮鵬獨  
力養母竭愛盡誠出則囑婦奉事語刺刺不休母病已危猶購  
參進及毀哀毀骨立扶柩渡江中流遇風幾覆鵬抱柩大哭風

爲頓止自是終身手顛云生平疎財好施義舉勸捐立應尤敬  
禮文士構友竹莊延名師課子孫年八十四卒孫君敬爲邑名  
諸生

陳方蓮字潤宗監生積苦起家好施子邑中善舉莫不應臨終以  
行義屬其妻吳已而義倉令下吳命子綿韻勲捐穀七百石爲  
本畝倡迨四五區建龍雲書院先後捐金八百錢千餘緡又以  
三百緡助修學宮二百緡助龍河膏火皆承其志

歐陽訓字春協幼失怙事母以孝聞家貧賃春爲業而勸季弟讀  
甚殷日以所得資躬自送贍凡十數年家漸起弟亦入泮生平  
剛方樂義鄉族多愛憚之子職員涸監生源克承先志公事力

以身任嘗捐貲助祠產建郡縣本宗試館歲饑倡族平糶凡賓興義倉書院惜字局皆有堂及一切義舉或助或倡莫不量力爲之孫或蔚文炳俱文庠

辛馨字奠安廩貢生少孤事繼母劉孝母膺末疾湯藥必親奉凡十餘年不倦待伯父炳金如父事必咨廩視羣從如同胞推多取少同若數世無間言足不涉公庭業產被侵占佃戶強梗悉不校以是見重鄉族紛爭經調處輒帖然生平謹齋自持至倡建支祠助賓興田辛卯壬辰平糶量力捐貲不恡其餘助婚葬焚券施藥皆優爲之然謙退多遠慮族舉房長邑舉孝廉方正賓興舉董事皆辭後際多故咸服其先見云

袁智達積苦起家鄉曲義舉捐錢不惜子附生建原監生建校職員建序能繼其業郡拓建考棚捐地基二十餘丈嗣因試館逼近官議估拆又捐半價助修公所邑起育嬰堂賓興堂修考棚學宮並有賞助

辛家政字安成炳庶子從九品職性伉爽嘗在大橋市遇偷而獲咸勸鳴之官不可曰是非積賊絕自新之路開妄攀之門肥捕役害良善吾何安乎又有里民賃居者同舍或涎其婦色欲據之里民勢不敵泣訴居鄰政偕宋杞文力保全之卻其謝有姪與同儕口角幾成鬥訟姪急赴愬斥之曰朋友何至是必爾所爲不善奮掌欲批之逃儕聞而內愧事遂解晚精岐黃術活人

甚多臨終檢積券焚之曰吾爲子孫省事始政生而富厚治父以揮霍散財遂中落因攜二子鄉居督課甚嚴卒成其志有猷有守舉人有爲文庠

郭泉長別字心貴縣北打鐵坳人性篤實幼讀異羣兒父業醫恒在外母督教之不少假清季科舉廢遂從事醫不計值貧者輒給以藥貲鄉里善舉多樂從母老目漸眊每出診歸卽趨問安否或懷果餌以奉時與幼弟琴絃歌曲說一切可驚可喜故事以博權笑母病日夕不離禱於神而愈熟香拜於萬祝寺貴皮尖者有年母沒哀毀旣葬廬墓三年有欲爲之呈報者堅辭之且曰昔父之沒以母命未得盡其情今粗以酬罔極耳

柳文藻字學初一字餘圃工於心計逾冠服賈旣商於上海億樓中人服其識誠信相孚能見其大人又服其量比積貲至鉅萬遇公益如大橋阪堰重大工程等役不斤斤計較嘗於民十二年獨力新文昌閣貲銀元六千有奇鄉人士之往來滬濱者輒曰曾識柳餘圃否共見重於一時如此

謝雲峻孝友性成母歿廬墓三年

劉洪黎號向廬守母墓三年株潭葉家墩

藍濟人字獎中黎源銀腰帶人事親敬謹母歿廬墓三年民十五呈准廬陵道轉江西省詳內務部註冊並發清單彙報旌表孝子

鍾生瑛邑深塘人父挺禮以家貧使瑛業縫生性孝每朝出爲人  
傭必詣親前問安否暮歸亦如之親未寢雖有命弗寢疾則侍  
醫藥寢食俱廢病痊乃已雖食貧以獲親心滋樂鄉人並愛重  
之光緒癸未父沒瑛哭之痛乃謹事其母嘗輟業以顧母泊己  
亥母又逝益不欲坐經戚族勸諭淚盡血繼葬後廬墓三年弗  
肯歸曾訂婚某氏因母沒璧還庚帖知依母而不計其宅鄉人  
士相與具狀呈縣憲張之銳尋勸之歸就公堂薙髮爲請旌以  
勵孝行時遜清光緒甲辰事也既而僉以孝子不可以無後力  
勸之乃娶於黃踰二年舉一子云

郭垣一名自強讀書識義理殉名節再試始售其志固不在一人

之秀才亦不以秀才二字爲一人之輕重也爲秀才後仍負氣  
慷慨艱難險阻始終不渝其時有與相應和者龍元亨盧鍾靈  
唐建節其著也然堅苦微不及矣

唐暉鮑夢嵩生性屈強亦鄉間出眾才也暉驍勇力敵數人夢嵩  
氣壓儕輩奔走耐勞千里不遠與歐陽柄傑易袞章劉思浩等  
輩殆皆有得於知耻近勇之語者與

歐陽丙寅以恩貢就職教諭用水局勞績保舉遇缺先選儒學教  
諭改分廣東試用直隸州州判耄而好學書法圓潤能左右手  
卒年七十九

歐陽澍號雨生幼岐嶷銳志向學無資幾輟舉人龍發機愛其聰

惠不取束脩弱冠以縣試第一人入泮既得拔貢注册候選直隸州州判李有棻任江寧藩司兼護督篆時因同譜專函促以徃親老辭不赴族議建文忠公祠容展緩者再終促成之卒年八十

何蔚春字文芝邑廩生孝友誠篤生十月失怙事母得歡心莽叔早世孀以愛繼他子家產中分春事孀無異生母力學弱冠游庠連試十四高等癸酉堂備居鄉以裁成後進爲務門下皆知名士尤熱心公益建寶興修邑志俱始終其事筦理龍河書院增田數百把念昌黎書院邑人無肄業所勸柳添建構族祠修家乘皆力成之子榮綬郡學生

周蘭相如懷舊鄉網村里人仕趙爲上卿事詳史記在邑西五十里蘭家村蘭灘今猶存蘭姓者

按蘭相如史載趙人舊志以爲邑人未知何據大抵沿徐昇修縣治記而訛也記曰其產才代不乏人義烈慷慨有若蘭相如風穎秀邁有若謝康樂使以蘭爲邑產將謝亦邑產乎今攷相如故里在直隸磁州南二十里杜村店舊有石坊其墓在渭南縣西四十五里戲河道旁碑尙存然徐記必非無因或生平所嘗奇跡或子孫遷居於是均未可知今姑存舊志附於流寓

晉習鑿齒字彥威襄陽人爲桓溫別駕曾末秦苻堅陷襄陽避地

於邑之山谷誦讀不輟後人遂名所居之山爲書堂山舊志系通志

按彥威郡志載其避苻堅亂居萬載卒葬分宜棗木山輿地志亦云分宜有習墓攷晉史苻堅陷襄陽聞鑿齒名輿致之俄以疾歸襄陽尋而襄鄧反正朝廷欲徵鑿齒使典國史會卒不果據此無遊地事墓當在襄陽王仁圃江西考古錄亦嘗辨之因相傳已久仍舊存疑

唐陶沔竹溪六逸之一爲唐司空晚歲來遊愛東北鄉山水之勝遂居焉卒後鄉人立廟祀之故有陶司空廟稱崑曰陶逸子孫世居之地號陶家坊舊志參通志

柳希玘蘇州刺史父渾刺袁州有治聲朱泚反聞渾名欲致之因榜掠其子希玘爲渾季子避居本邑之西江遂家焉卒葬下坑大墓山舊志

徐延休字德文世爲會稽人乾符中進士昭宗狩石門無學士草詔延休來調官適在逆旅左右言其才卽召見命視草昭宗善之及還長安不得用樞密使蔣元暉辟爲僚佐延休惡其人棄去依鍾傳家於洪州烈祖取江西得延休歸授義烏縣令累官光祿少卿終江都少尹二子鉉錯有傳節十國春秋補

按通鑑長編稱萬載徐鉉安志亦云鉉萬載人洪武志確指爲歐桂東鄉當云本樂鄉其曰歐桂蓋從後書舊志福慶坊有鉉

讀書故址則此所云依鍾傳家洪州者正指萬載唐時萬爲高安地本屬洪州也徐之家萬自延休始南唐宋史以二徐爲廣陵人今不從

宋黃庭堅號山谷分寧人伯兄大臨令萍鄉崇寧元年庭堅航荆江畧洞庭涉修水經七十二度省兄於萍鄉三月路經萬載宿逍遙觀廣慧道場卽崇信寺俱有題咏流連數日去采山谷集補

甘祺奉新人爲衡陽縣丞紹興中令人復陷洪州遂卜居萬載教子孫以耕讀爲本孝悌爲先采甘汝來集補

辛竭字克勤號南坡開宣後避難隆興結廬西山麓閉戶讀書以存心養性爲本致知格物爲功隆興守聘爲山長生徒至者百數嘉定開來省祖塋遂定居焉子三英勇冠勇無傳嘆冠子孫

繁衍舊志

元虞集字伯生撫州人宋丞相允文五世孫累官奎章閣學士至元五年過袁州作尊經閣記與邑人黃璧有媿屢至其家作黃盅大本堂記書澄波堂記後馮侯修學記張巖書院記采學古錄補吳澄字幼安崇仁人川力聖賢之學累官翰林學士邑人黃盅嘗從受學澄以孫女妻之往來寓盅家爲題其堂曰大本作黃璧尙古堂記采草廬集補

歐陽元字原功其先由分宜遷瀏陽歷官翰林承旨與邑人黃璧友善嘗過萬載屢造其堂見璧弟盅如舊相識盛稱其學爲教

玉溪作錦江橋記米舊藝文志補

揭傒斯字曼碩龍興富州人歷官翰林學士嘗偕吳澄虞集歐陽

元訪邑人黃璧每款洽經旬月而後去後人稱其坊爲集賢米

舊輿地志補

譚觀字自廣南昌灣溪人孝友工詩文至順間應辟舉爲經筵簡

討賜進士出身授翰林院國史編修後任國子助教見陳友諒

據江西諸路兵起避居萬載卜築龍河之濱自號卧游子著樂

隱詩以自適後裔世居龍河橋畔舊志

鮑遇字千泗徽州人官御史與學士歐陽元友時元主以鐵木迭

兒輔導東宮上疏劾之不納遂乞休家居徐壽輝起池州陷乃

徙信州再徙瀏陽欲依歐陽元值元物故徙萬載西郊燕子窩

督耕種爲業歐普祥屢聘不就子德忠移居城中遂開族焉節

舊志

胡恭字志同奉新人善真草能詩文元末任上高教諭已而避亂

袁州洪武初徵不起日與劉豫父輩角藝自娛知縣黃權寄詩

云相別未多日相尋勞夢思更求四幅畫要寫五言詩可想其

韻致後游覽至邑涂泉結廬其上名曰雲松巢石門梁寅爲歌

及記舊志系上高志

清史大成浙江寧波人順治乙未修撰素善瀏陽知縣韓燦萬載

知縣范廷鳳康熙四年自瀏陽過萬途中有澗斷危橋度峯廻





得異人投痘疹奇方捐貲施藥都門患痘疹者賴全活無算

郭汝恭性恬好施精陰陽家言并討究丹黃術於城南建不二庵

請華嚴大藏諸品朝夕焚修其中嘗出金助修月光崇信二寺

及秀江康樂竹渡諸橋年八十三卒以上舊志

清宋逢聖司背人工水墨偶作禽魚走獸無不酷肖性嗜酒平時

以紙索求畫雖置千金絕不吮筆及沽釀告窶為置壘瓶脩脯

於旁輒劇飲醉後潑墨淋漓頃刻數十幅生氣迴出聽人攜之

去

李榮陶字風高高村諸生性曠逸不以科名介意精醫理并推挈

術屢起人於危與執友高某相晤見神色有異索手脈診之曰

君外雖無恙然某臟已瀉宜速治未幾果死府教授熊日華萍

鄉令張放皆敬禮之手錄醫家宗旨數萬言其弟榮陞見而嘆

曰倘得梓行有補於世不少

周金洪字玉振西都人幼聰敏習舉子業常從教諭魯鴻游故作

文有法度補弟子員旁及醫術精奇經八脉延診視者生死無

不驗用藥不屑屑古方多奇效每大比赴秋闈不倦恩賜國子

監學正年八十四無疾而逝

僧球玉任持牟村西源庵性聰慧喜作書兼通儒家言嘗題寺聯

云鐘希留夜月衲破補朝雲可想見其風致喜搜剔古木堯相

贊命形罔不酷肖亦絕技也

辛炳炎字用晦東都人英爽特達爲文涉筆立就教諭魯鴻獎異之屢試前茅卒不售年五十乃補醫其用藥多時師所不解卒應手瘳嘗有戚串至家賀歲炎投一丸命急服遲將不治其人不信翼日疔發唇死一婦孕而病延之診視定方下之立產數蛇而愈其險症救人類如此著有醫通醫案藏於家

喻鶴松字鳴皋藏溪人少孤貧兄課之讀書夜不輟兼通醫卜星命家言既長貧益甚無以養因專於醫活人無慮數百所酬貲儲半以供母嘗有急需箚中尙餘錢若干不敢用典衣以應終母之世不少變乾隆年間縣舉醫學眾推之受冠帶卒後辛紹業爲之傳

郭古號石林田下人嗜酒善畫每當拂紙濡翰時以鉅觥盛冷酒且飲且揮筆蒼意古初若了不可喜細視乃覺其妙

王定恒字以占南田人少從張琢齋學稱其文有別情年三十不售乃潛心岐黃其審脈察證川方獨具心得每歲挈貲製丸散以拯病苦壽七十終著有醫學尋源方治要典痘疹真詮色脈真詮博愛軒藥論醫案藏於家

李光歲字晉之高村人性端重敦孝友爲文非啟禎大家絕不屑意卒以是見厄精堪輿嘗曰形家執理氣說徒亂人意造化之大安能以徑寸法求之哉隨父榮陞宦遊湘湖滇黔及金齒蒼山洱海皆遍頗得山川融結大概平時論說滔滔及與人卜宅

兆矜持慎重從不輕洩

郭樹芝號甘泉如岡子附貢生質樸厚重喜讀書好游覽尤嗜奕  
究研古今棋譜盡得其妙嘗在省垣與戴秋士對局秋士合省  
所推國手也下手數著戴卽起曰此江西好手遂與友善棋日  
進邑無能抗手者旋訪同宗大錢南康署登廬阜游鹿洞放情  
山水者月餘鹿洞山長某以奕名招與角芝連局勝之生平慷  
慨多義舉嘗買產紹江價不貲後知故淨慧寺廢基爲奸人所  
賣遂出金建寺塑像契內用山盡施香火寺後有石平砥如棋  
盤芝因額曰棋盤山寺

曹錫鵬裏源人習舉業不售遂潛心醫理屢著明效邑侯來孺人

病久延診之曰孺人必善怒氣喘頭俯痰凝平日生冷必不節  
皆曰然曰此腎不藏瀾脾運失職胃陽遏抑肺液不化投以藥  
漸痊謝之不受曰須節飲食戒志怒明年因婢忤復發延覆診  
辭曰怒則氣上又際春陽上升時不可爲也旬日逝孝廉李承  
烜母分媿後患寒熱臥牀難轉側少腹痛不可按醫者主化痰  
又不痊鵬曰脉洪而數內癰將成亟與托消劑未效聞諸醫雜  
進症已危延鵬取決曰脉尚和可療仍須托之至夜半膿血大  
下調理二月而愈郭太學敏猷跗腫膝大如斗神倦形瘁爲早  
晚進加減腎氣丸日中加味六君湯外熨洗兼施一月而效彭  
太學廷誼寒熱譫語加風疹以肺癰治轉劇鵬爲先解外邪

後滋脾胃不月愈誼自恐體弱不久曰無傷進還少丹尙可十年後亦驗從兄鈞謙腹脹連腰腎椎擊徹日夜投以理中加溫熱劑既平復矣曰未也方春木司令而見秋金毛潛之脉至秋必不支幸早圖之爲立方不從果八月卒生平輕財重義富無禮者千金不往貧迫者反贈以藥資所傳外甥汪賢徒孫泰臨均以醫名

朱淑暉樟源坳人精醫能預決人生死其同族有綽號寶石眼者數請醫不往至於再三曰一次須五十金一藥病良已再往加甘草一味先後得百金宋固富室多取之不爲慮遇困窮者且予之藥然此白金火而在積或笑之曰先生白金何至今猶不

兌還市債曰病未好金須還曰早好了何言未曰明年六月再發卽不救遣其子將金還曰前言聊以試君既不吝須見還至六月果病復往請曰早知有今日不須再藥預備後事可也會客湘潭歲暮有坵裏王某商於彼約同歸曰尙少錢三十串能貸我卽富歸某如數送去隔年王某病吐血藥之稍愈再來請方值其抹脾不稍止其人再三請曰且在這食飯令爨夫買鱸魚其人辭曰醫在此不妨食少許而大吐俟其定爲易方囑服六十劑逾五十卽大愈復往視之曰病雖愈藥弗足未絕其根以店摺計之尙少三劑仍令服足其所見多類此至今稱良醫者必推淑暉錄之以爲操術不工重金錢而輕性命者戒也

鍾召棠號蔭南讀書頗通大義喜繪事壯遊湘鄂各行省別號雲  
遊樵子識見開拓繪事日工其所作山水人物花卉環而講之  
者戶外屢常滿某年國軍駐牟村席旅長秉鈞就禹王宮址立  
公園命爲護花主人年七十八卒畫册多刊行祖居牟村石板  
橋又別號板橋道人前知事余重耀有題詞

晉謝仲初邑人志慕道術修煉閭皂山丹成復歸故隱過縣西見  
其無水拔劍刺地泉涌出甚甘卽卓劍泉也濟江無舟御竹葉  
以渡卽今竹渡嘗遊紫蓋山紫雲蓋之後登謝山冉冉飛去人  
名真仙嶺又曰上昇嶺有仙壇麻鞋石試劍石丹竈煉丹井諸  
遺蹟井水自木根中迸出水旱禱輒應參寺觀註嘉定志

按嘉定志以仲初冠仙釋未詳朝代安志謝仲初萬載人在  
高安北山中卽今謝山次黃仁覽下教真人上二人皆東晉時  
得道者今謝山石刻尚存丁丑開山字正元帝渡江改元建  
武歲也其爲首人無疑李志列入北宋陳志以爲元人則未  
知元和志已列仲初名唐試南宮又以謝真人還舊山命題

斷不得在唐以後矣

湯周二仙失其名俱廣南人晉安帝時湯爲靖州壽光令周爲洪州南昌令湯以管政不綱慨然掛冠訪周相約修道卜地康樂峯頂山中道成因名湯周山今棋盤石試劍石遺迹尙存有鐫刻相傳爲紫微觀碑參輿地紀勝

按靖州唐武德時置卽今瑞州無壽光縣晉亦無所謂靖州蓋青子之訛也壽光自漢隸北海郡屬青州

唐道一漢州什邡人姓馬氏故稱馬祖嘗修道於峯頂以山嶺有鍊魔場建上中下三塔今惟中塔存焉有泉潄冽禱雨輒應舊寺觀參府志

懷海名大智福建長樂王氏子依馬祖與西堂智藏南泉普願同號入室弟子時三大士化門相角立焉創立叢林儀軌名曰清規元和九年示寂嘗修道壽峯山采舊寺觀注參通志補

又按謝志大智列南昌仙釋內縣舊志三學院唐貞觀十年僧大智開山又云在縣西七十里壽峯山則與馬祖之峯頂山同在西鄉所謂依馬祖者是己第貞觀至元和年代太遠疑縣志爲貞元之訛

黃皮二仙女未詳何許人相傳在黃皮山名勝志作黃波嶺修真道成白日冲舉鄉人有禱輒應參嘉定志

按南嶽志有西漢青城山道士大微先生王谷神大素先生

皮元暉同渡荆渚泛瀟湘至南嶽修真雖未言至萬邑然王  
與黃土音絕相類附參 又按水經注黃皮小木也南楚多以名山一

作黃巖

希運闍人幼出家黃蘗山往南昌見馬太師至則馬已示寂乃走  
石門謁塔參百丈師後觀察裴休迎住龍興寺曾創光化院於  
嚴田在今縣北一百里繼建院於清泉山曰延壽在今縣東北五十里  
又建崇信寺在今縣治南百五十步謚斷際禪師舊寺觀注系豫章書  
補

按舊志斷際於咸亨元年創光化院二年創壽延院二年創  
崇信寺而豫章書通志俱云大中間示寂考咸亨乃高宗年

號距宣宗大中已百七十餘年合生毀推之斷際不減二百  
歲未必然也通志普賢寺注云會昌間觀察使裴休迎黃蘗  
山希連禪師居此普賢卽龍興也師雖迎居洪州休旋罷或  
來萬載行化疑三庵之建當在會昌大中時

懷祐泉州仙遊人受業九座山陳禪師尋參石霜初居謝山復遷  
棲賢終於廬山謚元悟大師采通志補

令超初任高安上藍山鍾傳即洪州使迎焉因開元寺舊基創院  
以居仍名上藍昭宗大順庚戌正月初召大眾告曰吾本約住  
十年今化事既畢當欲行矣齋畢端坐長往塔曰本空謚真元  
大師安志真元作元貞采通志寺觀補



按舊志明寂院在邑北二十里地名上藍宋大中祥符五年  
僧澄寂開山通志佑清寺始爲開元寺大中間燬後南平王  
鍾傳復建上藍院以居上藍山僧令超考宋以前萬載本屬  
高安川云高安上藍卽邑北上藍近南平故里者令超在唐  
旣居是山矣安得至宋有開山事澄寂殆承令超後重興道  
場者歟

楊吳曾文迪雩都崇賢里人時楊筠松善青烏術世稱救貧仙人  
迪與劉江東師事之凡天文讖緯黃庭內景之書靡不究  
而尤精地理天祐間至萬載愛西山之勝謂其徒曰死葬我於  
此卒如其言後其徒忽見於豫章駭而歸談其棺無有也著有

八分歌二卷采豫章書補

按曾氏言行約編作文迪字求己宗聖四十世孫其先都鄉  
侯據避新莽亂遷豫章後有分徙雩都者故文迪爲雩都人  
其源委頗詳而迪與迪究未敢決爲孰是又邑老相傳有袁  
姓者欲侵葬迪墓啟土得石刻云五百年後有土衣人來侵  
我墳云云謀遂寢亦與前文小異姑並識之

宋法順禪師綿州文氏子太宗時擇地至袁卓錫白楊山卽今淨  
覺院舊寺觀注

段瓌字德瑱嚴田人少遊鄉校性醇厚與物無忤遇不平事則奮  
臂而前建炎間寇盜充斥段族數十口被虜瓌齎金帛挺身往

贖賊義之俾偕歸紹興二十九年歲旱斗米千錢瓌發廩止取常值又日爲粥以食饑者全活甚眾後結庵謝山壁間多寫坦蕩字忽聚親舊敍別曰天帝卽召我矣一日鐘鳴歛然凌空去鄉人走視惟敝衣履存焉嘉定志

德宏禪師姓程氏浮梁人初住木平當途者聞其道行請住萬載歷居分宜福聖崇勝二院及洪州西山宜春仰山均有禪譽遷寂於紹興二十九年著有語錄一集采嘉定志補

僧守真住廣慧寺有道譽師仰山從悅禪師悅徒數十人守真亦其傑出云采嘉定志補

元黃樸庵至正初遊水坑礫愛其山林清勝遂募化結庵卽今長興

院後趺坐而逝安志

僧自然相傳於石庵得道白日冲舉禪林至今猶存

劉原祖名濤芳西隅一圖人至正六年建陰陽齋會七朝忽有異僧持鉢古貌跣足破衲癩身氣穢難近眾皆詬罵原祖獨食以飯問亦無言惟以背抵壁若指寢狀歛然去忽馨香滿室原祖急尾之不見視牆壁有詩云不是山僧特地來因遊南嶽反天台青衣童子多饒舌黃面瞿曇笑臉回鐵鉢滿盛貧子飯布衣難覓富家財殷勤傳與劉原祖伏虎岩前花正開旬餘原祖無病而逝殆尸解云節舊志

黃竹關道人黃伯詳也修真建城坊道觀有入人者假盃以餐既

莫知所之他日入人與邑商邂逅襄陽以前盤付之曰歸語竹  
關卽當尋我於蓬島因忽不見客歸語黃未幾黃亦飛昇遂  
名其觀爲九仙參寺觀注

清黔羸禪師洪州陳氏子脫白後開九峯語豁然大悟順治十五  
年住北關普濟庵康熙三年遊醴陵任二峯著有三峯語錄次  
年居白楊山六年至城南三元殿說法書偈而逝采舊寺觀注補  
福宗號散庵安福歐陽氏子出家白楊工詩畫創一粟園爲精脩  
所知縣龐驥嘗造訪序其詩康熙壬寅振錫京師安福伍環贈  
以序輯禪宗總究二十八卷白楊語錄二卷

應智頊之起以武畧保聚鄉里初疑爲閭左豪右慮勇任俠之徒  
及觀於其州人生則戴爲父母沒則奉之爲神則又歎其功  
德所被必由其有豈弟之意溫溫煦煦以拊循其民而無幾微  
羸猛嚴厲之氣斯所以沒世不忘也謂之循吏抑何媿焉王謨

十代文獻略

唐僖宗文德元年秋八月楊行密畏孫儒之逼欲輕兵襲洪州袁  
夔曰鍾傳定江西已久兵強食足未易圖也迎駕綱目

自廣明庚子之亂天下大荒車駕再幸岐梁道殣相望郡國率不  
以貢土爲意江西鍾傳令公起於義聚奄有疆土充庭述職爲  
諸侯表式片孳孳以薦賢爲急務雖州里白丁片言隻字求貢

於有司者莫不盡禮接之至於考試之辰設會供帳甲於洛平  
行鄉飲之禮常率賓佐臨視拳拳然有喜色復大會以餞之筐  
篚之外率皆資以桂玉解元三十萬解副二十萬海送皆不減  
十萬垂三十載此志未嘗稍怠時舉子有以公卿關節不遠千  
里求首薦者歲嘗不下數輩唐據言

安陸郡有處士姓馬忘其名少遊湖湘又客於鍾陵十數年嘗說  
江西鍾傳本豫章人少倜儻以勇毅聞於鄉里不事農桑恒好  
射獵熊鹿野獸遇之者無不獲焉一日有親屬酒食相會傳素  
能飲是日大醉唯一小僮侍行比暮方歸去家方二三里谿谷  
深邃有虎黑文青質額毛圓白眈眈然自中林而出百步之外

顧望前來僕夫見而股栗謂傳曰速登大樹以逃生命傳時酒  
力方盛膽氣彌熾卽以僕人所持白梃山立而拒之虎卽直搏  
傳傳亦左右跳躍揮杖擊之虎又俯伏傳亦蹲踞須臾復相擊  
攫如此者數四虎之前足搭傳之肩傳卽以兩手抱虎之項良  
久虎之勢無以用其爪牙傳之勇無以展其心計兩相擊據而  
僕夫但號呼於其側其家人怪日晏未歸仗劍而迎之及見相  
捍卽揮刃前斫虎腰既折傳乃免焉數歲後江南擾亂羣盜四  
集傳以鬪虎之名爲眾所服推爲酋長竟登戎帥之任節制鍾  
陵鎮撫一方澄清六郡唐僖昭之代名振江西官至中書令耳

日記

鍾傳鎮江西日客有以覆射之法求謁傳以日懋包一橘置袖中  
令射客云太歲當頭坐諸神莫敢當其中有一物常帶洞庭香  
鄭文寶南唐近事

上藍和尚在洪州甚爲鍾傳敬禮疾篤傳省之求一言相付和尚  
起索筆作偈以授其末云但看來年二三月柳條堪作打鍾鎚  
明年春淮帥引兵奄至洪州果陷江南遂爲楊氏所有 全唐詩  
話

梁太祖乾化時諸州長吏多武士專以軍旅爲務不恤民事知誥  
獨選川廉吏修明政教招延四方士大夫洪州進士宋齊邱好  
縱橫之術謁知誥知誥奇之辟爲推官與判官王令謀參軍王

翊專主謀議以牙吏馬仁裕曹棕爲腹心通鑑綱目

吳順義中差官興販薄定租稅厥田上上者每一頃稅錢二貫一  
百文中田一頃稅錢一貫八百下田一頃千五百皆足陌見錢  
如見錢不足許依市價折以金銀并計丁口調課亦科錢宋齊  
邱時爲員外郎上策乞虛抬時價而折絹絹綿本色曰江淮之  
地唐季以來戰爭之所今兵革乍息黎甯始安而必率以見錢  
折以金銀此非民耕鑿可得必興販以求之是爲教民棄本逐  
末耳是時絹每疋市價五百文縗六百文綿每兩十五文齊邱  
請絹每疋抬爲一貫七百縗爲二貫四百綿爲四十文皆足錢  
丁口課調亦請蠲除朝議喧然沮之謂虧損官錢萬數不少齊

邱致書於徐知誥曰明公總百官理大國督民見錢與金銀所謂攤籌救火撓水求清欲火滅水清可得乎知誥得書曰此勸農上策也即行之自是不十年間野無闕田桑無隙地自吳變唐目虬歸宋民到於今受其賜齊邱之事美矣知誥乃亟聽而行之可謂賢輔相而九國志齊邱傳中畧不書資治通鑑亦佚此事今之君子惟知浚民以益利豈不有覩於偏閭之臣乎容齋隨筆

世言江南精兵十萬而長江天塹可當十萬國老宋齊邱機變如神可當十萬說見龍寰江南野錄周世宗欲取江南故齊邱以反間死方五代之際天下分裂大亂賢人君子皆自引於深山大

澤之間以不仕爲得而馮道有重名於中原齊邱擅衆譽於江表觀其人可以知其時之治亂矣周師之犯淮南齊邱實預議論雖元宗不盡用然使展盡其籌策亦非能決勝保境者且世宗豈畏齊邱機變而間之者哉蓋鍾謨自周歸力排齊邱殺之故其黨附會爲此說非其實也予論序齊邱事盡黜當時愛憎之論而錄其實覽者得詳焉陸游南唐書

宋齊邱用江南李先王昇中王璟二世皆爲僕射璟愛其才一日選景於華林廣席獻羯鼓詩曰巧斲牙琳鏤紫金最宜平穩玉槽深因逢淑景開佳宴爲出花奴奏雅音掌底輕瓏孤鵲噪枝頭乾快亂蟬吟開元天子曾如此今日將軍好用心又嘗獻鳳

鳳臺詩曰嵯峨歷洪泉峇峇撐碧落闕哉秦始皇不驅亦不  
鑿上有布政臺入顧背城郭山蹙龍虎健水黑螭蜃作白虹欲  
吞人赤驥相燂燥畫棟泥金碧石路盤磽确倒掛哭月猿危立  
思天鶴鑿池養蛟龍栽松棲鸞鷲梁間燕教雛石罅蛇懸殼養  
花如養賢去草如去惡日晚嚴城鼓風來蕭寺鐸埽地驅塵埃  
翦蒿除鳥雀金桃帶葉摘綠李和衣嚼貞竹無盛衰媚柳先搖  
落塵飛景陽井草舍臨春閣芙蓉如佳人迴首似調謔當軒有  
直道無人肯駐脚夜半鼠窸窣天陰鬼敲啄松孤不易立石醜  
難安著自憐啄木鳥夫蠹終不錯曉風吹梧桐樹頭鳴曝曝巖  
峩江命石青苔何淡薄不語興亡事舉首思渺邈吁哉未到此

漏劣同尺蠖籠鶴羨鳧毛猛虎愛蝸角一日賢太守與我觀橐  
籥往往獨自語天帝相唯諾風雲偶不來寰宇銷一畧我欲烹  
長鯨四海爲鼎鑊我欲取大鵬大地爲罍媿安得生羽翰雄飛  
上寥廓馬令南唐書宋齊邱本傳

朱瑾既殺知訓白到卽日其事聞於昇州知誥齊邱曰請明公卽  
今渡江定其事仍馳聞命公則政事之任歸公矣不然令公當  
以諸子入代明公無望矣知誥立從之溫聞知誥已入遂因而  
許之五國故事

宋齊邱出鎮洪州詔賜錦袍烈祖親衣之李建勳贈詩有一人看  
上馬雙節引還鄉之句時論榮之齊邱至青陽初命穴牆給食

俄又絕之餒者數日中使謂齊邱曰俟令公捐館方供食耳以  
絮塞其口遂卒時有黑氣起直貫九華山元宗暮年禁中往往  
見齊邱陳覺李徵古如生時禳之不去甚惡之因議南幸五南  
餘載

李徵古少時賤遊嘗宿同郡潘長史家是夜潘妻夢門前有儀注  
一查後漢書尚書郎張衡周興參案儀注天文之儀法考古校  
今以爲九道法最密又查南史司馬紫傳撰嘉禮儀注一百一  
十二卷此云門前自必是儀仗無疑劉濤謹注鞍馬擁劍骨朶  
衙隊約二百人或坐或立且云太守在此泊見乃寓宿秀才覺  
後言於潘曰此客非常人也妾來晨暮見餞酒一鍾贈之金扼

腕曰郎君他日富貴慎勿相忘李不自知也來年至京一舉成  
名不二十年除袁州刺史離闕日元宗賜內庫酒二百瓶鄭文

寶南唐近事

徐楚金瑞人也其爲徵古作記稱以吾師意其學行在當時亦非  
碌碌者徒以比周陳覺傅會齊邱遂至目爲僉邪爲世嫉憎則  
甚矣朋黨之累人也班固之於竇憲也馬融之於梁冀也陸機  
潘岳之於賈謐也柳宗元劉禹錫之於王叔文也其人文章經  
濟豈不足以自致功名而立身一敗萬事瓦裂殷鑒不遠自古  
而然夫防風侏儒各有一節執其一節即可定其身之長短然  
而相士者於此又有截長補短之法焉徵古人品不必深論至



以經術潤色吏治亦不可謂非其所長予故不取南唐書而別采他籍以入於循吏傳斯亦瑕瑜不掩之意也王謨十代文獻畧按記中敘述吾師語似指孔子

宋太祖欲伐江南萬載徐鉉入奏乞罷兵太祖曰江南主有何罪但卧榻之側豈容他人鼾睡乎周深長編鈔

徐常侍入汴市一宅若後見宅主貧甚曰得非市宅虧價而至是耶吾近撰碑文獲潤筆二百千可以相濟其人亟辭命左右輦致之其厚德如此老學叢談

萬載徐鉉寓邠州死家人挈喪歸道出一邑時索細爲宰忽一官自稱江南放叟徐鉉來謁曰僕有所懇平生本廉介向在江南

爲學士時嘗勉強徇情誤受人一寶帶不獲固辭爲囁執政更定一獄雖事不枉法情有可原然或不免貪財罔上之罪今妖魂過海神廟下恐不及徧察生平緣此案不相容若爲邑宰統隸版籍乞爲吾謝之言訖不見細異其事乃爲請禱柩過如飛云黃東重航中帆

徐鉉爲人忠厚不以位視驕人在海州時劾亮爲錄事叅軍鉉與往還如僚友有印粲者獻詩曰不將才業暫時誇人仰聲名徧海涯月滿朝衣聽禁漏更闌分直埽苦花諫青木上先焚稿御筆曾傳立草麻見說下朝無一事小池栽葦學僧家

徐鍇撰義門陳氏書堂記有男女長幼以屬會之辭旣已授之又

密令寫碑人自於木添一食字或問故曰非食無以義聚欲以此一字爲陳氏子孫之誡耳

徐錯以屯田郎中知制誥久次當遷中書舍人游簡言每抑之錯遂詣簡言簡言從容曰以君才地何止舍人但兄弟並居清要物忌太甚請少緩之使眾稱淹恤進固未晚錯頗快快簡言徐出妓侑酒疊唱歌辭皆錯所製錯乃大喜起謝歸告兄鉉鉉曰汝乃爲數闋歌換中書舍人耶山南餘載

潞水出豫章康樂縣其間烏程鄉有酒官取水爲酒極甘美與湘東鄴湖酒年常獻之世稱鄴潞酒盛宏之荊州記

葉夢鼎字鎮之澶祐年知袁州言袁郡山多田少請特免和糴轉

運復下米三萬力請罷之毀萬載旗箭村淫祠塞其妖井宋史  
龍鐔以國子監生超擢爲浙江按察使同時如阮友章爲福建按察使王平爲北平又爲左右參政二十五人一時銓補豈空印事發耶兪州別集

岱源過講鄉者相傳十二真君講道經於是因名其鄉而立祠焉後燬正統間虎出爲患歲仍禳李孟友於舊址建真君壇虎他徙祭禱輒應居民禱之并祀孟友於壇木菴志

彭汪所居鄰家失火汪前夕夢一紅臉人以金尺量各屋檐至汪宅謂其僕從曰此善人也免之後火發被焚者數十家汪宅獨存舊志

前明間有屠沽晨逾山凹見虎蹲立援樹避之凹前一婦抱孩至  
鞵帶解乃置孩虎背結鞵復抱下凹虎去問之曰石也知爲彭  
姓寡婦因奇而娶之延師課其子後家中落慍甚時村有富者  
入市過古廟聞廟中語曰今日彭老爺來此受責矣入廟聞然  
疑之立於市適暑偕子行屈指格之子號泣詰其故曰此彭氏  
兒也吾錢已盡索紙筆無已時富者曰毋余代之自是讀書十  
餘年皆富者力後由舉人官二千石本府志

子抵上高十日後順治乙酉十二月也萬載署令杜之子杜子衿從  
省來求子撥兵護送往萬載收父骸予如所請具優卹金六兩  
同牌給之杜抵萬載得父骸棺斂以舟載回因擄掠萬載良家

婦女二十餘匿舟內度上高袁州刑館二役知而稟予予曰有  
處杜兄余謝卹余曰尊翁在袁同事誼屬同寅當親弔發票示  
橋子杜船毋得擅放旋具二金折弔儀詣杜舟哭杜禮畢袁二  
役稟予云云指南岸一小舟曰在彼采命移舟親閱婦女見余  
俱大哭求救命余謂求父遺骸孝子也擄掠婦女則寇矣不可  
遂命小舟泊南岸其婦女一一停余寓所內具飲食款之次日  
卽命小舟計口授糧造冊付袁二役押回萬載取領各歸其家

黃鼎彝湯平附記

舊志載康熙十七年諸生呈請科舉盤費邑侯吳克庵批云賓興  
盛典在例自富舉行况本縣作養爲心期望尤切除照舊例外

更當竭力破格以備諸生資斧二十年又值賓興則常白山實  
爲宰除祖餞撥船外每名餽贖四兩府縣學舉首倍之二公皆  
廉吏也且適當瘡痍未復官私交困之時培植殷殷如是後之  
有心造士者可以勸矣舊志錄之有旨哉

李元運翠園以善書名嘗游省垣與居停至肆閱書畫俱不屑意  
最後出一幅輒擲還之致口角復取而碎之肆主大譁居停許  
償金不可必欲得原書元運笑曰易耳索紙疾書數幅乃知所  
碎故其筆也

古漏壺需人守候黃茅周許仙自運巧思製錫壺三上高源壺次  
均漏壺又次昇潮壺又設過水瓶定水壺分水引水龍俱用錫

製最下置一瓦盆爲廻龍池定水壺側懸小鐘鐘下有椎有車  
輪若水碓然昇潮壺內植木爲漏箭標十二時塑一小童捧之  
下安箭舟先審定時刻較準昇潮壺中漏箭將水注高源壺令  
滿徐徐自流以次遞下每交初刻及正刻定水壺滿自行傾洩  
車轉鐘鳴潮亦隨昇小童捧箭並起迄箭盡水盈壺下小孔旋  
流轉引水龍中洩入迴龍池潮水漸退箭舟亦漸低其上漏水  
仍微流不息漸積漸滿箭仍漸長如初每日僅從迴龍池運水  
高源壺一次

